

ሃዋሪታ ኦሱዋ

ጋላ ቆፋ

ሃዋሪታ ኦሱ ማፃፋይ፣ ሉቃስ ዋንጌላ ካሊዲ ፃፊቲዳ ማፃፋ። ማፃፋሰ ዳዲያ ዋና ቆፋይ ኮይሮ ዩሱሳ ካሊዲ አሳቲ ጌሻ አያናይ ካሌሱን፣ ኢያባ ኦዲያ ቃላ፣ «ዩሩሳላሜን፣ ዩሁዳ ቢታ ኡባን፣ ሳማራን፣ ሳባ ጋፃ፣ ጋፃ ጋካናው» (1:8) ዋንጌላ ቢታ ኡባ ዋቲ ጋሊዳኮ ኦዲናሳ። ማፃፋይ፣ አማኖይ አይሁዳ አሳታ ጊደን ደሜቲዲ፣ ኩሜላ አላሜን ዳዲያ አሳ ኡባ አማኖ ጊደና ጋካናው ዋኒዲ ዳልጊዳኮ ኦዲያ ታሪኩ። ሃ ማፃፋ ፃፊይ፣ አማኒያ አሳቲ ሮሜ ካዎቲላ ኩንዲሳናው ጋርሳራ ማቁቲያ አሲ ጊደናይሳኔ አማኖይ አይሁዳታ ሃይማኖቲ ፖሎ ኦሊይሳ ጊዳይሳ ኤሪሳናው ከሂ ዳቡሪዲ አሊሰ።

ሃዋሪታ ኦሱ ማፃፋን ዩሱሳባ ኦዲያ ዋንጌላይ ጋኪያ ቤሳይ ዎዴን ዎዴን ዳልጊ ዳልጊ ቤይሳኔ ዎሳ ኬሊ ኤቁዳይሳ ቆንጨሲያ ሄዡ አይፊ ከፊሌታን ሻካናው ዳንዳዔቲሰ።

1. አማኖይ ዩሱሲ ሳሎ ኬዩ ሲሚን ደሜቲዳይሳ።
2. አማኖይ ኢስራዔል ቢታ ኡባ ጋኪዳይሳ።
3. ሮሜ ጉጂዲ ሜዲቲራኔ አባ ዩሹዋን ዳዲያ ቢታ ኡባን ዳልጊዳይሳ ቤሴሰ።

ሃዋሪታ ኦሱ ማፃፋን አዲዲ ቤንቴይ ጌሻ አያና ኦሱ ጊዲሺን፣ ጳንጻቆስፄ ጋላሰ ዩሩሳላሜን ዳዲያ አማኔይሳታ ቦላ ዎልቃራ ዎዲዳይሳ ኦዴሰ። ሄሳዳካ፣ ማፃፋ ጊደን ቆንጨዳ ኦሱታ ኡባን ቤንቴዳይሳዳ ጌሻ አያናይ ዎሳ ኬላኔ ዎሳ ኬላ አይሴይሳታ ካሌሊዳይሳኔ ሚንጼሊዳይሳ ጉጂዲ ኦዴሰ። ቤኒ ዎዴ አሜቲያ አማኖ ኪታይ ደማ ደማ ኦዴቲዳ ቃላ፣ ኬሶን ኬሶን ኤኬቲሰ። ሃዋሪታ ኦሱዋ ጊደን ኦሴቲዳ ኦሱታ ኪታይ አማኒያ አሳ ዳዶኒኔ ዎሳ ኬላ ኢሲፊቲላን ዳዲያ ዎልቃይ አይ ሜላ ጊቲኮ ቤሴሰ።

ሃዋሪታ ኦሱዋ አይፊ ቆፋታ

- ማርካቴሳሰ ጊጌቲላ 1:1-26
- 1) ዩሱሳ ወርሴላ ኪታኔ ኢሚዳ ኡፋይሳ 1:1-14
 - 2) ዩሁዳ ቤሳን ሃራ ደሩዋ 1:15-26
- ዩሩሳላሜን ማርካቴላ 2:1-8:3
- ዩሁዳኒኔ ሳማራን ማርካቴላ 8:4-12:25
- ጳውሎሳ ሃዋሪቲላ ኦሱዋ 13:1-28:31
- 1) ኮይሮ ሃዋሪቲላ ቡሳ 13:1-14:28

- 2) ዩሩሳሌም ሽቆዋ 15:1-35
- 3) ናምዓን ሃዋሪቱላ ቡሳ 15:36-18:22
- 4) ሃዘን ሃዋሪቱላ ቡሳ 18:23-21:16
- 5) ጳውሎስ ዩሩሳሌምን፣ ቂሳሪያኒኔ ሮሜን ቃሽቴላ 21:17-28:31

1-2 ቴዎፊሎሳ፣ ዩሱሲ ባ ኦሱዋ ኦይኪዳ ዋዴፔ ሳሎ ቢዳ ገላሳ ጋካናው፣ ኦሊዳባኔ ታማርሲዳባ ኡባ ታኒ ታ ኮይሮ ማፃፋን ፃፋሰ። ሳሎ ባናፔ ሲንፎ ኢ ባ ዶሪዳ ሃዋሪታ ጌሻ ኣያናን ኪቲሰ።³ ኢ ባ ዋያፔ ጉዬ ሃይቆፔ ዴንዲዳይሳ ሲጴይ ባይና ቆንጨሲዲ ኤንታው ባና ቤሲሰ። ኦይታው ገላሰ ኤንታው ቆንጨዲ ያሳ ካዎቲላባ ኤንታ ታማርሲሰ።⁴ ኢሲ ዋዴ ኤንታራ ኢሲፌ ሚሾ ኤንታ ሃይሳዳ ያገዲ ኪቲሰ። «ታ ሂንቲው ኦዲዳ፣ ታ ኣዎይ ኢማና ጊዳ ኡፋይሳ ቃላ ናጊቲፔ ኣቲን ዩሩሳሌምፔ ኬዮፕፔ።⁵ ኣይሰ ጊኮ፣ ዮሃኒሲ ሃላን ፃማቂሰ፣ ሺን ጉላ ዋዴፔ ጉዬ ጌሻ ኣያናን ሂንቲ ፃማቂታና» ያገሰ።

⁶ ሃዋሪቲ ዩሱሳራ ጋሂቲዳ ዋዴ ኢያኮ፣ «ሳዳው፣ ኢሰራዔሌታሰ ኔ ካዎቲላ ዛራና ዋዴይ ሃይሰ?» ያገዲ ኦይቲዶሶና።

⁷ ዩሱሲ ኤንታኮ፣ «ታ ኣዎይ ባ ማታን ኦሊያ ዋዲያኔ ላይላ ሂንቲ ኤራናው ዳንዳዔኬታ።⁸ ሺን ጌሻ ኣያናይ ሂንቲ ቦላ ዋዲያ ዋዴ ሂንቲ ዋልቃን ኩማና። ያኒ ሲሚዲ፣ ዩሩሳሌምን፣ ዪሁዳ ቢታ ኡባን፣ ሳማሬኒኔ ሳባ ጋፃ ጋካናው ታው ማርካታ ጊዳና» ያገሰ።

⁹ ሄሳ ጊዳይሳፌ ጉዬ ኤንቲ ያሊሺን፣ ቶቁ ቶቁ ጊዲ፣ ሳሉዋ ቢን ሻራይካ ኢያ ኤንታ ኣይፊያፔ ጌንፋሰ።

¹⁰ ዩሱሲ ቢያ ዋዴ ኤንቲ ሳሎ ቲሺ ኦሊዲ ያሊሺን፣ ቦላ ማፃ ማዒዳ ናምቡ ኣሳቲ ኣኬኮና ኤንታ ማታን ኤቂዲ፣¹¹ «ጋሊላ ኣሳው፣ ሳሎ ያሊሺ፣ ሂንቲ ኣይሰ ኤቂዳቲ? ሃ ሂንቲ ቤዒሺን ሳሎ ቢዳ ዩሱሲ ሄሳዳካ ሲሚዲ ያና» ያገደሶና።

ዪሁዳ ቤሳን ማቲያሲ ዶሬቲሰ
(ማቶ 27:3-10)

¹² ሄሳፌ ጉዬ፣ ሃዋሪቲ ሻማሆ ዴሪያፔ ዩሩሳሌም ሲሚደሶና። ሻማሆ ዴሬይ ዩሩሳሌምሰ ማታን ዴዔሰ።¹³ ኤንቲ ዩሩሳሌም ጌሊዲ፣ ባንታ ዴዒያ ቤሳ ፖቂያ ቦላ ኬዪደሶና። ኤንቲካ፡

1:1-2 ሉቃ 1:1-4 1:4 ሉቃ 24:49 1:5 ማቶ 3:11፤ ማር 1:8፤ ሉቃ 3:16፤ ዮሃ 1:33 1:8 ማቶ 28:19፤ ማር 16:15፤ ሉቃ 24:47-48 1:9 ማር 16:19፤ ሉቃ 24:50-51

ጳጳሮች፣ የሃኒሳ፣ ያይቆባ፣ ኢንዲሪያሳ፣ ፊልጶስ፣ ቶማሳ፣ ባርቶሎሚዮሳ፣ ማቶሳ፣ ኢልግሎስ ናባ ያይቆባ፣ ባ ቢታሰ ሚሼቲያ ሲሞናኔ ያይቆባ ናባ ዩሁዳ። 14 ሃይሳቲ ኡባይ ማጫሳታራ፣ ዩሱሳ ኣዬ ማይራሚራኔ ዩሱሳ ኢሻታራ ኡባይ ኢሲ ዋዛናን ጊዲዲ ሚንሲዲ ዋሶሶና።

15 ሄ ዋዴ ጳጳሮሲ ጭታኔ ላታማ ጊዲያ ኣማኒያ ኣሳይ ሸቂዳ ቤሳን ዴንዲ ኤቂዲ፣ ሃይሳዳ ያገሰ። 16 «ኣሳው፣ ዩሱሳ ኦይኪዳይሳታ ካሌሊዳ ዩሁዳባ ጌሻ ኣያናይ ካሴ ዳዊቲ ዶናን ኦዲዳ ያሳ ቃላይ ፖሌታናው ቤሴሰ። 17 ዩሁዲ ኑራ ኢሲፊ ሃ ኦሎዋ ኦላናው ዶሬቲዳ ኣሲ።»

18 ሺን ዩሁዲ ባ ኢታ ኦሎዋን ዳሚዳ ሚሼን ጋዴ ሻሚሰ። ኢ ጉፋኒዲ ኩንዲን፣ ኢያ ኡሎይ ዳኬቲሰ፤ ኢያ ማራጩይ ኡባይ ካሬ ኬዩሰ። 19 ዩሁዳ ቦላ ሃኒዳባ ዩሩሳላሚን ዳዲያ ኣሳ ኡባይ ሲባሰ። ሄሳ ጊሾ፣ ሄ ጋዲያ ባንታ ቃላን ኣኬልዳማ (ሱላ ጋዴ) ጊዲ ጭጊዶሶና።

20 «ሄሲካ ማዝሙራ ማፃፋን፣
ኣኢያ ኬላይ ካሎ ኣቶ፤
ኦኒካ ኢያን ዳፖ።

ቃሲ ኢያ ሹማቴላ ሃሪ ኤኮ፣ ጌቴቲ ፃፊቲሰ።

21 «ሄሳ ጊሾ፣ ጎዳ ዩሱሲ ኑ ጊዶን ሲማሬቲዳ ዋዴ ኡባን ኑራ ዴዔይሳታ፣ 22 ቃሲ ፃማቂያ የሃኒሳ ዋዲያ፣ ዶሚዲ ጎዳ ዩሱሲ ሳሎ ቢዳ ጋላሰ ጋካናው ኑራ ዴዔይሳታ፣ ኢሲ ኣሲ ኢያ ዴንዲዋሰ ኑራ ማርካ ጊዳናው ቤሴሰ» ያገሰ።

23 ሄሳ ጊሾ፣ ኣሳይ ዶሩዋሰ የሰያሳ ጊያ ባርሳባሳ ጌቴቲያ የሱፋኔ ማቲያሳ ናምባ ሺሺዶሶና። 24 ሄሳፊ ጉዬ፣ ያሳ ዋሲሼ፣ «ኣሳ ኡባ ዋዛና ኤሪያ ጎዳው፣ ሃ ናምባታ፣ ኔ ኦና ዶሪዳኮ ኦና ቤሳ። 25 ዩሁዲ ባ ቤሳ ቢዲ፣ ኣጊዳ ኦሎዋኔ ሃዋሪቴላ ኦሎዋ ኤካና ሜላ ሃይሳታ፣ ኩሰ ቆንጫሳ» ያገሰ። 26 ኤንታ ቦላ ሳማ ዩጊዶሶና፣ ሳማይ ማቲያሳ ቦላ ዋዲን ማቲያሲ ታማኔ ኢሲ ሃዋሪታ ቦላ ጉዡቲሰ።

2

ጌሻ ኣያና ዩሳ

1:13 ማቶ 10:2-4፤ ማር 3:16-19፤ ሉቃ 6:14-16 1:20 ማዝ 69:25፤
109:8 1:22 ማቶ 3:16፤ ማር 1:9፤ ሉቃ 3:21

1 ጳውሎስ ገና ጋላሳይ ጋኪዳ ወደ አማኒያ አሳ ኡባይ ኢሲፌ ኢሲ ቤሳን ሸቀዱ ዳዎሶና። 2 ቆፖና ወልቃማ ጎቴዳ ጉሚያ ጉንሳይ አኩኮና ሳሎፔ ዩዲ ኤንቲ ዳዲያ ኩላ ኩሚሰ። 3 ቃሲ ታማ ለጮ ዳኒያ አንግርሳቲ ኤንታው ቤንቲሼ፣ ሻኬቲ ሻኬቲ ኤንታ ኡባ ቦላ ወዲደሶና። 4 ኤንቲ ኡባይ ጌሻ አያናን ኩሚዲ ዲማ ዲማ ደናን ኦዴታና ሜላ ጌሻ አያናይ ኤንታ ዳንዳዲሲን ሃሳያ ደሚደሶና።

5 ሄ ወደ ቢታ ኡባፌ ዩዲ ያሳ ያያ አይሁዴቲ ዩሩሳላሜን ዳዎሶና። 6 ሄ ጉንላ ሲዲዳ ወደ ዳር አሳይ ሸቀደሶና። አማኒያ አሳይ ኤንታ ቃላን ኦዴቲሽን ሲዲዳ ጊሾ 7 ማላሌቲዲ፣ «ሃ ኦዴቲያ አሳ ኡባይ ጋሊላ አሴ ጊደኮናዬ? 8 ያቲን፣ ኮኒ፣ ኦ ዩሌቲዳ ቢታ ደናን ኤንቲ ኦዴቲሽን ዋኒዲ ሲዳናው ዳንዳዲደ? 9 ኮኒ ጳርጫን፣ ሜደናን፣ ኤላሜን፣ ናምቡ ሻፋታፔ ጊደን ዳዴይሳቲ፣ ዩሁዳን፣ ቃጳደቂያን፣ ጳንዮሳን፣ ኢሲያን፣ 10 ጸርገን፣ ጸንፊሌን፣ ጊብጫን፣ ቃሬና ማታን ዳዲያ ሊቢያን ዳዴይሳታ። ኩፔ ባጋቲካ ሮሜፔ ዩዲ አሳታ። 11 አይሁዴቲኔ አይሁዴቲላ አማኖ ጌሊዳ አሳቲ፣ ቃርጻሳኔ አራቤ አሳቲ፣ ያሳይ ኦሊዳ ጊታ ኦሱዋ ኦ ቃላን ኦዴቲሽን ሲደሰ» ያጊደሶና። 12 ኡባይ ማላሌቲዲ፣ ጋናባ ጳዩዲ ዋሊኮ፣ «ላ ሃይሲ አይ ጉሴ?» ያጊደሶና። 13 ሺን ሃራቲ፣ «ሃይሳቲ ኡዩዲ ማሳቲደሶና» ያጊዲ ቄልቂሲደሶና።

ጳውሎስ ሃሳያ

14 ሺን ጳውሎስ፣ ታማኔ ኢሲ ሃዋሬታራ ዳንዲ ኤቂዲ፣ ባ ቃላ ጳቄ ኦሊዲ፣ ኤንታው ሃይሳዳ ያጊዲ ኦዲሰ፣ «አይሁዴቶ፣ ዩሩሳላሜን ዳዲያ ኡባቶ፣ ታኒ ኦዴይሳ ሲዲቲ። 15 ዋንታፌ ሄኸ ሳቲ ጊዲያ ጊሾ ሂንቲ ቆፔይሳዳ ሃ አሳቲ ማሳቲቦኮና፤ ሄሲ ሂንቲው ኤሬቶ። 16 ሺን ሃይሲ ሃኒዳይ ናቢያ አዩዩሊ ኦዲዳይሲ ፖሌታና ማላሳ።

17 « ሳሳይ፣ ወርሴላን ሃይሳዳ ሃናና ያጌሰ፣ ታኒ አሳ ኡባ ቦላ ታ አያና ጉሳና። ሂንቲ አዳ ናይቲኔ ማጫ ናይቲ፣ ቲንቢቲ ኦዳና። ሂንቲ ያላጋቲ ቆንጩላ ቤዳና፤ ሂንቲ ጨማቲ አሙሆ አሙሃና። 18 ሄ ጋላሳታን ታና አማኒያ አዳ አይሌታ ቦላኔ ማጫ አይሌታ ቦላ

ታኒ ታ ኣያና ጉሳና፤
ኤንቲ ቲንቢቲ ኦዳና።

19 ቃሲ ታኒ ቦላ ሳሉዋን ኦራፋባ፤
ጋርሳ ሳዓንካ ማላ ቤሳና።

ሱሉ፥ ታሚኔ ዋልቃማ ጨጋኒ ቤንታና።
20 ጊታኔ ቦንቾ ጊዲዳ ጎዳ ጋላሳይ

ጋካናፔ ሲንሌ ኣዋይ ቋማና፤
ኣጌናይካ ሱሉ ዳናና።

21 ሄ ዋዴ ሄሳዳ ሃናና፤
ጎዳ ሱንላ ዌጊያ ኦኒካ ኣታና ያጊሰ።

22 «ኢሰራዔል ኣሳው፥ ሃ ቃላ ሲዒቲ። ናዚሬቴ ዩሱሳ ኦናቴላይ፥ ያሳይ ሂንቴ ጊደን ኦሊዳ ዋልቃማ ኦሱዋኒኔ ማላታታን ሂንቴው ቆንጮይሳ ሂንቴ፥ ሂንቴ ሁዒን ኤሬታ። 23 ያሳ ካሴ ኤራኒኔ ኢያ ሹኒያን ዩሱሲ ሂንቴው ኣቋ ኢሚቲሰ። ሂንቴ ኢያ ናጋራንቾቲ ማሰቃሊያ ቦላ ካቂዲ ዋቋና ማላ ኣሉ ኢሚዴታ።

24 ሹን ያሳይ ሃይቆ ዋልቃ ዲጊዲ ኢያ ዴንሉሰ። ሄሳ ጊሾ፥ ሃይቆይ ኢያ ኦይካናው ዳንዳዒቤና። 25 ዳዊቴይ ኢያባ ኦዲሹ፥ ታኒ ያርኮና ማላ፥

ጎዳይ ታ ኡሻቻን ዴዔሰ።
ጎዳ ኡባ ዋዴ ታ ማታን ቤዓይሰ።

26 ሄሳ ጊሾ፥ ታ ዋዛናይ ኡፋይቲሰ፤
ታ ኢንፃርሳን ኡፋይሲ ኩሚሰ፤
ሃይቂያ ታ ኣሳቴላይ ኡፋይሳን ዳና።

27 ኣይሰ ጊኮ፥ ታ ሹምፑዋ ሲያሌን ኣጋካ።
ቃሲ ኔ ጌሻ ናዓ ኣሃ ዋቂሳካ።

28 ኔኒ ታና ዴያ ኦጊያ ኤሪሳዳሳ።
ኔኒ ታራ ዴዔይሳን ታ ኡፋይሳይ ኩሚላ ጊዴሰ) ያጊሰ።

29 «ኣሳው፥ ኦ ኣዋ ዳዊቴባ ታ ሂንቴው ጌሻዳ ኦዳና። ዳዊቴይ ሃይቂዲ ሞጌቲሰ፤ ኢያ ዲፎይ ሃቺ ጋካናው ኦ ማታን ዴዔሰ።

30 ዳዊቴይ ናቤ ጊዲዳ ጊሾ ያሳይ ኢያ ሹሻፔ ኢሱዋ ኢያ ካዋቴላ ኣራታ ቦላ ኡቲሳናው ኢያው ጫቂዳ ጫቁዋ ኤሬሰ።

31 ሄሳ ጊሾ፥ ኪሪሰቶሳ ዴንዲዋ ሲንሌ ዌሊዲ፥ ሲያ ሹምፑይ ሲያሌን ኣቲቤና፤ ኢያ ኣሳቴላይካ ዋቂቤናን ጊዲ ኦዲሰ።

2:23 ማቶ 27:35፤ ማር 15:24፤ ሉቃ 23:33፤ ዮሃ 19:18 2:24 ማቶ 28:5-6፤ ማር 16:6፤ ሉቃ 24:5 2:28 ማዝ 16:8-1 2:30 ማዝ 132:11፤ 2ሳሙ 7:12-13

32 «ጾሳይ፣ ሃ ዩሱሳ ሃይቁዋፔ ዴንሊዳይሳስ ኑኒ ኡባይ ማርካ። 33 ሄሳ ጊሾ፣ ጾሳይ ባራ ሃራና ማላ ባፔ ኡሻቻ ባጋራ ኢያ ጶቁ ጶቁ ኦሊዲ፣ ኢያው ኢማና ጌቴቴዳ ጌሻ ኣያና ኤኪዲ፣ ሃይሳ ሂንቴ ሃዲ ቤዔይሳኔ ሲዔይሳ ኑ ቦላ ጉሲስ። 34-35 ጋሶይካ፣ ዳዊቴይ ባ ሁዔን ሳሎ ቢቤናሺን ያጊሰ።

ሳዳይ፣ ታ ጎዳ፣ «ታኒ ኔ ሞርኬታ ኔ ቶሆይ ዩዲያሶ ኦላና ጋካናው ሃይሳን ታፔ ኡሻቻ ባጋን ኡታ» ጊሰ። ያጊሰ።

36 «ሄሳ ጊሾ፣ ሃ ሂንቴ ማስቃሊያ ቦላ ካቁዳ ዩሱሳ፣ ጾሳይ ጎዳኔ ኪሪስቶሳ ኦሊዳይሳ ኢሲራዔሌ ኣሳ ኡባይ ቱማ ኤሮ» ያጊሰ።

37 ኣሳይ ጳዒሮሲ ጊዳይሳ ሲዒዳ ዎዴ ባንታ ዎዛናን ቦሽቴዲ ጳዒሮሳኔ ሃንኮ ሃዋሬታኮ፣ «ኢሻቶ፣ ያቴን ኑኒ ኣይ ኦሊኖ?» ያጊደሶና።

38 ጳዒሮሲ ኤንታኮ፣ «ሂንቴ ናጋራይ ኣቶ ጌቴታና ማላ ናጋራፔ ሲሚዲ፣ ሂንቴ ኢሶይ ኢሶይ ዩሱሰ ኪሪስቶሳ ሱንላን ፃማቄቴቴ። ጾሳይ ኢማያ ጌሻ ኣያና ሂንቴ ኤካና። 39 ጋሶይካ ጾሳይ ኢማና ጊዳ ኡፋይሳ ቃላይ ሂንቴስ፣ ሂንቴ ናይታሲኔ ጎዳይ ኑ ጾሳይ ባኮ ጃጊያ ሃሆን ዴዒያ ኡባሳ» ያጊሰ።

40 ጳዒሮሲ ኤንታው ሃራ ቃላካ ጉጂ ማርካቴዲ፣ «ሃ ዎዲያ ጌላ ኣሳ ቦላ ያናው ዴዒያ ፐርዳፌ ሂንቴ ሁዒያ ኣሸቴ» ያጊዲ ዘሪስ። 41 ጳዒሮሲ ኦዲዳይሳ ኤኪዳይሳቴ ፃማቄቴደሶና። ሄ ጋላስ ሄቡ ሙኩሉ ጊዲያ ኣሳይ ኣማኒደሶና። 42 ኤንቴ ሃዋሬታ ቲሚርቴያን፣ ኢሲፌቴላን፣ ኡይላ ሙሳኒኔ ጾሳ ዎሳን ሚኖሶና።

ኣማኒያ ኣሳ ኢሲፌቴላ ዴዑዋ

43 ሃዋሬታ ኩሼን ዳሮ ኦራላባይኔ ማላቴ ኦሴቴያ ጊሾ ኣሳ ኡባይ ያዩደሶና። 44 ኣማኒዳ ኡባይ ኢሲፌ ዴደሶና፤ ባንታው ዴዒያባ ኡባ ኢሲፌ ሻኬቶሶና። 45 ኤንቴ ባንታው ዴዒያባ ባይዚዲ ማሺያ ኢሱዋስ ኢሱዋስ ኮሺዳ ማላ ሻኮሶና። 46 ኡባ ጋላስ ኢሲ ዎዛናን ጊዲዲ ጾሳ ኬላን ሺቆሶና። ባንታ ኬላን ኢሶይ ኢሱዋ ጃጊዲ ኡፋይሳኒኔ ኣሸኬ ዎዛናን ካላ ሞሶና። 47 ጾሳ ጋላቴሼ ኣሳ ኡባን ሳቤቴደሶና። ጎዳይ ኣቴይሳታ ጋላስ ጋላስ ኤንታ ቦላ ጉጂስ።

3

ዋቤ አዳይ ፓዲስ

1 ኢሲ ጋላስ ጳጳርሲኔ የሃኒሲ ያሳ ዋሳናው ኡዲፋን ሳቴን ያሳ ኬላ ቢደሶና። 2 ዩሌቶሶፔ ደሚዲ ዋቤ ገዲዳ ኢሲ አዳይ ያሳ ኬላ ጌሊያ አሳፔ ሚሼ ዋሳና ማላ ኡባ ዋዴ ሎጾ ገያ ያሳ ኬላ ፔንገያን ኤሂዲ ዋሶሶና። 3 ሄ ዋቤ አዳይ ጳጳርሲኔ የሃኒሲ ያሳ ኬላ ጌላና ሃኒሺን በዒዲ ኤንታ ሚሼ ዋሲስ።

4 ኤንቲካ ኢያ ጫዲ ያሊዲ፣ «ኑኮ ሃ ያላ» ያገደሶና። 5 ዋቤ አዳይ ኤንታፊ አይኮ ኤካና ዳኒን ኤንታኮ ያሊስ። 6 ሺን ጳጳርሲ ኢያኮ፣ «ታው ሚሼይ ባዋ፣ ሺን ታው ዳዒያባ ታኒ ኔው አማና። ናዚሬቴ ዩሱስ ኪሪስቶሳ ሱንሳን ዳንዳዳ ሃሙታ» ያገሰ።

7 ሃሳፊ ጉዬ፣ ዋቤ አዲያ ኡቫቻ ኩሺያ ኦይኪዲ ዳንሊስ። ኤሌሲዲ ኢያ ቶሆይኔ ቁንጫፊሌይ ሚኒ አገሰ። 8 አዳይ ጉፒዲ ዳንዲ ኦቁስ። ጌዴኔ ሃ ሃሙላ ደሚስ። ሃሳፊ ጉዬ፣ ሃሙቲሼ፣ ጉፒሼኔ ያሳ ጋላቲሼ ኤንታራ ኢሲፊ ያሳ ኬላ ጌሊስ።

9 ኢ ሃሙቲሺኒኔ ያሳ ጋላቲሺን አሳ ኡባይ ኢያ በዒደሶና። 10 በዒዳ ኡባይ ሚሼ ዋሳናው ሎጾ ገያ ያሳ ኬላ ፔንገን ኡቲዳይሲ ኢያ ገዲዳይሳ ኤሪደሶና፤ ኢ ሃኒዳባ በዒዲ ማላሌቲደሶና።

ጳጳርሲ ያሳ ኬላን ሃሳዱዳ ሃሳያ

11 አዳይ ጳጳርሳፔኔ የሃኒሳፔ ዱዲኬ ገዲ ኦይኪዲ ዳዒሺን አሳ ኡባይ ማላሌቲዲ፣ ሶሎሞኔ ባራንዳ ገያሶን ኢሲፊ ኤንታኮ ዋዲደሶና። 12 ጳጳርሲ አሳ በዒዳ ዋዴ አሳኮ፣ «ኢሰራዔል አሳው፣ አይስ ሃይሳን ማላሌቲቲ? ዋይኮ አይስ ኑና ጫዲ ያሌቲ? ኑኒ ኑ ዋልቃን ዋይኮ ኑ ያሎቲሳን ሃ አዲያ ሃሙላዳባ ሂንቲው ዳኒ? 13 አብራሃማ፣ ዩሳቃ፣ ያይቆባ ያሳይ፣ ኑ አዋታ ያሳይ፣ ባ ናዓ ዩሱሳ ቦንቺስ። ሺን ሂንቲ ሃይቆስ አላ አሚዳይሳ ጲላጾሲ በላናው ኮዩንካ ሂንቲ ኢያ ሲንሳን፣ ሉኒ ኢያ ኤርኮ» ያገደታ። 14 ሂንቲ ጌሻኔ ያሉዋ፣ ሉኒ ኢያ ኤርኮ» ገዲ፣ ሼሞፖ ዋዲዳይሳ ሂንቲው በላና ማላ ጲላጾሳ ዋሲዳታ። 15 ዴዐዋ አሚዳይሳ ሂንቲ ዋዲዳታ፣ ሺን ያሳይ ሃይቆፔ ኢያ ዳንሊስ። ሃሳስ ኑኒ ማርካ። 16 ሃ ሂንቲ በዔይሲኔ ኤሪያ አዳይ ፓዲዲ ሚኒዳይ ዩሱሳ ሱንሳን አማኒዳይሳና። ሃ ሂንቲ ኡባ ሲንሳን ኢያ ሃይሳዳ ፓሊዳይ ኢ ዩሱሳ አማኒዳ ገሾሳ።

3:13 ኬሳ 3:15 3:14 ማቶ 27:15-23፤ ማር 15:6-14፤ ሉቃ 23:13-23፤ የሃ 19:12-15

17 «ሃዲካ ታ አሻቶ፣ ሂንቴካ ሂንቴና ካሌሌይሳታዳ፣ ኤሮና ኦሊዳይሳ ታኒ ኤራይሰ። 18 ሺን ያሳይ ቤኒ ናቤታ ኡባ ደናን፣ ስራሰቶሲ ዋዬ ኤካናው ቤሴሰ) ያገዳይሲ ሃይሳዳ ፖሌታና ሜላ አሊሰ። 19 ሂዛ፣ ያሳይ ሂንቴ ናጋራ አቶ ጋና ሜላ ጎዳኮ ሲሚቱ። 20 ጎዳ ማታፔ ሚንሌሉ ዋዴይ ሂንቴው ያና። ያሳይ ከራሰቶሳ ገዳና ሜላ ስንገጥሞ ደሪዳ ዬሱሳ ሂንቴው ዬዳና። 21 ያሳይ ባ ጌሻ ናቤታ ደናን ቤኒ ኦሊዳይሳ ሜላ ኡባባይ ኦራዲያ ዋዴይ ጋካናው ዬሱሲ ሳሎን ጋምዳናው ቤሴሰ። 22 ሙሴይ፣ ጎዳ ያሳይ ታና ዳንሊዳይሳ ሜላ ሂንቴ ገደፌ ሂንቴው ናቤ ዳንገገ። ሂንቴ ኢ ጌይሳ ኡባ ሲዲቱ። 23 ሄ ናቤይ ኦዴይሳ ሲዮና አሲ ኦኒካ አሳ ገደፌ ሻኬቲዲ ቆየ» ያገሰ።

24 «ቃሲ ሳሙዴላፔ ደሚዲ ዴዲያ ናቤቱ ኡባይ ሃ ዋዲያባ አዲደሶና። 25 ሂንቴ ናቤታ ናይታ፤ ቃሲ ያሳይ አብራሃሜሰ፣ ሳዓን ዴዲያ አሳ ኡባ ታኒ ኔ ሸሻ ባጋራ አንጅና) ያገዲ ኑ አዋታሰ ጌሊዳ ቃላ ላቲያ ናይታ። 26 ያሳይ ሂንቴና ኡባ ሂንቴ ኢታ ኦጊያፔ ዛሪዲ አንጅና ሜላ ባ ናዓ ዳንሊዲ ሂንቴው ኮይር ዬዲሰ» ያገሰ።

4

ጳዳርሲኔ ዮሃንሲ አይሁዳ ሻንጎ ሲንገን

1 ጳዳርሲኔ ዮሃንሲ አሳሰ አዲሺን ካሂኔ ሃላቃቱ፣ ያሳ ኬላ ናጌይሳታ ሃላቃይኔ ሳዲቃዋቲ ኤንታኮ ዩደሶና። 2 ኤንቲ ዬሱሲ ሃይቆፔ ዳንደይሳኔ ኢያ ጋሶን ሃይቆፔ ዳንደይ ዴዲይሳ አሳ ታማርሲዳ ጊሾ ዩሎቲደሶና። 3 ሄሳ ጊሾ፣ ኤንታ ኦይኪዲ ሳዓይ ኦማርሲዳ ጊሾ ዋንታና ጋካናው ቃሾ ኬሊ ጌልሲደሶና። 4 ሺን ቃላ ሲዲዳይሳታፔ ዳርቲ አማኒደሶና። አማኒዳ አዴ አሳ ታይቦይ ኢቻሹ ሙኩሉኮ ቢሰ።

5 ዋንቴላ ጋላሰ ዴሪያ ሃራይሳቲ፣ ጨማቲኔ፣ ሂጌ አሰታማሬቲ ዬሩሳላሜን ሸቁደሶና። 6 ሄ አሳ ገደን ካሂኔ ሃላቃይ ሃኒ፣ ቃያፊ፣ ዮሃንሲ፣ ኢስኪንዲሬይኔ ካሂኔ ሃላቃ ሶ አሳቲ ኡባይ ዴደሶና። 7 ሃዋራታ ባንታ ሲንገን ኤሲዲ፣ «አይቤ ዋልቃን ዋይኮ ኦዴ ስንገን ሃይሳ ሂንቴ አሊዳቲ?» ያገዲ አይቺደሶና።

8 ሄ ዋዴ ጳዳርሲ ጌሻ አያናን ኩሚዲ፣ «ዴሪያ ሃራይሳቶ፣ ጨማቶ፣ 9 ሃቺ ሃ ዋቤ አዲያሰ ኦሴቲዳ ሎዎ ኦሱዋሲኔ ኢ ዋኒዲ ፓዲዳኮ ሂንቴ ኑና አይቺኮ፣ 10 ማሰቃሊያ ቦላ ሂንቴ

ካቁን፣ ያሳይ ሃይቆፔ ዳንሊዳ ናዚሬቴ ዬሱስ ከሪስቶሳ ሱንላን ሃ አዳይ ፓዲሲ ሂንቴ ሱንላን ኤቁዳይሲ ሂንቴወኔ ኢስሪዔሌ አሳ ኡባስ ኤሬቶ።

11 ለምቤይሳቲ ቦሪዲ ኢዲዳ ሹቻይ፣

ጎዳ ፃጹዋ ሚንሊያ፣

ኡባሬ አዲያ ሹቹ ገዲሰ፤

ሄ ሹቻይ ዬሱሳ።)

12 ሄሳ ገሾ፣ አቶቴሊ ኢያ ባጋራፔ አቲን ሃራ ኦዴ ባጋራካ ባዋ። ኩኒ ኢያ ሱንላን አታና ሜላ አሳ ኡባስ ያሳይ ሳሎፔ ጋርሳን አሚዳ ሃራ ሱንሊ ባዋ» ያገሰ።

13 ሺቁዳ አሳይ ጳዊርሲኔ ዮሃንሲ ሚኒዳ ሚኖቴላ ቤዒዳ ዋዴ ኤንቲ ታማሪና ጮ አሲ ገዲዳይሳ አክኪዲ ማላሌቲዶሶና፤ ኤንቲ ዬሱሳሪ ዴዔይሳ ኤሪዶሶና። 14 ቃሲ ፓዲዳ አዳይ ጳዊርሳሪኔ ዮሃንሳሪ ኤቁዳይሳ አሳይ ቤዒዲ ገያባ ቆዶዶሶና።

15 ሺን ጳዊርሳኔ ዮሃንሳ ካሬ ኬያና ሜላ አሊዲ ባንታ ገደን፣

16 «ሃ አሳታ ኑ አይ አሊና? ኤንታ ኩሽን ኦሴቲዳ ገታ ማላታይ ዬሩሳላሜን ዴዒያ ኡባስ ቤንቴሰ። ኩኒ ሄሳ ኤርኮ ጋናው ዳንዳዎኮ። 17 ሺን ሃ ኦዳይ አሳ ገደን ላሌቶና ሜላ ሂዛፔ ጉዬ ሃ አሳቲ ዬሱሳ ሱንላን ኦዴሰካ ኦዶና ሜላ ሚንሊዲ ናገሳና» ያገዲ ዘሬቲዶሶና።

18 ኤንታ ያገዲ፣ ዬሱሳ ሱንላን ሂዛፔ ኦዶና ሜላ ዋይኮ ታማርሶና ሜላ ከቲዶሶና። 19 ሺን ጳዊርሲኔ ዮሃንሲ ኤንታኮ ዘሪዲ፣ «ዎሳስ ከቲታናይሳሬኔ ሂንቴው ከቲታናይሳሬ ዎሳ ሱንላን አዉሲ ሎዎኮ እኔ ሂንቴ ፒርዲቴ። 20 ኩኒ ቤዒዳባኔ ሲዒዳባ ኦዶና አጋናው ዳንዳዎኮ» ያገደሶና።

21 ቢታ ጨማቲኔ ዴሪያ ሃሬይሳቲ ካሴፔ ሚንሊ ናገሲዲ ኤንታ ዬዲ አገደሶና። አሳይ ሃኒዳባስ ዎሳ ጋላቲያ ገሾ ኤንታ ሴራናው ዳንዳዒቦኮና። 22 ሄ ማላታን ሃርገያሬ ፓሊዳ አዲያስ ላይላይ ኦይታማፔ አዲሰ።

አማኒያ አሳ ዋሳ

23 ጳዊርሲኔ ዮሃንሲ ቢርሼቲዲ ባንታ ዳቦታኮ ቢዲ፣ ካሂኔ ሃላቃቲኔ ጨማቲ ባንታኮ ገዳባ ኡባ ኤንታው አዲዶሶና።

24 ኤንቲ ሄሳ ሲዒዳ ዋዴ ኢሲ ዋዛናን ገዲዲ ዎሳ ሃይሳዳ ያገዲ ዋሲዶሶና፣ «ኡባ ሃሪያ ጎዳው፣ ሳሉዋ፣ ሳዓ፣ አባኔ ኤንታ ገደን ዴዒያ ኡባባ ሜዲዳይሶ። 25 ኔኒ ኔ አይሊያ፣ ኑ አዋ ዳዊቲ ዶናን ገሻ አያናን።

«ዳሬይ አይስ ዩሎቲዶና?
አሳይ አይስ ጮ ማቄቲዶና?

26 ሳዓ ካዎቲኔ

ዳሪያ ሃሬይሳቲ አሲፌ ጎዳ ቦላኔ
ኪሪሰቶሳ ቦላ ዳንዲዶሶና ያጋዳሳ።

27 «ቲማካ፣ ሄሮዲሲኔ ጳጳስ ጳጳስ አይሁዳ ጊዶና አሳራኔ
አሲራዔሌ አሳራ ኔ ዶሪዳ ኔ ጌሻ ናዓ ዩሱሳ ቦላ ዳንዳናው
ሃ ካታማን ሸቀዶሶና። 28 ቃሲ ኔኔ ኔ ዎልቃኔ ኔ ሸኒያን
ኦላና ጋዳ ቆጋ ኡቲዳባ ኡባ ፖሊዶሶና። 29 ሃዒካ ጎዳው፣ ኤንታ
ማንዴሳ ቤዓ፤ ኑኔ ኔ አይሌቲ ኔ ቃላ ኩሜላ ዎዘናን ኦዳና
ሜላ ኑና ዳንዳዒሳ። 30 ኔ ጌሻ ናዓ ዩሱሳ ሱንላን ሃርጋንቸታ
ፓላናው፣ ኦራላባይኔ ማላታቲ ኦሴታና ሜላ ኔ ኩሺያ ሚጫ»
ጊዲ ዎሲዶሶና።

31 ኤንቲ ያሳ ዎሲዳፔ ጉዬ ሄ ኤንቲ ሸቀዳሶይ ቃዒስ። ኤንታ
ኡባን ጌሻ አያኒ ኩሚን ያሳ ቃላ ሚኖቴላን ኦዲዶሶና።

ኮይሮ አማኒዳ አሳ አሲፌቴላ

32 አማኔይሳቲ ኡባይ ቆፋኔኔ ዎዘናን አሲኖ ጊዲዶሶና። ኤንቲ
ባንታው ዳዒያባ ታባ ጎናሽን አሲፌ ሻኬቶሶና። 33 ሃዋርቲ ጎዳ
ዩሱሲ ሃይቆፔ ዳንዲዳይሳ ጌታ ዎልቃን ማርካቶሶና። ያሳይ
ኤንታ ኡባስ አቶ ኬሃቴላ ዳርሲዲ አሚስ። 34 ቢቲ ዎይኮ ኬላ
ዳዒይሳቲ ኡባይ ባይዚ ኤኪዳ ሚሺያ ኤሄያ ጊሾ አማኔይሳታ
ጊዶን ሜቶታንቸይ አሶይካ ባዎ። 35 ሚሺያ ኤሂዲ ሃዋሪታስ
አዎሶና፤ ሄ ሚሺያ ኢሱዋስ ኢሱዋስ ኮሼይሳዳ ሻኪ ሻኪ
አሚስ።

36 ቆጲሮሳ ጊያ ቤሳን ዩሌቲዳ ዮሴፋ ጊያ ለዌ ሸሻፔ
ጊዲዳ አሶይ ዳዒስ። ኢያ ሱንላ ሃዋሪቲ ባርናባሳ (ሚንጭሶ
ናዓ) ጊዶሶና። 37 ባርናባሲ ባው ዳዒያ ቢታ ባይዚዲ ሚሺያ
ኤሂዲ ሃዋሪታስ አሚስ።

5

ሃናኒያኔ ኢያ ማቸው ሳጲሮ

1 ኢሲ ሃናኒያ ጊያ አዳይ ባ ማቸ ሳጲሪራ ጋዴ ባይዚስ።
2 ሄ ባይዚዳ ሚሺያፔ ባ ማቸያ ኤሪሽን ባጋ አሺዲ፣ ኦቲዳይሳ
ኤሂዲ ሃዋሪታስ አሚስ።

4:25 ማዝ 2:1-2 4:27 ማቶ 27:1-2፤ ማር 15:1፤ ሉቃ 23:1፤ 7-11፤ ዮሃ
18:28-29 4:32 ሃ.ኦ 2:44-45

3 ሺን ጳጳርሲ ሃናኒያኮ፡ «ኔኒ ገሻ ኣያና ጨማና ማላኔ ጋዲያ ባይዚዳ ሚሺያፕ ሻካዳ ኣሻና ማላ ፃላሂይ ኔ ዎዛናን ኣይሰ ጌሊዳ? 4 ኔኒ ባይዛናፕ ካሴ ጋዳይ ኔባ ጊዳኔዬ? ቃሲ ኔኒ ባይዛ ሲሚንካ ሚሺይ ኔባ ጊዳኔዬ? ያተን፡ ሄሳ ማላባ ኦላናው ኣይሰ ኔ ዎዛናን ቆፓዲ? ኔኒ ያሳ ቦላ ዎርዶታዳሳፕ ኣተን ኣሳ ቦላ ዎርዶታባካ» ያጊሰ።

5 ሃናኔይ ሄ ቃላ ሲዒዳ ማላ ኩንዲዲ ሃይቂሰ፤ ሄሳ ሲዒዳ ኡባይ ዳር ያዩሰ። 6 ናዓቴላ ኣሳቲ ሶ ጌሊዲ ኢያ ኣሃ ፃዲዲ ኤፊዲ ሞጊደሶና።

7 ሃቭ ሳቲፕ ጉዬ ሃናኒያ ማቺያ ሄሳ ኤርና ዳዓሺ ጳጳርሲ ዳዒያሱዎ ጌላሱ። 8 ጳጳርሲ ኢኮ፡ «ሂንቴ ጋዲያ ሃይሳ ማላ ሚሺሰ ባይዚዳቲ? ኣኔ ታው ኦዳ» ያጊሰ።

ኢያካ፡ «ኤ፡ ሃይሳ ማላ ሚሺሰ ባይዚዳ» ያጋሱ።

9 ጳጳርሲ ማጨሲው፡ «ኔራኔ ኔ ኣዚናራ ጎዳ ኣያና ፓጫናው ኣይሰ ዘሬቲዳቲ? ሄኮ፡ ኔ ኣዚና ሞጊዳ ኣሳቲ ካሬን ዳዖሶና፤ ኔናካ ኤንቲ ካሬ ኬሳና» ያጊሰ።

10 ማጨሲያ ኢራካ ጳጳርሳ ቶሁዎ ማታን ኩንዳዳ ሃይቃ ኣጋሱ፤ ናዓቴላቲ ጌሊያ ዎዳ ሃይቂዳር ዳሚዲ ካሬ ኬሲዲ፡ ኢ ኣዚና ማታን ሞጊደሶና። 11 ኩሜላ ዎሳ ኬላይኔ ሄሳ ሲዒዳ ሃራ ኣሳ ኡባይ ዳር ያዩደሶና።

ኦራሳባታኔ ማላሊሲያባታ

12 ሃዋሬቲ ዳር ማላታታኔ ኦራሳባታ ኣሳ ጊደን ኦሶሶና። ኣማኒያ ኡባይ ሶሎሞኔ ባራንዳን ኢሲፌ ሺቆሶና። 13 ሃራ ኣሳፕ ኤንታራ ጋሄታናው ኢሲ ኣሲካ ሚኒቤና፡ ሺን ኣሳይ ኤንታ ቦንቼሰ።

14 ኣማኒያ ኣዳታኔ ማጨሳታ ታይቦይ ካሴይሳፌ ዳሪሽ ቢሰ።

15 ሄሳ ጊሾ፡ ኣሳይ ሃርጋንቸታ ሃላኒኔ ኣልጋን ቶኪዲ ጳጳርሲ ኣዲያ ዎዳ ኢያ ኩያይ ኤንታፌ ኢሶታ ኢሶታ ቦላ ሺሞፓና ማላ ኦጌ ደናን ኬሲዲ ዎሶሶና። 16 ቃሲ ዳር ኣሳይ ዬሩሳላሜ ማታን ዳዒያ ካታማታፕ ሃርጋንቸታኔ ቱና ኣያኒ ዎይሲያ ኣሳታ ኤኪዲ ዮሶና፤ ኡባይካ ፓዲደሶና።

ሃዋሬታ ቦላ ጎዲ ዳንዲሰ

17 ካሂኔ ሃላቃይኔ ኢያራ ዳዒያ ሳዱቃዌቲ ኡባይ ቃናቴን ኩሚዲ ሃዋሬታ ቦላ ዳንዲደሶና። 18 ሃዋሬታ ኦይኪዲ ዳሪያ ቃሾ ኬላን ዬጊደሶና። 19 ሺን ጎዳ ኪታንቸይ ቃማ ቃሾ ኬላ ፔንጊያ ደዩዲ ሃዋሬታ ካሬ ኬሲዲ፡ 20 «ቢዲ፡ ያሳ ኬላን ኤቂዲ ሃ

ከራሳ ዳዎ ቃላ አሳ ኡባስ ኦዲቱ» ያገለገሉ። 21 ሃዋርያት ህሳ ሲዲዳ ዎዳ ዋንታ ጉራ ያሳ ከሌ ገሊዲ ታማርሶ ደሚደሶና።

ካሂኔታ ሃላቃይኔ ኢያራ ዳዔይሳቲ ዪዲ፣ ኢሰራዔል ጨማታ ኡባ ያገ ሺሺዲ ሃዋርያት ባንታ ሲንጮ ኤሃና ማላ ዎታዳሬታ ቃሾ ከሌ ከቲደሶና። 22 ሺን ዎታዳሬቲ ቃሾ ከሌ ቢዲ ሃዋርያት ዳሚቦኮና። ጉዬ ሲሚ ዪዲ ዳሪያሰ። 23 «ኮኒ ቢያ ዎዳ ቃሾ ከላ ፔንጌይ ሚንሌ ጎርዳቲን፣ ናጌይሳቲ ፔንጌን ኤቁዳይሳታ ዳሚዳ። ሺን ኮኒ ካሪያ ደያ ዎዳ ገደን ሃሪ ኦቶሺን ኢሲ አሲካ ባዋ» ያገደሶና። 24 ህሳ ገሾ፣ ያሳ ከላ ዎታዳሬታ ከቲይሲኔ ካሂኔ ሃላቃቲ ህሳ ሲዲዳ ዎዳ «ሃዋርያት ቦላ አይቢ ሃኒዴ?» ያገዲ ሂርገደሶና።

25 ሄ ዎዳ ኢሲ አዳይ ኤንታኮ ዪዲ፣ «ሂኮ፣ ቃሾ ከሌ ሂንቲ ጌልሲዳ አሳቲ ያሳ ከላን ኤቁዲ አሳ ታማርሶና» ያገዲ ኤንታው ኦዲሲ። 26 ያሳ ከላ ዎታዳሬታ ከቲይሲ ባ ዎታዳሬታሪ ቢዲ ሃዋርያት ኤሂሰ። ሺን ኤንቲ ባንታና አሳይ ሹቻን ጫዳና ገዲ ያዩዳ ገሾ ኤንታ አዳሺዲ ኤሂደሶና።

27 ኤንቲ ሃዋርያት ኤሂዲ፣ ሺቁዳ ሻንጉዎ ሲንላን ኤሲን ካሂኔ ሃላቃይ ኤንታኮ። 28 «ሂንቲና ኮኒ ሄ ኡራ ሱንላን ታማርሶና ማላ ሚንሌዲ ከቲቦኮ? ሂኮ፣ ሂንቲ ቲማርቲያ ዩሩሳላማ ካታማ ኡባ ጋሊዳታ። ሄ ኡራ ሸምጥዋስ ኮና ኦይላናው ቆፔቲ?» ያገዲ ኦይቺሰ።

29 ጳጳርሳራኔ ሃንኮ ሃዋርያታሪ ኤንታው ዛሪሹ፣ «ኮኒ አሳሰ ከቲታናፔ ያሳሰ ከቲታናው ቤሴሰ። 30 ማሰቃሊያ ቦላ ሂንቲ ካቁዲ ዎዳዳ ዩሱሳ ኮ አዋታ ያሳይ ሃይቆፔ ዳንሌሰ። 31 ኢሰራዔሌቲ ናጋራፔ ሲማና ማላኔ ኤንታ ናጋራይ አቶ ጌቲታና ማላ ያሳይ ዩሱሳ ሃሪይሳኔ አሽይሳ ኦሊዲ ቦንቸን ባፔ ኡሻቻ ባጋን ኡቲሲሰ። 32 ህሳሰ ኮኒ ማርካ፤ ቃሲ ያሳይ ባና አማኔይሳታሰ አሚዳ ጌሻ አያናይካ ማርካ» ያገደሶና።

33 ሺቁዳ አሳይ ህሳ ሲዲዳ ዎዳ ዳር ዪሎቲዲ፣ ሃዋርያት ዎዳናው ቆፒደሶና። 34 ሺን አሳ ኡባን ዳር ቦንቺቲዳ፣ ሂጌ አሰታማሬይ፣ ጋማሊያሌ ገያ ኢሲ ፋሪሳዌይ ዳንዲ ኤቁዲ ሃዋርያት ጉላ ዎዳሰ ካሬ ከሳና ማላ ከቲሰ። 35 ህሳፌ ጉዬ፣ ሺቁዳ አሳኮ፣ «ኢሰራዔሌ አሳው፣ ሃ አሳታ ቦላ ሂንቲ አላናው ቆፒያባፔ ናጌቲቲ። 36 አይሰ ገኮ፣ ሃይሳፌ ካሴ ቲዎዳሲ ባና፣ ታኒ ገታ» ገዲ ዳንዲን፣ ኦይዲ ያቲ ገዲያ አሳቲ ኢያራ ኢሲፊደሶና። ሺን ኢያ ዎዳን ኢያ ካሊዳ ኡባይ ላሌቲን ፓላና አሲ ገዲዲ

አቲደሶና። 37 ሄሳፌ ጉዬ፣ አሳይ ታይቤቲያ ዋዴ ጋለላ ዪሁዲ ዴንዲዲ ዳሮ አሳ ፓንጋዬዲ ካሌሊሰ። ሺን ኢያካ ዋዲን ኢያ ካሊዳ አሳ ኡባይ ላሌቲሰ። 38 ሃዲካ ታ ሂንቲው ኦዳይሰ፤ ሃ አሳታፔ ሻኬቲቴ፤ ኤንታ ቦቾፊቴ። አይሰ ገኩ፣ ሃ ቆፋኔ ሃ ኦሎቃ አሲ ኦሊያባ ገዲኮ ዳያና። 39 ሺን ሃ ቆፋይኔ ሃ ኦሎይ ያሳፌ ዪዳባ ገዲኮ፣ ሂንቲ ኤንታ ዳይሳናው ዳንዳዔኬታ። ጌላዳ ያኒሼ ሂንቲ ያሳራ ካጩታና» ያገዲ ኦዲሰ። ሄሳ ገሾ፣ ሺቁዳ አሳይ ጋማሊያሌ ዞሪያ ኤኪደሶና።

40 ሃዋርያት ሶ ያገዲ ሊሶን ጋራፊሲሰ። ሄሳፌ ጉዬ፣ ኤንታኮ፣ «ዬሱሳ ሱንላ ናምዒንላ ዳንሰፊቴ» ገዲ ቢርሺ ዬዲደሶና። 41 ዬሱሳ ሱንላ ገሾ ኤንቲ ካዉያናይሲ ቤሲያባ ገዴይሳ ኤሪዳ ገሾ ሻንጉዋ ሲንሳፌ ኡፋይቲሼ ኬዪደሶና። 42 ኤንቲ ኡባ ዋዴ ያሳ ኬላኒኔ አሳ ሶን ዬሱሲ ኢ ከሪሰቶሳ ገዴይሳ ታማርሶኔ ሳባኮ ኣገቦኮና።

6

ላፑን አሳታ ዶሪቴላ

1 ሄ ዋዴ ካሌይሳታ ታይቦይ ዳሪ ዳሪ ቢሺን፣ ገሪኬ ደና ኦዴቲያ አይሁዴቲ ዪሁዲን ዬሌቲዲ ዴዲያ አይሁዴታ ቦላ ዙዙሚደሶና። አይሰ ገኩ፣ ገሪኬ ደና ኦዴቲያ አይሁዴቲ፣ «ጋላስ ጋላስ ኢሚቲያ ካላን ኦ ኣምዔቲ ናቁቶሶና» ያገደሶና። 2 ታማኔ ናምዑ ሃዋሪቲ ዋሳ ኬላ አሳ ኡባ ያገዲ፣ «ኦኒ ያሳ ቃላ ኦዴይሳ ኣገዲ ካሊ ገሻናው ኦሰ ቤሴና። 3 ሂዛ፣ ኢሻቶ፣ ሎዎ አሳታ፣ ጌሻ ኣያናኒኔ ጩንጫቲላን ኩሚዳ ላፑን አሳታ ሂንቲ ገደፌ ዶሪቴ፤ ኦኒ ኤንታ ሃ ኦሎቃሰ ሹማና። 4 ሺን ኦኒ፣ ኦ ኩሜላ ዋዲያ ያሳ ዋሳኒኔ ቃላ ታማርሶን ፔሻና» ያገደሶና።

5 ሃዋሪቲ ኦዲዳ ኦዳይ አሳ ኡባ ኡፋይሲሰ። ሄሳ ገሾ፣ አማኖይኔ ጌሻ ኣያኒ ኩሚዳ ኢሰጻፋኖሴ፣ ፊልጶሳ፣ ጲሮኮሮሳ፣ ኒቃሮኔ፣ ጻዋና፣ ጳርሜናኔ አይሁዴ አማኖ ጌሊ ሲሚዳ ኣንጾኪያ ኒቆላዋሳ ዶሪደሶና። 6 ኤንታ ሃዋሪታ ሲንላን ኤሲን፣ ሃዋሪቲ ኤንታ ቦላ ኩሼ ዋሊዲ ያሳ ዋሲደሶና።

7 ያሳ ቃላይ ዳልገ ዳልገ ቢሰ። ዬሩሳላሜን ዴዲያ አማኔይሳታ ታይቦይ ዳሪ ዳሪ ቢሰ፤ ዳሮ ካሂኔቲካ አማኒደሶና።

ኢሰጻፋኖሴይ ኣይኬቲሰ

8 ኢሰጻፋኖሴይ ኣጼ ከሃቲላኒኔ ዋልቃን ኩሚዲ አሳ ገደን ኦራላባታኔ ማላታታ ኦሌሰ። 9 አይሌቲላፌ ኬዪዳ አይሁዴ ዋሳ

ከላ ኣሳይ ቁሪናፔኔ ኢስኪንዲሪያፔ ኪልቁያፌኔ ኢሲያፔ ዪዳ ኢሲ ኢሲ ኣሳቲ ዳንዲዲ ኢስፂፋኖሴራ ፓላሚዶሶና። 10 ሺን ኢስፂፋኖሴይ ኣያና ዋልቃን ኦዳቲያ ጨንጫቴላ ኤንቲ ኤቁታናው ዳንዳዲቦኮና።

11 ሄ ዋዴ ኤንቲ፣ «ሙሴኔ ያሳ ኢ ጫዪሺን ሲዒዳ» ጊያ ዋርዶ ኣሳታ ሻሚዶሶና። 12 ሄሳዳ ኦሊዲ ቢታ ጨማታኔ ሂፔ ኣስታማሬታ ኢያ ቦላ ዳንሊዶሶና። ኢስፂፋኖሴ ኦይኪዲ ሻንጉዋ ሲንሌ ኤፊዶሶና። 13 ኢያ ቦላ ፓይዲዳ ዋርዶ ማርካቲ፣ «ሃ ኡራይ ሃ ያሳ ከላኔ ሙሴ ሂጊያ ዛሪ ዛሪ ጫዬስ። 14 ኢ፣ <ሃይሲ ናዚሬቲ ዩሱሲ፣ ሃ ያሳ ከላ ላላና፤ ቃሲ ሙሴይ ኦስ ኣሚዳ ሂጊያ ላማና) ያጊሺን ኦኒ ሲዒዳ» ያጊዶሶና።

15 ሻንጎ ሺቆን ኡቲዳ ኣሳ ኡባይ ኢስፂፋኖሴ ሎይሊዲ ያሊያ ዋዴ ኢያ ሶሞያይ ኪታንጎቾ ሶሞዎ ዳኔስ።

7

ኢስፂፋኖሴ ሃሳያ

1 ካሂኔታ ሃላቃይ ኢስፂፋኖሴኮ፣ «ሃይሲ ቱሜ?» ያጊዲ ኦይቺስ።

2 ኢስፂፋኖሴይ፣ «ታ ኣሻቶ፣ ታ ኣዋቶ፣ ሲዒቲ! ኦ ኣዋ ኣብራሃሜይ ካራኔን ዳናው ባናፔ ሲንሌ ማሴጶምያን ዳዒሺን፣ ቦንቾ ያሳይ ኢያው ቆንጨዲ፣ 3 ኔ ቢታፌኔ ኔ ዳቦታፔ ሻኬታዳ ታኒ ኔና ቤሲያ ቢታ ባ) ያጊስ። 4 ሄ ዋዴ ኣብራሃሜይ ካልዳዌታ ቢታፌ ከዪዲ ካራኔን ዳናው ቢስ። ኢያ ኣዋይ ሃይቁዳፔ ጉዬ ያሳይ ኢያ ሃ ቢታ ሃዒ ሂንቲ ዳዒያ ቤሳ ኡሂስ። 5 ኢ ሃ ቢታፌ ሃሪ ኣቶሺን ቶሆይ ዩጲያ ቤሲካ ኣብራሃሜስ ኣሚቤና። ሺን ናዒ ኢያው ባይና ዋዴ ያሳይ ሃ ቢታ ኢያዉኔ ኢያ ሺሻስ ላታ ኦሊዲ ኣማናይሳ ቃላ ጌሊስ። 6 ያሳይ ኣብራሃሜኮ፣ ኔ ሺሻይ ሃራ ቢታን ኣማላቲላን ዳና፤ ያን ኦይዲ ያቲ ላይሊ ኤንቲ ኣይሌቴላን ሃራታና። 7 ሺን ታኒ ኔ ሺሻ ሃሪያ ዳሪያ ቦላ ፐርዳና። ሃሳፊ ጉዬ፣ ኤንቲ ሄ ቢታፌ ከዪዲ ሃይሳን ታው ጎይናና) ያጊስ። 8 ያሳይ ኣብራሃሜ ሺሻይ ቃፃሪታና ሜላ ኢያራ ጫቁን፣ ዪሳቁ ዩሌቲዳ ሆስፑንላ ጋላሳን ቃፃሪስ። ዪሳቁ ያይቆባ ቃፃሪስ፤ ቃሲ ያይቆቢ ታማኔ ናሞዑ ባ ናይታ፣ ኦ ኣዋታ ማይዛታ ቃፃሪስ።

7:2 ሜዴ 12:1 7:4 ሜዴ 11:31፤ 12:4 7:5 ሜዴ 12:7፤ 13:15፤ 15:18፤ 17:8 7:6 ሜዴ 15:13-14 7:7 ኬሳ 3:12 7:8 ሜዴ 17:10-14፤ 21:2-4፣ 25፣ 26፤ 29:31-35

9 «ያይቆባ ናይቲ ዮሴፋ ቃናቲዲ ጊብፄ ቢታን ኣይሌቴላስ ባይዚዶሶና፡ ሺን ያሳይ ኢያራ ዳዔስ። 10 ኢያ፡ ኢያ ዋዬ ኡባፌ ኬሲስ። ጊብፄ ካዉዋ ሲንላን ሳባኔ ጨንጨቴሉ ኢያው ኢሚስ። ጊብፄ ካዎይ ዮሴፋስ ጊብፄ ቢታኔ ባ ኬላ ኡባ ኣይሳናዳ ሃላቃቴሉ ኢሚስ።

11 «ጊብፄ ቢታኒኔ ካናኔ ቢታ ኡባን ኮሺ ጌሊዲ ዳር ኣሳ ኡንዔሉስ። ሄ ዎዴ ኑ ማይዛቲ ካሉ ዳማናው ዳንዳዒቦኮና። 12 ያይቆቢ ጊብፄ ቢታን ካሉ ዳዔይሳ ሲዒዲ ኑ ኣዋታ ኮይሮ ያ ዩዲስ። 13 ናምዓንሶ ቡሳን ዮሴፊ ባ ኢሻታስ ባናቴላ ኤሪሲስ። ጊብፄ ካዎይካ ዮሴፋ ሹሻ ኤሪሲስ። 14 ዮሴፊ ባ ኣዋ ያይቆባኔ ባ ዳቦ ኡባ፡ ላፑን ታማኔ ኢቻሹ ኣሳ ባኮ ያና ማላ ከቲዲ ኤሂሲስ። 15 ያይቆቢ ጊብፄ ቢታ ዎዲስ፤ ኢኔ ኢያ ናይቲ ያን ሃይቂዶሶና። 16 ኤንታ ኣሃይ ሄ ቤሳፌ ሴኬማ ቢታ ቶኬቴዲ ቢዲ፡ ያን ኣብራሃማይ ሃሞሬ ናይታፔ ዳር ቢራን ሻሚዳ ዱፎን ሞጌቲስ።

17 «ሺን ያሳይ ኣብራሃማስ ኢማና ጊዳይሳ ፖሊያ ዎዴይ ጋካናው ማቲዳ ዎዴ ጊብፄ ቢታን ዳዒያ ኑ ኣሳይ ዳሪ ዳሪ ቢስ። 18 ሄሳፌ ጉዩ፡ ዮሴፋ ኤሮና ሃራ ካዎይ ጊብፄ ቢታን ካዎቲስ። 19 ሄ ካዎይ ኑ ዜሬላ ጌኒዲ ጉላ ናይቲ ሃይቃና ማላ ኤንታ ካሬ ኬሲ ዩጋና ማላ ኑ ኣዋታ ኡንዔሉስ።

20 «ሄ ዎዴ ሙሴይ ዩሌቲስ፤ ኢ ያሳ ሲንላን ዳር ሎጾ ናዓ። ባ ኣዋ ኬላን ሄቹ ኣጌና ጋካናው ዲጨስ። 21 ሙሴይ ዎራ ሆሊቲዳ ዎዴ ጊብፄ ካዉዋ ናዒያ ዳማ ኤካዳ ባ ናዓ ኦላዳ ኢያ ዲቻሶ። 22 ሙሴይ ጊብፄታ ጨንጨቴላ ኡባ ታማሪዲ ኦዳኒኔ ኦሶን ሚኖ ኣሲ ጊዲስ።

23 «ሙሴስ ላይላይ ኦይታማ ኩሚዳ ዎዴ ባ ኢሻታ፡ ኢስራዔሌታ ቤናናው ባ ዎዛናን ቆፒስ። 24 ኢስራዔላታፔ ኢሱዋ ጊብፄ ኢሶይ ቆሂሺን ቤዒዲ ሄ ኢስራዔሌ ኡራ ማዲዲ፡ ሄ ቆሃዳ ጊብፄ ኡራ ዎዲ ኩሹ ዛሪስ። 25 ሙሴይ ባ ኢሻታ ባ ባጋራ ያሳይ ኣሻናው ሃኔይሳ ኤንቲ ኣኬካና ጊዲ ቆፒስ፡ ሺን ኤንቲ ኣኬኪቦኮና።

7:9 ሜዴ 37:11፣ 28፣ 39:2፣ 21 7:10 ሜዴ 41:39-41 7:11 ሜዴ 42:1-2 7:13 ሜዴ 45:1፣ 16 7:14 ሜዴ 45:9-10፣ 17-18፣ 46:27
7:15 ሜዴ 46:1-7፣ 49:33 7:16 ሜዴ 23:3-16፣ 33:19፣ 50:7-13፣ ኢያ 24:32 7:17 ኬሳ 1:7-8 7:19 ኬሳ 1:10-11፣ 22 7:20 ኬሳ 2:2
7:21 ኬሳ 2:3-10 7:23 ኬሳ 2:11-15

26 «ዋንቴላ ጋላስ ናምዑ ኢስራዔል አሳተ ኢሶይ ኢሱዋራ ዋቋቴሺን ዳሚዲ ኤንታ ሲጌላናው ኮዪዲ፣ <አሳቶ፣ ሂንቴ ኢሻንታ፣ አይስ ኢሶይ ኢሱዋ ቆሄቴ?> ያገሰ።

27 «ሺን ባ ላጊያ ቆሄይሲ ሙሴኮ፣ <ኔና ኑ ቦላ ሃሬይሳኔ ዳይና ኦሊዳይ ኦኔ? 28 ኔኒ ዘኔ ገብፄ ኡራ ዋቋዳይሳዳ ታና ዋቋናው ኮያይ?> ያገዲ ሙሴ ሱጊ ዬዲስ። 29 ሙሴይ ሄሳ ሲዒዳ ዋዴ ገብፄፌ ቤቴዲ ሚዲያሜ ቢታን ቤቴ አሲ ገዲዲ ዳዲሽ ናምዑ አዴ ናይታ ዬሊስ።

30 «ጎዳ ኪታንቸይ ኦይታሙ ላይላፌ ጉዬ ሲና ዳሪያ ማታን ዳዲያ ባዘ ቱሺያ ገደን ኤዲያ ታማ ላጮ ገደን ሙሴስ ቤንቲስ።

31 ሙሴይ ባ ቤዒዳይሳን ማላሌቲዲ፣ ሎይሊ ቤዓናው ቱሺያ ማቲ ሸቋዲ ዳዲሺን፣ ጎዳ ቃላይ፣ 32 ታኒ ኔ አዋታ፣ አብራሃሜ ያሳ፣ ዩሳቃ ያሳ፣ ያይቆባ ያሳ) ያገሺ ሙሴኮ ዪስ። ሙሴይ ያሻን ኮኮራዲ ፄላናው ዳንዳዒቤና።

33 «ጎዳይ ሙሴኮ፣ <ኔኒ ኤቁዳ ቢታይ ጌሺ ገዲያ ገሾ ኔ ቶሁዋን ዳዲያ ጫማ ኬሳ። 34 ታኒ ገብፄን ዳዲያ ታ አሳ ኡንዔቴላ ቤዓስ። ኤንታ ዋሱዋ ሲዒዳ ኤንታ አሻናው ዋቋስ። ሃዒ ሃያ! ታኒ ኔና ገብፄ ኪታና) ያገሰ።

35 «ኢስራዔሊቲ ሙሴ፣ <ኔና ኑና ሃሬይሳኔ ዳይና ኦሊዳይ ኦኔ?> ያገዲ ኢዲይሳ ቱሺያ ገደን ኢያው ቤንቲዳ ኪታንቸዋ ባጋራ ሃሬይሳኔ አሺይሳ ኦሊዲ ያሳይ ኪቲስ። 36 ሙሴይ ኢስራዔሊታ ገብፄፌ ኬሲዲ ማላሊሲያባታኔ ኦራላባታ ገብፄ ቢታኒኔ ዘዖ አባን ኦሊዲ ኤንታ ኦይታሙ ላይሊ ባዘ ቢታን ካሌሊስ።

37 «ኢስራዔሊ አሳኮ፣ <ያሳይ ታና ዳንሊዳይሳዳ ሂንቴ ሺሻ ገደፌ ታ ሜላ ናቤ ሂንቴው ዳንላና) ያገዲይ ሄ ሙሴ። 38 ባዘ ቢታን ሸቋዳ ኢስራዔሊ አሳራ ዳዒዳይሲ፣ ኑ አዋታራኔ ሲና ዳሪያ ቦላ ኢያው ኦዲዳ ኪታንቸዋራ ዳዒዳ ሙሴይ ኢያ። ያቲዲ፣ ያሳ ዳዖ ቃላ ኩስ ኢማናው ኤኪስ።

39 «ሺን ኑ ማይዛቲ ሙሴስ ኪቲታናው ደሲቦኮና፤ ኢያ ኢዲዲ ጉዬ ገብፄ ሲማናው አዋቲዶሶና። 40 ቃሲ አርናኮ፣ <ኑና ካሌሊያ ያሳታ ኩስ ኦሳ። አይስ ገኮ፣ ሃይሲ ኑና ገብፄፌ ኤሂዳ ሙሴይ፣ ዋኒዳኮ ኔኒ ኤርኮ) ያገደሶና። 41 ሄ ዋዴ ማሪ ዳኒሲዲ ኤቃ

7:29 ኬሳ 18:3-4 7:30 ኬሳ 3:1-10 7:35 ኬሳ 2:14 7:36 ኬሳ 7:5፤ 14:21፤ ታይ 14:33 7:37 ዛሬ 18:15፣ 18 7:38 ኬሳ 19:1-20:17፤ ዛሬ 5:1-33 7:40 ኬሳ 32:1

ኦሊደሶና። ሄ ኤቃሰ ያርሾ ያርሺዲ ባንታ ኩሼን ኦሊዳ ኦሱዋን ኡፋይቲዶሶና። 42 ሺን ያሳይ ኤንታው ዘኮ ዛሪሰ። ኤንቲ ሳሎ ያለንቶታ ጎይናና ሜላ ኤንታ ዩጊ ኣጊሰ። ናቤታ ማፃፋን፣
ኢሰራዔል ኣሳው፣ ኦይታሙ ላይሉ ኩሜላ

ባዘ ቢታን ሹኪዳ ሜሂያኔ
ያርሺዳ ያርሹዋ ታው ያርሺዳቲ?

43 ሂንቲ፣ ሂንቲው ጎይናናው ኬሲዳ ኤቃኔ ሞሎኬ ዲንካኒያ ሬፋና ጊያ ሂንቲ ያሳ ያለንቶ ሚሲሊያ ቶኪዳታ።

ታኒ ሂንቲና ባቢሎኔፕ
ሂኒ ባጋ ዩዳና ጌቲቲዲ ፃፊቲሰ።

44 «ኑ ኣዋታሰ ባዘ ቢታን ማርካ ዲንካኔይ ዴዔሰ። ኢያካ ያሳይ ሙሴ ከቲዳይሳዳኔ ኢያ ቤሲዳይሳዳ ኦሊሰ። 45 ቃሲ ኑ ኣዋቲ ሄ ዲንካኒያ ባንታ ኣዋታፔ ኤኪዲ ያሳይ ካሴ ዩዳላዳ ኣይሁዳ ጊዶና ኣሳ ቢታ ኦይኪዳ ዋዴ ኢያሱራ ያ ኤኪዲ ጌሊደሶና። ሄ ዲንካኔይ ዳዊቲ ዋዴ ጋካናዉካ ሄ ቤሳን ዴዒሰ።

46 ዳዊቲይ ያሳን ሳቤቲሰ። ቃሲ ያይቆባ ጎዳይ ዴዒና ኬላ ከፃናው ያሳ ዋሲሰ። 47 ሺን ኢያው ኬላ ከፃዳይ ሶሎሞኔ።

48 «ሃሮሺን፣ ኡባፌ ቦላ ያሳይ ኣሲ ከፃዳ ኬላን ዴና። ናቤይ ጊዳይሳ ሜላ፣

49 ሳሎይ ታ ኣራታ፣
ሳዓይካ ታ ቶሆይ ዩዲያሶ።

ያቲን፣ ታው ሂንቲ ኣይ ሜላ ኬላ ከፃኔ?
ዋይኮ ታኒ ሹምፒያሶይ ኣዉኔ? 50 ሃ ኡባ ታ ኩሺያን ኦላቢኪና?» ያጌሰ ጎዳይ።

51 «ሂንቲ ዋኒዳ ሲያና ኣሴ? ሂንቲ ዋዛናይ ያሳ ቃላ ኤካናው ኣይሰ ኢፂዴ? ሂንቲ ሃይላይ ኣይሰ ቱሊዴ? ሂንቲ፣ ሂንቲ ኣዋታላ ኡባ ዋዴ ጌሻ ኣያናራ ኤቁቲታ። 52 ናቤታ ጊዶፌ ሂንቲ ኣዋቲ ጎዶናይ ኦኔ? ያሳ ናዓይ፣ ፂሎይ ያናይሳ ካሰቲዲ ኦዲዳይሳታ ዋዲደሶና። ሃዒ ሂንቲ ኢያ ኣላ ኢሚዲ ዋዲደታ። 53 ሂንቲ ከታንቹዋ ኩሼፔ ያሳ ሂጊያ ኤኪዳታ፣ ሺን ከቲቲቤኬታ» ያጊሰ።

ኢሰፂፋኖሴይ ሹቻን ጫዳቲሰ

7:41 ኬሳ 32:2-6 7:42 ኣሞ 5:25-27 7:44 ኬሳ 25:9፣ 40 7:45 ኢያ 3:14-17 7:46 2ሳሙ 7:1-16፣ 1ታሪ 17:1-14 7:47 1ካዋ 6:1-38፣ 2ታሪ 3:1-17 7:49 ኢሳ 66:1-2 7:51 ኢሳ 63:10

54 እንቲ ሄሳ ሲዒዳ ዎዴ ባንታ ዎዛናን ኢስጊፋኖሴ ቦላ ዳር ዪሎተዲ፣ ባንታ ሜቴርሻ ሳጂዲ ማንዲደሶና። 55 ሺን ኢስጊፋኖሴይ ጌሻ አያናን ኩሚዲ፣ ሳሎ ፑዴ ጃሊዲ፣ ያሳ ቦንቹዎኔ ዬሱሳ ያሳ ኡሻቻ ባጋን ኤቁዳይሳ ቤዒሰ። 56 «ሄኮ፣ ታኒ ሳሎይ ደዬተን፣ አሳ ናዓይ፣ ያሳ ኡሻቻ ባጋን ኤቁዳይሳ ቤዓይሰ» ያገሰ።

57 ቃላ ቶቁ አሊዲ ዋሲሹ፣ ባንታ ሃይላ ኦይኪዲ ኢሲፊ ኢያኮ ዎዲደሶና 58 ኢያ ካታማፔ ጋፃ ኬሲዲ፣ ሹቻን ጨዲደሶና። ማርካቲ ባንታ ማዑዋ ኢሲ ሳያላ ጊያ ናዓቴላ ማታን ዎሊደሶና።

59 ኢስጊፋኖሴይ፣ «ታ ጎዳ ዬሱሳ፣ ታ ሸምፑዎ ኤካ» ያገዲ ጃጊሺን እንቲ ኢያ ሹቻን ጨደሶና። 60 ጉልባቲዲ፣ ባ ቃላ ቶቁ አሊዲ፣ «ታ ጎዳው፣ ሃ ናጋራ እንታው አቶ ጋ» ያገሰ። ሄሳ ያገዲ ሲሚዳ ሜላ ሃይቁ ኣገሰ።

8

ሳያሊ አማኒያ አሳ ጎዲሰ

1 ሳያሊ ኢስጊፋኖሴ ሃይቁዎን ኡፋይተሰ። ሄ ጋላሰ ዬሩሳላሜን ዴዒያ ዎሳ ኬላን ጊታ ጎዲ ዴንዲሰ። ሃዋሪቲ አቲን አማኔይሳቲ ኡባይ ዪሁዳ ቢታኒኔ ሳማሬ ቢታን ላሌተደሶና። 2 ኢሲ ኢሲ ያሳ አሳቲ ኢስጊፋኖሴ ዋጊደሶና፤ ቃሲ ኢያው ዳር ዬኪደሶና። 3 ሺን ሳያሊ ዎሳ ኬላ ቆይሳናው ኮዬሰ። ሶ ሶ ዩዩ ጌሊዲ፣ አማኒያ አዴታኔ ማጨሳታ ጎቹ ጎቹ ኬሲዲ ቃሾ ኬላ ጌልሴሰ።

ዎንጌላይ ሳማራን ሳባኬተሰ

4 ላሌተዳ አማኔይሳቲ ቢዳ ቤሳ ኡባን ቃላ ኦዲደሶና። 5 ፊልጶሲ ሳማራ ካታማ ቢዲ ኪሪሰቶሳባ አሳሰ ኦዲሰ። 6 ዳር አሳይ ፊልጶሲ ጊዳይሳ ሲዒዳ ዎዴኔ ኢ አሊያ ማላታታ ቤዒዳ ዎዴ ኢያ አኬኪዲ ሲዒደሶና። 7 ቱና አያናቲ ዋሲዲ ዳር አሳፔ ኬዩደሶና፤ ቃሲ ዳር ጉንዳቲኔ ዎቤቲ ቢሌተደሶና። 8 ሄ ካታማን ዴዒያ አሳይ ዳር ኡፋይተደሶና።

9 ሺን ሲሞና ጊያ ኢሲ ኡራይ ሄ ካታማን ዴዒሰ። ኢ፣ ሳና ጊታ ጊዲ ሳማራ አሳ ማርቴላን ማላሊሲሽ ጋምዒሰ። 10 ጉላፊ ጊታ ጋካናው ዴዒያ አሳ ኡባይ፣ «ጊታ ያሳ ዎልቃይ ሃይሳ» ጊዲ ኢያባ ሲዎሶና። 11 ዳር ዎዴፔ ደሚዲ ማርቴሽ ሳማራ አሳ

8:3 ሃ.እ 22:4-5፤ 26:9-11

ማላሊሲያ ጊሾ አሳይ አያባ ሲያሰሩ። 12 ሺን ፊልጶስ ያሳ ካዎቴላባኔ ዩሱስ ኪሪስቶስ ሱንገላባ አይታሲኔ ማጫታሰ ኦዲን፣ ኤንቲ አያባ አማኒዲ ፃማቄተዶሶና። 13 ቃሲ ሲሞኒካ ባ ሁዔን አማኒዲ ፃማቄተሰ። ፊልጶስ ሲጠጠር ቢዳ ቤሳ ኡባን ኦሴቲያ ጌታ ማላታታ ቤዒዲ ማላሊቲሰ።

14 ዩሩሳሌምን ዳዒያ ሃዋሪቲ ሳማሬ አሳይ ያሳ ቃላ ኤኪዳይሳ ሲዒዳ ዎዴ ጳዊሮሳኔ ዮሃንሳ ኤንታኮ ዩዲዶሶና። 15 ጳዊሮሲኔ ዮሃንሲ ቢዲ፣ አማኔይሳቲ ጌሻ አያና ኤካና ማላ ኤንታው ያሳ ዎሲዶሶና። 16 አይሰ ገኮ፣ ሳማሬ አሳቲ ጎዳ ዩሱሳ ሱንገላ ፃላላን ፃማቄተዶሶና፤ ኣቲን ኤንታፊ አሱዋ ቦላካ ጌሻ አያኒ ዎዲቤና። 17 ሄ ዎዴ ጳዊሮሲኔ ዮሃንሲ ባንታ ኩሺያ ኤንታ ቦላ ዎሊን፣ ኤንቲ ጌሻ አያና ኤኪዶሶና።

18 ሃዋሪቲ ባንታ ኩሺያ ኤንታ ቦላ ዎሊን፣ ኤንታው ጌሻ አያናይ አማቲዳይሳ ሲሞኒ ቤዒዳ ዎዴ ጳዊሮሳሲኔ ዮሃንሳሰ ሚሼ ኤሂዲ፣ 19 «ታኒካ ታ ኩሺያ ዎሊያ ኡባይ ጌሻ አያና ኤካና ማላ ሃ ማታ ታወካ አማርኬቲ» ያገሰ።

20 ሺን ጳዊሮሲ አያኮ፣ «ኔኒ ያሳ አሞታ ሚሼን ሻማናው ቆፒዳ ጊሾ ኔ ሚሼይ ኔራ ቆዮ። 21 ኔ ዎዳናይ ያሳ ሲንገላን ሱሬ ገዶና ጊሾ ኔው ሃይሳን ጊሾይ ዎይኮ ቃዲ ባዎ። 22 ሂዛ፣ ሃ ኔ ዎዳና ኢታቲላ ጊሾ ናጋራ፤ ሲማ። ኔ ዎዳናን ዳዒያ ኢታ ቆፋ ያሳይ አቶ ጋና ማላ ያሳ ዎሳ። 23 ጋሶይካ፣ ኔኒ ኢታ ቃናቴኒኔ ናጋራ ቃሹዋን ዳዒይሳ ታኒ ቤዒይሰ» ያገሰ።

24 ሲሞኒ ዛሪዲ፣ «ሂንቲ ገዳይሳፊ አሶይካ ታና ጋኮና ማላ ታው ያሳ ዎሲቲ» ያገሰ።

25 ጳዊሮሲኔ ዮሃንሲ ማርካቲዳ፤ ጎዳ ቃላ ኦዲዳ፤ ጉዬ ዩሩሳሌም ሲሚዶሶና። ሳማሬን ዳዒያ ዳር ጉታታን ዎንጌላ ኦዲዶሶና።

ፊልጶስ ቶሲያ ሞሪና ፃማቄሰ

26 ጎዳ ኪታንጃይ ፊልጶሳኮ፣ «ዳንዳዳ ዩሩሳሌማ፤ ጋዛ ኤፊያ ባዘ ቢታ ኦጊያኮ ባ። ሄ ኦጊይ ዲጌሃ ባጋራ ዳዒሰ» ያገሰ። 27 ፊልጶስ ዳንዲዲ ቢሰ። ሂንዴኬ ጊያ ቶሲያ ካዌሰ አ ሚሼ ኡባ ናጊያ ቶሲያ አሲ ዳዒሰ። አካ ጎይናናው ዩሩሳሌም ቢሰ። 28 ጋራ ጋሪያን ኡቲዲ፣ ዩሩሳሌማ፤ ባ ቢታ ሲሚሼ ናቢያ አሳያሳ ማፃፋ ናባቤሰ።

29 ጌሻ አያናይ ፊልጶሳኮ፣ «ሄ ጋሪያኮ ባዳ ኢያ ማቲ ሺቃ» ያገሰ።

30 ያቲን ፊልጶስ ዋዲ ቢዲ ጋኪያ ዋዴ ሞሪናይ ናቢያ ኢሳያሳ ማፃፋፔ ናባቢሽን ሲዲዲ፣ «ኔ ናባቢያሲ ኔው ጌሊ?» ያገሰ።

31 ሞሪናይ፣ «ታው ኦዲ ጌልሲያ ኣሲ ባይና ዋኒዲ ጌላኔ?» ያገሰ። ባራ ጋሪያን ከዪዲ ኡታና ሜላ ፊልጶሳ ዋሲሰ።

32 ሞሪናይ ናባቢያ ማፃፋ ከፊሌይ፣

«ኢ ዶርሳዳ ሹኩታናው ላጌቲሰ፤ ዶርሳ ማሪ ባ ኢኪሲያ ሜዴይሳታ ሲንላን ሲዲ ጌይሳዳ፣ ኢካ ባ ዶና ዶዪቤና።

33 ኢ ካወዪሰ፤ ኢያው ዲሎ ፒርዲ ጳይሰ።

ኢያ ዴይህ ሃ ሳዓፔ ቃንጭቲዳ ጊሾ

ኢያ ሹሻባ ኦኔ ኦዳናይ?» ያገሰ።

34 ሞሪናይ ዛሪዲ ፊልጶሳኮ፣ «ናቤይ ኦዴባ ኦዲ? ባባ ኦዲዬ ዋይኮ ሃራ ኣሳባ ኦዲ? ታው ኦዳርኪ» ያገሰ። 35 ፊልጶስ ዛሪዲ፣ ያሳ ቃላ ሄ ቤሳፌ ዶሚዲ፣ ዬሱሳባ ኦዲያ ዋንጌላ ኢያው ኦዲሰ።

36 ኤንቲ ቢሼ ሃሊ ዴዲያሶ ጋኪዶሶና። ሞሪናይ፣ «ሃሌ ሃይሳ ቤዓ፤ ታ ፃማቁቶና ሜላ ኣይቢ ዲጊ?» ያገሰ።

37 ፊልጶስ ኢያኮ፣ «ኔኒ ኔ ኩሜላ ዋዛናፔ ኣማኒኮ ዳንዳዓሳ» ያገሰ።

ኢ ዛሪዲ፣ «ዬሱሰ ከሪሰቶሲ ያሳ ናዓ ጊዴይሳ ታኒ ኣማናይሰ» ያገሰ።

38 ጋሬይ ኡቃና ሜላ ሞሪናይ ከቲን፣ ናምዓይ ዋዲዲ ሃላን ጌሊዶሶና፤ ፊልጶስ ኢያ ፃማቁሰ። 39 ኤንቲ ሃላፌ ጋፃ ከዪዲ ዋዴ ጎዳ ኣያናይ ፊልጶሳ ቆፖና ኤኪሰ። ናምዓንሎ ሞሪናይ ፊልጶሳ ቤዒቤና፣ ሽን ባ ኦጊያ ኡፋይቲሼ ቢሰ። 40 ፊልጶስ ኣዛፆናን ባና ዴሚሰ። ቃሲ ቁሳሪያ ያና ጋካናው ካታማታን ዩዪዲ ዋንጌላ ማርካቲሰ።

9

ሳያሊ ከሪሰቶሳ ኣማኒሰ (ሃ.ኦ 22:6-16፤ 26:12-18)

1 ሄ ዋዴ ሳያሊ ጎዳ ካሌይሳታ ዋዳናው ማንዲዲ ካሂኔ ሃላቃኮ ቢሰ። 2 ጎዳ ኦጊያ ካሊያ ኣዴታኔ ማጫታ ዴሚኮ፣ ቃቲሼ ዬሩሳላሜ ኤሃናው፣ ዳማሰቆን ዴዲያ ኣይሁዳ ዋሳ ከላታሰ ዲብዲቤይ ፃፊታና ሜላ ኢያ ዋሲሰ።

3 ኢ ቢዲ፣ ዳማስቆ ካታማ ጋካናው ማተሽን፣ ቆፖና ሳሎፔ ዋልቃማ ፖያይ ኢያ ዩሹዋን ፖረሰ። 4 ኢ ሳዓን ኩንዲዳሽን፣ «ሳያላ፣ ሳያላ፣ አይሰ ታና ጎዳይ?» ጊያ ቃላ ሲረሰ።

5 ሳያላ፣ «ጎዳው፣ ነኒ ኦኔ?» ያጊዲ ኦይቸሰ።

«ታኒ፣ ነኒ ጎዲያ ዩሱሳ» ያጊሰ።

6 ሺን ሳያላ ኮኮሪሼኔ ማላሌቲሼ፣ «ጎዳው፣ ታኒ አይ ኦላና ማላ ኮያይ?» ያጊሰ።

ጎዳይ ኢያኮ፣ «ዳንዳዳ ካታማ ጌላ፤ ነኒ ኦላናው ቤሲያባይ ያን ኔው ኦዳታና» ያጊሰ።

7 ሳያላራ ኦጊያ ቢያ አሳቲ አይኮካ ኦዳቶና ኤቂ አቲደሶና። ቃላ ሲገሰና፣ ሺን እናካ ቤረባኮና። 8 ሳያላ ኩንዲዳ ሴሳፌ ዳንዲዲ ያሊያ ዋዴ ኢያ አይፊይ ዳሞና አዳሰ። ሄሳ ጊሾ፣ ኤንቲ ኢያ ኩሺያ ኦይኪዲ ካሌላዲ ዳማስቆ ጌልሲደሶና። 9 ሄቩ ጋላሰ ጋካናው ኢ ያላናው ዳንዳረቤና፤ አይኮካ ሚቤና፤ ኡዩቤና።

10 ዳማስቆን ኢሲ ሃናኒያ ጊያ ዩሱሳ ታማሬይ ዳዔሰ። ጎዳይ ቆንጩላን፣ «ሃናኒያ» ያጊዲ ያጊሰ።

ሃናኔይ ዛሪዲ፣ «ታ ጎዳው፣ ሃይሳን ዳዓይሰ» ያጊሰ።

11 ጎዳይ ኢያኮ፣ «ዳንዳዳ ሱሪ ጌቲቲያ ኦጊያ ባዳ፣ ዩሁዳ ሶን ሳያላ ጊያ ቱርሴሴፔ ዩዳ ኡራ ኮያ፤ ሳያላ ዋሴሰ። 12 ቃሲ ሃናኔይ ጌሊዲ፣ ሳያላ ናሞዓንሉ ያላና ማላ ባ ኩሺያ ኢያ ቦላ ዋሊሽን ቆንጩላን ቤረሰ» ያጊሰ።

13 ሃናኔይ ዛሪዲ፣ «ጎዳው፣ ዩሩሳላሜን ኔ ጌሻ አሳ ቦላ ሄ ኡራይ አይ ማላ ኢታባ ኦሊዳኮ ታኒ ዳሮ አሳፔ ሲዓሰ። 14 ቃሲ ዳማስቆን ኔ ሱንላ ያጌይሳታ ኡባ ቃቻናው፣ ካሂኔ ሃላቃቲ ኢያው ማታ ኢሚደሶና» ያጊሰ።

15 ሺን ጎዳይ ኢያኮ፣ «ሳያላ አይሁዳ ጊደና አሳ ሲንላን፣ ካዋታ ሲንላኒኔ ኢሰራዔል አሳ ሲንላን፣ ታ ሱንላ ኤሪሳናውኔ ታው ኦላናው ደራቲዳ ሚሼ ጊዲያ ጊሾ ነኒ ኢያኮ ባ። 16 አይሰ ጊኮ፣ ታ ሱንላ ጊሾ ኢ አይ ማላ ዋዩ ኤካናው ቤሲያኮ ታኒ ኢያ ቤሳና» ያጊሰ።

17 ሃናኔይ ቢዲ፣ ሶ ጌሊዲ፣ ባ ኩሺያ ሳያላ ቦላ ዋሊዲ፣ «ታ ኢሻ ሳያላ፣ ነኒ ያ ኦጊያን ኔው ቤንቲዳ ጎዳ ዩሱሲ፣ ነኒ ያላና ማላኔ ጌሻ አያናን ኩማና ማላ ታና ከቲሰ» ያጊሰ።

18 ኤሌሲዲ፣ ሳያላ አይፊያፔ ኢሲ ፖቆ ማላባይ ዋዲን፣ ሳያላ ናሞዓንሉ ያሊሰ። ቃሲ ዳንዲዲ ያማቄቲሰ። 19 ካሊ ሚዲ ያሊዲ፣ ዳማስቆን ዳዔያ አማኔይሳታራ ጉላ ጋላሰ ጋሞሲሰ።

ሳያላ ዳማስቆን ታማርሲሰ

20 ኤሌሲዲ ሳዖሊ፡ «ዩሱሲ ያሳ ናዓ» ያገዲ ዳማስቆን ዳዒያ ኣይሁዴ ዋሳ ከፋታን ቃላ ታማርሲስ።

21 ሄሳ ሲዒዲ ኡባይ ማላሌቲዲ፡ «ሃይሲ ዩሩሳላሜን ዩሱሳ ሱንሳ ጭይሳታ ቃቺይሳ ገዴኔዬ? ቃሲ ሃ ዩዲይ ኤንታ ቃቺዲ፡ ካሂኔ ሃላቃታ ሲንሴ ኤፋናሳ ገዴኔ?» ያገደሶና።

22 ሺን ሳዖሊ ቃላ ኦዶን ሚኒ ሚኒ ቢስ። ዩሱሲ፡ ኢ ኪሪስቶሳ ገዴይሳ ቆንጨሲዲ ኦዲዳ ገሾ ዳማስቆን ዳዒያ ኣይሁዴቲ ኢያው ዛሪያባ ጳዩደሶና።

23 ዳር ጋላሳፔ ጉዬ ኣይሁዴቲ ሺቂዲ፡ ሳዖላ ዋቆናው ዘሪቲደሶና። 24 ሺን ኣይሁዴቲ ባና ዋቆናው ቆፒደይሳ ሳዖሊ ሲዒስ። ኤንቲ ኢያ ዋቆናው ቃማኔ ጋላስ ካታማ ፔንገያን ናጎሶና። 25 ሺን ኢያ ታማሬቲ ኢያ ቃማ ኤፊዲ፡ ገምቤ ዲርሳ ማስኮቲያራ ዳቾራ ዋቆሲደሶና።

ሳዖሊ ዩሩሳላሜን ታማርሲስ

26 ሳዖሊ ዩሩሳላሜ ጋኪዳ ዋዴ ኣማኔይሳታራ ጋሂታናው ኮዩስ። ሺን ኢ ኪሪስቶሳ ኣማኒደይሲ ኤንታው ቱማ ዳኖና ኢጂን ኢያው ያዩደሶና። 27 ሺን ባርናባሲ ሳዖላ ሃዋሪታኮ ኤፊስ። ኦጌን ጎዳይ ዋኒዲ ቆንጨዳኮኔ ሃሳዩሲዳኮ፡ ቃሲ ሳዖሊ ዳማስቆን ዩሱሳ ሱንሳን ያኖና ዋቲዲ ቃላ ኦዲዳኮ ኤንታው ጌሺዲ ኦዲስ። 28 ሳዖሊ ዩሩሳላሜን ዩዩዲ ጎዳ ሱንሳን ያኖና ቃላ ኦዲሹ፡ ሃዋሪታራ ኢሲፌ ዳዒስ። 29 ቃሲ ሳዖሊ ገሪኬ ቃላ ሃሳያ ኣይሁዴታራ ኦዴቲሹ ፓላሜስ። ሺን ኤንቲ ኢያ ዋቆናው ኮዩደሶና። 30 ኣማኒያ ኣሳቲ ሄሳ ሲዒዲ፡ ሳዖላ ቁሳሪያ ኤፊዲ ቴርሴሴ ዩዲደሶና።

31 ዩሁዳን፡ ጋለላኒኔ ሳማሪ ኡባን ዳዒያ ዋሳ ከፋቲ ሳሮቴሳን ዳዒደሶና። ቃሲ ሚኒደሶና፤ ጎዳስ ያዩሹ ጌሻ ኣያና ሚንሴሉዋን ዳሪ ዳሪ ቢደሶና።

ጳዒርሲ ሊዳኒኔ ዮጳን ታማርሲስ

32 ጳዒርሲ ቢታ ኡባ ዩዩሹ ሊዳን ዳዒያ ኣማኒያ ኣሳታኮ ጋኪስ። 33 ያን ሆስፑን ላይሴ ኩሜሴ ጉንዲዲ ኣርሳን ዚንዒዲ ዳዒያ ኤኒያ ገያ ኣዲያ ዳሚስ። 34 ጳዒርሲ፡ «ኤኒያ፡ ዩሱስ ኪሪስቶሲ ኔና ፓላና፤ ዳንዳዳ ኔ ሂፃ ዳንላ» ያገሲ። ኢካ ኤሌሲዲ ዳንዲ ኤቂስ። 35 ሊዳኒኔ ሳርናን ዳዒያ ኣሳ ኡባይ ኤኒያ ቤዒዲ፡ ጎዳኮ ሲሚደሶና።

36 ዮጴ ካታማን ኢሲ ፃቢቶ ጊያ አማኒያራ ዳዓዉሱ። (ፃቢቶ ጉሳይ ገንዔ ጉሱ) ኢያ ባ ዳዒዳ ዋዴ ኡባን ሎፖባ ኦሳሼኔ ማንቆታ ማዳሼ ዳዓሱ። 37 ሄ ዋዴ ኢያ ሃርጋዳ ሃይቁን፣ አሳይ ኢ አሃ ሜጨዲ፣ ፖቁያ ቦላ ከሱዲ ዚንዒሲዶሶና። 38 ሊዲ ዮጴሰ ማታ። አማኔይሳቲ ጳዳርሲ ሊዲን ዳዔይሳ ሲዒዲ፣ «ሃያና ኑኮ ኤሌሳዳ ያ» ያጊያ ኪታ ናምዑ አሳታ ቦላ ኢያኮ ከቲዶሶና።

39 ሄሳ ጊሾ፣ ጳዳርሲ ዳንዲዲ፣ ኤንታራ ቢሰ። ያ ጋኪን፣ ፖቁያ ቦላ ዳዒያ ከፊሊያ ኢያ ጌልሲዶሶና። አምዔቲ ጳዳርሳ ዩሹዋን ኤቁዲ ዩኪሼ ዶርቃ ኤንታራ ፓፃ ዳዓሼ ኦሊዳ ቃሚሴታኔ አፊላታ ኡባ ጳዳርሳ ቤሲዶሶና። 40 ጳዳርሲ ኤንታ ኡባ ካሬ ከሱዲ፣ ጉልባቲዲ ያሳ ዋሲሰ። ቃሲ አሃኮ ሲሚዲ፣ «ፃቢቱ፣ ዳንዳ» ያጊሰ። ፃቢታ ባ አይፊያ ዶያዳ ጳዳርሳ ቤዓዳ፣ ዳንዳ ኡታሱ።

41 ጳዳርሲ ኢዮ ባ ኩሺያን ማዲዲ ዳንሏ ኤሲሰ። ሄሳፌ ጉዩ፣ አማኔይሳታኔ አምዔታ ፃጊዲ፣ ዳንዲዳር ኤንታ ሲንፍ ሺሺሰ።

42 ሃ ኦዳይ ዮጴ ካታማ ኡባ ጋኪሰ። ዳር አሳይ ጎዳ አማኒዶሶና። 43 ጳዳርሲ ዮጴን ሲሞና ጊያ ጋልባ ሃሼይሳ ሶን ዳር ጋላሰ ጋምዒሰ።

10

ጳዳርሳኔ ቆርኔሊዮሳ

1 ቂሳሪያን፣ «ፃሌ ኦላ አሳታ» ጌቲቲያ ኦላንቸታ ጊዶን ኢሲ ቆርኔሊዮሳ ጌቲቲያ ማቶ ሃላቃይ ዳዔሰ። 2 ቆርኔሊዮሲ ባ ሶ አሳራ ያሳ ሚንሏ አማኒያ አሲኔ ያሳ ጎይኒያ አሲ። አይሁዴ ማንቆታካ ዳር ማዴሰ፣ ቃሲ ያሳ ኡባ ዋዴ ዋሴሰ። 3 ኢሲ ጋላሰ ኡዲፋን ሳቲ ሄራን ያሳ ከታንቸይ ኢያኮ ዩዲ፣ «ቆርኔሊዮሳ» ጊዲ ፃጊሺን ኢ ቆንጩላን ጌሺዲ ቤዒሰ።

4 ቆርኔሊዮሲ ዳጋሚዲ ከታንቸዋ ቲሺ ኦሊ ፃሊዲ፣ «ጎዳው፣ ኢ አይቤ?» ያጊሰ።

ከታንቸይ ዛሪዲ፣ «ኔ ዋሳይኔ ማንቆታ ኔ ማዴይሲ ያሳ ሲንላን ሃሳዬቲሰ። 5 ሃዒ ዮጴ አሴ ከታዳ፣ ጳዳርሳ ጊያ ሲሞና ኤሂሳ። 6 ጳዳርሲ አባ ዶናን ጋልባ ሃሺያ ሲሞና ሶን ኢማላቲሏ ሲራቲሰ» ያጊሰ።

7 ቆርኔሊዮሲ ባው ኦዲዳ ከታንቸይ ቢን፣ ባ አይሌታፔ ናምዓታኔ ያሳ ጎይኒያ ባ ማታ ዋታዳሬታፔ ኢሱዋ ፃጊዲ፣ 8 ኤንታው ኡባባ ኦዲዲ ዮጴ ከቲሰ።

9 ዋንቴላ ጋላስ ኤንቲ ቢዲ፣ የጴ ካታማ ማቴሺን ኡሱፑን ሳቴ ሄራን ያሳ ዋሳናው ጴጋርሲ ፖቄ ቦላ ኬይሰ። 10 ኢ ኮሻቲዲ ካሊ ማናው ኮዩሰ፣ ሺን ካሊ ካዲሺን ኢ ቆንጩላ ቤዲሰ። 11 ሳሎይ ዶዬተን፣ ጌታ አፊላ ዳኒያባይ ኦይዲ ባጋራ ኦይኬቲዲ ዋጲሺን ኢ ቤዲሰ። 12 ኢያን ኦይዲ ቶሆራ ዳዲያ ሜሄቲ፣ ዋራ ዶዳቲ፣ ኡሎራ ጎሼቲያ ሜጴቴላቲኔ ሳሎ ካፎቲ ኡባይ ዳዔሰ። 13 ሄ ዋዴ «ጴጋርሳ፣ ዳንዳ ኤቃዳ ሹካዳ ማ» ጌያ ቃሊ ኢያኮ ዩሰ።

14 ሺን ጴጋርሲ፣ «ጎዳው፣ አካይ! ታ ቱናባ ኡባራካ ማ ኤሪኬ» ያጌሰ።

15 ቃሲ፣ «ዎሳይ ጌሺዳይሳ ኔኒ ቱና ጎፓ» ጌያ ቃሊ ናሞዳንላ ኢያኮ ዩሰ። 16 ሄሲካ፣ ሄሹ ቶሆ ሃኒዳፔ ጉዬ ሄ ጌታ አፊላ ዳኒይሲ ኤሌሲዲ ፑዴ ሳሎ ኤኬቲሰ።

17 ጴጋርሲ ባ ቤዲዳ ቆንጩላ ቢርሼላይ፣ «አይ ጌዳንዴሻ?» ጌዲ ባ ዋዛናን ቆፒሺን፣ ቆርኔሊዮሲ ከቲዳ አሳቲ ሲሞና ሶ ኦይቺ ዳሚዲ ካሬን ኤቂዶሶና። 18 ባንታ ቃላ ቶቄ ኦሊዲ፣ «ጴጋርሳ ጌያ ሲሞኒ ኢማላቴላን ዳዔይ ሃይሳኔ?» ያጌዲ ኦይቺዶሶና።

19 ጴጋርሲ ቆንጩላን ቤዲዳባ ቆፋ ቦላ ዳዲሺን፣ ጌሻ አያኒ ኢያኮ፣ «ሄኮ፣ ሄሹ አሳቲ ኔና ኮዮሶና። 20 ዳንዳዳ ዋቆ፣ ታኒ ኤንታ ከቲዳ ገሾ ሲቶና ኤንታራ ባ» ያጌሰ።

21 ጴጋርሲ አሳታኮ ዋጲዲ፣ «ሂንቴ ኮዬይ ታና፤ አይሰ ዩዳቲ?» ያጌሰ።

22 ኤንቲ ዛሪዲ፣ «ኑና ማቶ ሃላቃይ ቆርኔሊዮሲ ከቲሰ። ኢ ያሎ፣ ያሳ ጎይኒያ አሲኔ አይሁዴ አሳ ኡባን ዳር ቦንቼቲዳ አሲ። ቆርኔሊዮሲ፣ ኔና ባ ሶ ኤሂሲዲ ቃላ ኔፔ ሲዳና ሜላ ጌሻ ከታንቸይ ኢያው ኦዲሰ» ያጌዶሶና። 23 ጴጋርሲ አሳታ ሶ ጌልሲዲ ሞኪሰ።

ዋንቴላ ጋላስ፣ ዳንዲዲ ኤንታራ ቢሰ። የጴ ካታማን ዳዲያ አማኔይሳታፔ ኢሶቲ ኢሶቲ ኢያራ ኢሲፌ ቢዶሶና። 24 ዋንቴላ ጋላስ፣ ቁሳሪያ ጋኪዶሶና። ቆርኔሊዮሲ ባ ዳቦታኔ ባ ማታ ላጌታ ሄሲፌ ያጌ ሺሺዲ፣ ጴጋርሳ ናጌሰ። 25 ጴጋርሲ ሶ ጌላና ካሲሺን፣ ቆርኔሊዮሲ ኢያራ ጋሄቲዲ ኢያ ሲንላን ኩንዲዲ ኢያው ጎይናናው ኮዩሰ። 26 ሺን ጴጋርሲ፣ «ዳንዳ፣ ታካ ታ ሁዔን ኔ ሜላ አሲ» ያጌዲ ኢያ ዳንሳሰ።

27 ጴጋርሲ ቆርኔሊዮሳራ ኦዳቲሼ ሶ ጌሊያ ዋዴ ዳር አሳይ ሸቁዳይሳ ዳሚሰ። 28 ኢ አሳኮ፣ «አይሁዴ አሲ ሃራ ዳሬራ ኢሲፋናው ዋይኮ ጋሄታናው ዋጋ ጌዶናይሳ ሂንቴ ኤሬታ። ሺን

ታኒ ኦናካ ቱና ዋይኮ ጌሺ ጊደና ጎና ሜላ ያሳይ ታና ቤሲስ።
29 ሄሳ ጊሾ፣ ሂንቲ ታኮ ከቲን ኢያይ ባይና ያሰ። ሃዲ ታና ኣይሰ
ፃጊሲዳኮ ታው ኦዲቲ» ያገሰ።

30 ቆርኔሊዮሲ፣ «ታኒ ሃቺ ኦይዲ ጋላሳፔ ካሴ ሃኖዴ ኡዲፋን
ሳቲ ዋሳ ዋሲሺን፣ ጰሊያ ማፖ ማዒዳ ኣሲ ታ ሲንፋን ኤቁስ።
31 ኢ ታኮ፣ «ቆርኔሊዮሳ፣ ያሳይ ኔ ዋሳ ሲዒስ፣ ኔኒ ማንቆታ
ማዲዳይሳካ ሃሳይስ። 32 ሂዛ፣ ኣሴ ዮጴ ከታዳ፣ ሲሞን ጳዒርሳ
ጌይሳ ፃጊሳ። ኢ፣ ሲሞና ጊያ ጋልባ ሃሺያ ኡራ ሶን ኣባ ዶናን
ሲራቲስ» ያገሰ። 33 ሄሳ ጊሾ፣ ታኒ ኔኮ ኤሌሳዳ ከታሰ፤ ኔ ሎፖ
ያዳሳ። ሂዛ፣ ያሳይ ኔና ከቲዳባ ኡባ ሲዓናው ሃዲ ኑኒ ኡባይ
ሃይሳን ጎዳ ሲንፋን ዳዖስ» ያገሰ።

ጳዒርሳ ሃሳያ

34 ካሊዲካ፣ ጳዒርሲ፣ «ያሳይ ኣሳ ሶሞፖ ቤዒዲ ኣሴ ኣሳፔ
ሻኬና። 35 ሺን ኣሴ ኡባ ኦና ጊዲኮካ ባው ያዬይሳኔ ዓሎ ኦሶ
ኦሌይሳን ያሳይ ኡፋይቲይሳ ታኒ ቱማ ኣኮካሰ። 36 ያሳይ፣ ኡባ
ጎዳ ጊዲዳ ዬሱስ ከሪስቶሳ ባጋራ ሳሮቱፋ ኦዲሼ ሃ ዋንጌላ
ኢስራዔሌ ኣሳስ ከቲዳይሳ ሂንቲ ኤሬታ። 37 ዮሂሲ ዊንቃቲባ
ጋለላን ሳባኪዳ ዋዲያፔ ዶሚዲ ዪሁዳ ቢታ ኡባ ጋካናው
ሃኒዳባ ሂንቲ ኤሬታ። 38 ያሳይ ናዚሬቲ ዬሱሳስ ጌሻ ኣያናኔ
ዋልቃ ኣሚስ። ያሳይ ኢያራ ዳዒያ ጊሾ ሎፖባ ኢ ኦሊሼ ዓላሄ
ኩሺን ሃሬቲዳ ኡባ ፓሊሼ ዩዩስ።

39 «ኣይሁዳ ቢታኒኔ ዬራሳላሚን ኢ ኦሊዳ ኡባባስ ኑኒ
ማርካታ። ኤንቲ ማስቃሊያ ቦላ ካቁዲ ኢያ ዋዲዳሶና። 40 ሺን
ያሳይ ሄቫንፉ ጋላሳን ሃይቆፔ ኢያ ዳንሳዲ ኣሳስ ቆንጫና ሜላ
ኦሊስ። 41 ሄ ቆንጫላይ ያሳይ ኮይሮ ዶሪዳ ማርካታሳፊ ኣቲን
ኣሳ ኡባስ ጊዳና። ኢ ሃይቆፔ ዳንዲዳፔ ጉዬ ኢያራ ሚዳኔ
ኡዩዳ። 42 ኑኒ ዋንጌላ ኣሳስ ኦዳና ሜላኔ ፓፖ ዳዔይሳታ ቦላኔ
ሃይቆዳይሳታ ቦላ ፐርዳናው ያሳይ ሹሚዳይ ዬሱሳ ጊዳይሳ
ማርካታና ሜላ ኑና ከቲስ። 43 ያሳይ ኢያ ኣማኒያ ኡባ ናጋራይ፣
ኢያ ሱንፋን ኣቶ ጌቲይይሳ ናቤቲ ማርካቶሶና» ያገሰ።

ኣይሁዳ ጊደና ኣሳቲ ኣማኒዲ ጌሻ ኣያና ኤኪደሶና

44 ጳዒርሲ ቡር ሄ ኦዳ ኦንጎናሺን ቃላ ሲዒያ ኡባ ቦላ
ጌሻ ኣያኒ ዋዲስ። 45 ጳዒርሳራ ዮጴፊ ዩዳ ኣማኒያ ቃዓሬቲዳ
ኣይሁዳ ኡባይ፣ ኣይሁዳ ጊደናይሳታ ቦላ ጌሻ ኣያኒ ጉኪዳ ጊሾ

ማለሌቲዶሶና። 46 ጋሶይካ፣ ኤንቲ ዱማ ዱማ ዶናን ሃሳዪሺኒኔ ያሳ ጌታቴላ ሳቢሺን ሲዒዶሶና።

ሄ ዎዴ ጳዲሮሲ ዛሪዲ፣ 47 «ሃይሳቲ ቃሲ ኑ ማላ ጌሻ ኣያና ኤኪዳይሳቲ ፃማቄቶና ማላ ሃሌ ዲጋናይ ኦኔ?» ያጊሰ። 48 ኤንቲ ዩሱስ ኪሪሰቶሳ ሱንላን ፃማቄታና ማላ ኤንታ ኪቲሰ። ሄሳፌ ጉዩ፣ ኤንቲ ባንታራ ጉላ ጋላስ ኡታና ማላ ጳዲሮሳ ዎሲዶሶና።

11

ጳዲሮሲ ባ ኦሊዳባ ዩሩሳሌም ዎሳ ኬላስ ኦዲሲ

1 ሃዋሪቲኔ ዩሁዳ ኡባን ዴዒያ ኣማኔይሳቲ፣ ኣይሁዴ ጊዶናይሳቲካ ያሳ ቃላ ኤኪዳይሳ ሲዒዶሶና። 2 ጳዲሮሲ ዩሩሳሌም ቢዳ ዎዴ ቃፃሬቲዳ ኣማኔይሳቲ፣ 3 ኢያኮ፣ «ኔኒ ቃፃሬቲቦናይሳታኮ ጌላዳ ኤንታራ ካሊ ኣይሰ ማዲ?» ያጊዶሶና።

4 ሺን ጳዲሮሲ ሃኒዳባ ኮይሮፔ ዶሚዲ ማራን ማራን ኦዲሰ። 5 «ታኒ ዮጴ ካታማን ያሳ ዎሳሼ ቆንጩሊ ቤዓሰ። ጌታ ኣፊላ ዳኒያባይ ኦይዱ ባጋራ ኦይኬቲዲ ሳሎፔ ዎጲሼ ታኮ ዩሰ። 6 ታኒ ቲሺ ኦላ ኢያ ጊዶ ያሊያ ዎዴ ኦይዱ ቶሆራ ዴዒያ ማህታ፣ ዎራ ዶዓታ፣ ኡሎራ ጎሼቲያ ማጴቴላታኔ ሳሎ ካፎታ ቤዓሰ። 7 <ጳዲሮሳ፣ ዴንዳ፣ ሹካዳ ማ) ጊያ ቃላ ሲዓሰ።

8 «ሺን ታኒ፣ ሳዳው፣ ኣካይ፣ ቱናባይ ዎይኮ ጌዮናባይ ኡባካ ታ ዶናኮ ሸቄ ኤሬና) ያጋሰ።

9 « <የሳይ ጌሺዳይሳ ኔኒ ቱና ጎጋ) ያጊያ ቃሊ ናሞዓንሉ ሳሎፔ ዩሰ።

10 «ሄሲ ሄሹ ቶሆ ሃኒን፣ ዉርሴላን ኡባባይ ሳሎ ፑዴ ኤኬቲሰ። 11 ሄ ሳቲንካ ሄሹ ኣሳቲ ቁሳሪያፔ ታኮ ኪቲቲዲ ታኒ ዴዒያ ኬላ ጋኪ ኣጊዶሶና። 12 ሲዶና ኤንታራ ባና ማላ ኣያናኢ ታው ኦዲሰ። ቃሲ ሃ ኡሱፑን ኣሻቲ ዮጴፌ ታራ ቁሳሪያ ቢዳይሳታራ ቆርኔሊዮሳ ሶ ጌሊዳ። 13 ኪታንቾይ ኢያ ሶን ኤቂዲ፣ <ዮጴ ኪታዳ ጳዲሮሳ ጌቲቲያ ሲሞና ያጊሳ። 14 ኔናኔ ኔ ሶ ኣሳ ኡባ ኣሺያ ቃላ ኢ ኔው ኦዳና) ጊዳይሳ ቆርኔሊዮሰ ኦሰ ኦዲሰ።

15 «ታኒ ሃሳያ ዶሚያ ዎዴ ጌሻ ኣያናይ ኮይሮ ኑ ቦላ ዎጲዳይሳዳ ኤንታ ቦላካ ዎጲ ኣጊሰ። 16 ሄ ዎዴ <ዮሃኒሲ ሃላን ፃማቂሰ፣ ሺን ሂንቲ ጌሻ ኣያናን ፃማቄታና) ያጊዳ ጎዳ ቃላይ ታው ቆፊቲሰ። 17 ያሳይ ኦሰ ጎዳ ዩሱስ ኪሪሰቶሳ ኣማኒዳይሳታሰ

አሚዳ አሞታ አይሁዳ ጊደናይሳታሰካ አሚኮ፣ ያቲን ያሳ ዲጋናው ታኒ ኦኔ?» ያገሰ።

18 ኤንቲ ሄሳ ሲዒዳ ዋዴ ባንታ ፓላማ አገዲ፣ «ሄሳ ገዲኮ፣ ያሳይ አይሁዳ ጊደናይሳቲካ ናጋራፔ ሲሚዲ ዴዎን ዳናዳ ቃዳ አሚሰ» ያገዲ ያሳ ጋላቲዶሶና።

አንጾኪያ ዋሳ ኬፋ

19 ኢሰዊፋናሴ ሃይቆስ ጋሊዳ ጎዳ ጋሶን ላሌቲዳ አማኔይሳቲ ቃላ አይሁዳታ ፃላላሰ ኦዲሼ ሲሮሬንቁ፣ ቆጶሮሳኔ አንጾኪያ ጋካናው ዩዩዶሶና። 20 ሸን ቆጶሮሳፔኔ ቁሬናፔ ዩዳ ኢሲ ኢሲ አማኒያ አሳቲ አንጾኪያ ቢዲ፣ ጎዳ ዬሱሳ ዋንጌላ ገሪሴ አሳሰካ ኦዲዶሶና። 21 ጎዳ ዋልቃይ ኤንታራ ዴዔሰ፤ ቃሲ ዳሮ አሳይ አማኒዲ ጎዳኮ ሲሚዶሶና።

22 ሄ ኦዳ ዬሩሳላሚን ዴዒያ ዋሳ ኬፋይ ሲዒዳ ገሾ ባርናባሳ አንጾኪያ ከቲሰ። 23 ባርናባሲ አንጾኪያ ቢዳ ዋዴ ያሳ አጾ ኬሃቴፋ ኦሱዋ ቤዒዲ ኡፋይቲሰ። ኤንቲ ኡባይ ባንታ ኩሜፋ ዋዛናን ጎዳን ሚኒዲ ዳና ሜላ ኤንታ ዞሪሰ። 24 ባርናባሲ ጌሻ አያናይኔ አማናይ ኩሚዳ ሎዎ ኢሲ ገዲያ ገሾ ዳሮ አሳይ ጎዳ አማኒዶሶና።

25 ሄሳሬ ጉዬ፣ ባርናባሲ ሳዎላ ኮያናው ቱርሴሴ ቢሰ። 26 ያን ሳዎላ ዴሚዳ ዋዴ አንጾኪያ ኤኪዲ ዩሰ። ባርናባሲኔ ሳዎላ ዋሳ ኬፋ አሳራ ላይላ ኩሜላ ኡቲዲ ዳሮ አሳ ታማርሲዶሶና። አማኔይሳቲ አንጾኪያን «ከሪሰታኔ» ጌቲቲዲ ኮይሮ ያጌቲዶሶና።

27 ሄ ዋዴ ኢሲ ኢሲ ናቤቲ ዬሩሳላሚፔ አንጾኪያ ዋዲዶሶና። 28 ኤንታ ገደሬ አጋቦሳ ጌይሲ ዴንዲዲ ቢታ ኡባን ገታ ኮሺ ኬያናይሳ አያና ዋልቃን ቲንቢቲ ኦዲሰ። ሄሲ ሃኒዳይ ሮሜ ካዉዋ ቃላዉዲዮሳ ዋዴና። 29 አማኔይሳቲ ሁዒን ሁዒን ባንታ ዋልቃ ሜላ ሚሼ ኬሲዲ ዩሁዳን ዴዒያ አማኔይሳታሰ ማዴ ዬዳናው ቆፋ ቃቺዶሶና። 30 ኤንቲ ሄሳዳ ኦሊዲ፣ ሚሺያ ባርናባሳ ቦላኔ ሳዎላ ቦላ ዋሳ ኬፋ ጨማታሰ ዬዲዶሶና።

12

ዋሳ ኬፋ ቦላ ዋልቃማ ጎዲ ጋኪሰ

1 ሄ ዎዴ ካዎይ ሄሮዲሲ * ዋሳ ኬፋ አሳፔ ባጋ ጎዳ ደሚሰ። 2 ዮሃንሳ አሻ ያይቆባ ማሻን ዎቋሲሰ። 3 ሄሲ አይሁዳታ ኡፋይሲዳይሳ ቤዒዲ፣ ጉጂዲ ጳዳርሳካ ኦይሊሰ። ሄሲ ሃኒዳይ ፓሲካ ባሌ ቦንቹያ ጋላሳታና። 4 ጳዳርሳ ኦይኪዲ ቃቹሰ። ፓሲካ ቦንቹያ ጋላሳታፔ ጉዬ ዳሪያ ሲንፎ አፋናው ቆፐዲ፣ ኦይዲ ኦይዲ ዎታዳሬቲ ኢያ ናጋና ሜላ ታማኔ ኡሱፑን ዎታዳሬታሰ አሊ ኢሚሰ። 5 ሄሳ ጊሾ፣ ጳዳርሲ ቃሾ ኬፋን ናጌቲሰ። ሺን ዎሳ ኬፋ አሳይ ኢያው ሚንፎዲ ያሳ ዎሶሶና።

ኪታንቹይ ጳዳርሳ ቃሾ ኬፋፊ ኬሲሰ

6 ሄሮዲሲ ጳዳርሳ አሳ ሲንፎ ሺሻናፔ ካሴ ቃማ ጳዳርሲ ናምቡ ባጋራ ናምቡ ዎታዳሬታራ ሳንፋላታን ቃሾቲዲ ኤንታ ጊደን ቋሰኪሰ። ናጌይሳቲ ቃሾ ኬፋ ፔንጌታን ኤቁዲ ናጎሶና። 7 አኩሶና ዳዒሺን ጎዳ ኪታንቹይ ቆንጨሰ። ቃሾ ኬፋን ፖይ ፖዒሰ። ኪታንቹይ ጳዳርሳ ሚያ ቦቹ ባርኪሲዲ፣ «ኤሌ ዳንዳ» ያጊሰ። ኢራካ ሳንፋላታይ ኢያ ኩሺያፔ ዎቋ አጊሰ። 8 ኪታንቹይ ኢያኮ፣ «ኔ ማቡዋ ማዓ፣ ኔ ጫማካ አፋ» ያጊሰ። ጳዳርሲ ሄሳዳ ኦሊሰ፤ ኪታንቹይ፣ «ኔ ላፃና ማዓዳ ታና ካላ» ያጊሰ።

9 ጳዳርሲ ቃሾ ኬፋፊ ኬዪዲ ኪታንቹዋ ካሊሰ። ኢያው ቆንጨፎሊ ቤዒያባ ዳኒሲፔ ኦቲን ኪታንቹይ ኦሊያባይ ቱማ ዳኒቤና። 10 ኪታንቹይኔ ጳዳርሲ ኮይሩዋኔ ናምዓንፉ ዎታዳሪያ ኦቋዲ ካታማ ኤፊያ ቢራታ ፔንጊያኮ ጋኪደሶና። ፔንጌይ ኤንታው ባርካ ደዬቲ አጊሰ። ኤንቲ ኬዪዲ ኢሲ ኦጊያራ ቢሺን ኪታንቹይ ኦኩሶና ጳዳርሳፔ ሻኬቲ አጊሰ።

11 ጳዳርሳሰ ዎዛኒ ሲሚን፣ «ታና ጎዳይ ባ ኪታንቹዋ ከቲዲ፣ ሄሮዲሳ ኩሼፔኔ ናጊዲ ኡቲዳ አይሁዳ አሳ ኡባፊ አሺዳይሳ ሃዒ ቱማ ኤራሰ» ያጊሰ።

12 ኢ ሄሳ አኩኪዳ ዎዴ ዳሮ አሳይ ኢሲፊ ሸቁዲ ያሳ ዎሲያ ቤሳ፣ ማርቆሳ ጊያ ዮሃንሳ አዬ ማይራሚ ሶ ቢሰ። 13 ያን ካሬን ኤቁዲ ያጊሰ። ኢሲ ሮዳ ጊያ ኦሳንቹያ ፔንጊያ ዳያናው ያሱ። 14 ሮዳ ጳዳርሳ ቃላ ጊዲዳይሳ ኤሪዳ ዎዴ ኡፋይሳን ኩማዳ ካሪያ ደዬና ጉዬ ዎፃ ባዳ፣ «ጳዳርሲ ካሬን ኤቁሰ» ያጋዳ አሳሰ ኦዳሱ።

* 12:1 ካዎይ ሄሮዲሲ፣ ሃይሲ ካዎይ ሄሮዲሲ፣ ሄሮዲሳ አገርጳ ጊያ ኮይሩዋ። ኢ፣ 37-44 ማርቆሳ ላይላ ጋካናው ሃሪሰ። ኢ ካወዋ ሄሮዲሳሰ ናዓ ናዓ 12:4 ኬሳ 12:1-27

15 አሳይ አኮ፡ «ኔኒ ጎያይ!» ያጊደሶና። ሮዳ ጳጳርሳ ጊዲዳይሳ ገሻዳ ኦዳሱ። ኤንቲ፡ «ሄሲ አያ ናጊያ ኪታንቹዋ» ያጊደሶና።

16 ሺን ጳጳርሲ ካሬን ኤቁዲ ጭዲ አጎና አዲን አሳይ ካሪያ ዶዩዲ አያ ቤዒዲ ማላሌቲደሶና። 17 ሺን ኤንቲ ሲዒ ጋና ማላ ጳጳርሲ ባ ኩሺያን ማሊዲ ጎዳይ ቃሾ ከላፌ አያ ዋቲ ከሲዳኮ ኤንታው ቆንጨሲ ኦዲዲ፡ «ሃይሳ ያይቆባሲኔ አማኒያ አሳታሰ ኦዲቲ» ጊዲ ያፔ ከዩዲ ሃራሶ ቢሰ።

18 ሳዒ ዋንቲያ ዋዴ «ጳጳርሲ አው ቢዴ» ጊዲ ዋታዳሬቲ ዋሊ ጊደን ዳሮ ካጨደሶና። 19 ሄሮዲሲ ጳጳርሳ ኮዩሲን፡ ኢ ቆዩዳ ዋዴ ናጌይሳታ ቆሪዲ፡ ኤንታ ዋቆና ማላ ከቲሰ። ሄሳፌ ጉዬ፡ ሄሮዲሲ ዪሁዳፔ ቁሳሪያ ዋቆዲ ያን ጉላ ዋዴ ኡቲሰ።

ሄሮዲሳ ሃይቁዋ

20 ሄሮዲሲ ጳጳርሳ አሳ ቦላኔ ሲደና አሳ ቦላ ዳሮ ሃንቁቲሰ። ኤንታ ቢታይ ካሉ ሄሮዲሳ ቢታፌ ዴሚያ ጊሾ ኤንቲ አሲፌ ጊዲዲ አያ ዋሪና ቢላሰጻሳ ባንታው ጨማ ኦሉዲ ጊጋናው ሄሮዲሳኮ ቢደሶና።

21 ሄሮዲሲ ሱንሉዳ ጋላሳን ባ ካዋቱላ አፊላ ማዒዲ፡ አራታ ቦላ ኡቲዲ አሳሰ ኦዲሰ። 22 አሳይ፡ «ሄሲ ጻሳ ቃላ፡ አሳ ቃላ ጊዳና» ያጊዲ ዋሲደሶና። 23 ሄሮዲሲ ጻሳ ቦንቹቦና ጊሾ ኢራካ ጎዳ ኪታንቹይ አያ ዴቹን ጉፁኔን ማቴቲዲ ሃይቁሰ።

24 ሺን ጻሳ ቃላይ ዲጨሽኔ ዳልጊሽ ቤሰ።

25 ባርናባሲኔ ሳያሊ ባንታ ኦሱዋ ፖሊዲ ማርቆሳ ጊያ ዮሃኒሳ ባንታራ ኤኪዲ ዬሩሳላሜፔ ሲሚደሶና።

13

ባርናባሲኔ ሳያሊ ከቲቲደሶና

1 አንጾኪያን ዴዒያ ዋሳ ከላን ናቤቲኔ አሰታማሬቲ ዴዎሶና። ኤንቲ ባርናባሳ፡ ካሬሉ ጌቲቲያ ሲሞና፡ ቁሪናፔ ዪዳ ሉኪዮሳ፡ ካወዋ ሄሮዲሳራ ዲጨዳ ሚናሄኔ ሳያላ። 2 ኤንቲ ጎዳ ጎይኒሺኒኔ ያሚሸን ገሻ አያናይ፡ «ታኒ ጭዳ ኦሱዋሰ ባርናባሳኔ ሳያላ ታው ዲማዩቲ» ያጊሰ።

3 ሄሳ ጊሾ፡ ኤንቲ ያሚዳፔኔ ዋሲዳፔ ጉዬ ባንታ ኩሺያ ኤንታ ቦላ ዋሉዲ ዬዲደሶና።

ባርናባሲኔ ሳያሊ ቆጶርሳ ቢደሶና

4 ሄሳ ገሸ፡ ገሻ አያሌ ከንታ ከተሰ። ሴሌወቄ ቢደሰና፤ ያፔ ማርባቤን ገሌዲ ቆጶሮሳ ሃላን ቴቄተዳ ቢታ ቢደሰና። 5 ኤንቲ ሲልማና ጋኪዲ አይሁዳ ዋሳ ከላታን ያሳ ቃላ ኦዲደሰና። የሃሊሲ * ማዲሼ ከንታራ ዳዕስ።

6 ኤንቲ ቆጶሮሳ ሃላን ቴቄተዳ ቢታ ካንሉዲ ጳፉ ጋኪያ ዋዳ ኢሲ ዋርዳንቸ ናቢያ ባር-ዩሱሳ ገያ አይሁዳ ማሩዋ ዳሚደሰና።

7 ሄ ማርይ ዳሪያ አይሲያ ሳርጊዮስ ጳውሎሳ ገያ አከካንቸ አዲያራ ዳዕስ። ሳርጊዮስ ጳውሎሲ ባርናባሳኔ ሳያላ ባኮ ያጊዲ ያሳ ቃላ ሲዳናው ኮዩስ። 8 ሺን ገሪኬ ዶናን ማሩዋ ሱንላይ «ኤልማሳ» ጌቲቲስ። ኢ ዳሪያ ሃሪይሲ አማናና ሜላ ዲጋናው ኮዩዲ ባርናባሳኔ ጳውሎሳራ ኤቄተስ።

9 ሺን ጳውሎሳ ገያ ሳያሊ ገሻ አያናን ኩሚዲ ማሩዋ ጫዲ ያሊዲ፣ 10 «ላ፣ ያላሄ ናዓው፣ ኢታቲሉ ኡባይ ኩሚዲይሶ፣ ያሎቴላ ኡባስ ዋርኪያው፣ ሱሬ ጎዳ ኦጊያ ሚርቄይሳ ኣገኪ? 11 ሄኮ፣ ሃዒ ጎዳ ኩሼይ ኔ ቦላ ዳዕስ። ኔኒ ቆቄ ገዳና፤ ጉላ ዋዳስ አዋ ፖያ ቤዓካ» ያገሰ።

ኢራ ጫጋናይኔ ጳማይ ኢያ አይፊያ ጎዘን፣ ባ ኩሺያ ኦይኪዲ ካሌሌያ አሲ ኮዩሼ ዩዩስ። 12 ዳሪያ ሃሪይሲ ሄሳ ቤዒዳ ዋዳ ጎዳባ ታማርሴይሳን ማላሌቲዲ አማኒስ።

ባርናባሳኔ ጳውሎሲ ጲሲዲያ አንጾኪያ ቢደሰና

13 ጳውሎሲኔ ኢያራ ዳዕይሳቲ ጳፉፔ ዳንዲዲ፣ ጲንፊሊያን ዳዒያ ጳርጌ ማርባቤራ ቢደሰና። የሃሊሲ ከንታፊ ቫኬቲዲ ዩሩሳላሜ ሲሚስ። 14 ሺን ኤንቲ ጳርጌፊ አዲዲ ጲሲዲያን ዳዒያ አንጾኪያ ጋኪደሰና። ሳምባታ ጋላስ አይሁዳ ዋሳ ከሌ ገሌዲ ኡቲደሰና። 15 ሙሴ ሂጌይኔ ናቤታ ማፃፋይ ናባቤቲዳፔ ጉዩ አይሁዳ ዋሳ ከላ ሃላቃቲ፣ «ኑ ኢሻቶ፣ አሳ ሚንሌሌያ ቃሊ ሂንቲው ዳዒያኮ አሳስ ኦዳርኬቲ» ያገዲ ከንታኮ ከቲደሰና።

16 ጳውሎሲ ዳንዲ ኤቄዲ ባ ኩሼ ማሊዲ፣ «ኢስራዔሌ አሳታው፣ ቃሲ ያሳ ጎይኒያ አይሁዳ ገደና አሳው፣ ሲዒቲ። 17 ሃ ኢስራዔሌ አሳ ያሳይ፣ ኑ ማይዛታ ዶሪስ። ገብፄ ቢታን አማላቴላን ኤንቲ ዳዒሺን፣ ኤንታ ዳርሲዲ ባ ገታ ዋልቃን ገብፄ ቢታፊ ኤንታ ኬሲስ። 18 ባዞ ቢታን ኦይታው ላይላ ሜላ ኤንታ ዳንዳዒስ። 19 ካናኔ ቢታን አይሁዳ ገደና ላፑን

* 13:5 የሃሊሲ፡ ሃ ቤሳን ያፊቲዳ የሃሊሲ፡ ሃዋሪያ የሃሊሳ ገደናሺን የሃሊሲ ማርቆሳ ጌቲቲያ ማርቆሳ ዋንጌላ ያፊዳይሳ። 13:17 ከሳ 1:7፤ ከሳ 12:51 13:18 ታይ 14:34፤ ዛሬ 1:31

ካዎቱላታ ዲጊዲ ኤንታ ቢታ ባ አሳ ላቲሲስ። 20 ሄሳፌ ጉዬ፥ ናቢያ ሳሙዔል ዋዴ ጋካናው ኦይዲ ጭታኔ አሻታሙ ላይላ ሜላ አይሲያ ዳይናታ ኤንታው ኢሚስ። 21 ሄሳፌ ጉዬ፥ ኤንቲ ባንታው ካዎ ኢማና ሜላ ዋሲን፥ ያሳይ ቢኒያሜ ሼሻፕ ዊሴ ናዓ፥ ሳዖላ ኦይታሙ ላይላ ካዎታና ሜላ ኤንታው ኢሚስ። 22 ያሳይ ሳዖላ ሻሪዳፔ ጉዬ ኤንታ ቦላ ዳዊቲ ካዎሊስ። ያሳይ ዳዊቲባ ማርካቲሼ፥ ታኒ ኮያ ኡባ ታ ዎዛና ሜላ ኦሊያ ኢሴዬ ናዓ ዳዊቲ ዴማስ) ያገሰ።

23 «ያሳይ፥ ታኒ ዳዊቲ ሼሻፕ ኢሰራዔሌ ዴሪያ አሼይሳ ኤሃና ጊዳይሳ ሜላ ዬሱሳ ኤሂስ። 24 ዬሱሲ ያናፔ ሲንሌ ኢሰራዔሌ አሳ ኡባይ ባንታ ናጋራፔ ሲሚዲ ፃማቂታና ሜላ ዮሃኒሲ ቃላ ኦዲስ። 25 ቃሲ ዮሃኒሲ ባ ኦሱዋ ወርሳና ሃኒሼ አሳኮ፥ ታና ኦና ጊዲ ቆፔቲ? ታኒ ሂንቲ ናጊያ ኪሪስቶሳ ጊዲኬ፥ ሺን ታኒ ኢያ ጫማ ቢርሻናው ታው ቤሶናይሲ ታፔ ጉዬራ ዬስ) ያገሰ።

26 «አሻቶ፥ አብራሃሜ ሼሻቶ፥ ቃሲ ሃይሳን አይሁዴ ጊዳናሺን ያሳስ ያዬይሳቶ፥ ሃ አቶቱላ ቃላይ ኮስ ከቲቲስ። 27 አይስ ጊኮ፥ ዬሩሳላሜን ዴዲያ አሳይኔ ኤንታ ሃላቃቲ ዬሱሳ ኤሪቦኮና። ሳምባታ ኡባን ናባቤቲያ ናቤታ ቃላ አክኪቦና ጊሾ ኢያ ቦላ ፐርዲዲ ናቤቲ ኦዲዳ ቃላ ፖሊደሶና። 28 ዬሱሳ ዎዲሳናው ኢሲ ጋሶይካ ቆዩን ጲላዖሲ ኢያ ዎዳና ሜላ ዋሲደሶና። 29 ኤንቲ ዬሱሳባይ ጌሻ ማፃፋን ፃፌቲዳባ ኡባ ፖሊዳ ዎዴ ማስቃሊያፔ ኢያ ዎዲሲዲ ሞጊደሶና። 30 ሺን ያሳይ ሃይቆፔ ዬሱሳ ዴንሊስ። 31 ሄሳፌ ጉዬ፥ ኢ ባራ ጋሊላፔ ዬሩሳላሜ ዬዳይሳታስ ዳር ቶሆ ቤንቲስ። ኤንቲ ሃዒ ኢያባ አሳስ ማርካቶሶና።

32 «ያሳይ ኦ አዎታስ ኢማና ጊዳ ዎንጌላ ኦኒ ሂንቲው ኦደስ። 33 ዳዊቲይ ባ ማዝሙራ ማፃፋን ናምዓንሖ ሸምፑዋን፥

ኦኒ፥ ታ ናዓ፥
ታኒ ሃቺ ኔና ዬላስ)

13:19 ዛሬ 7:1፤ ኢያ 14:1 13:20 ዛሬ 2:16፤ 1ሳሙ 3:20 13:21
1ሳሙ 8:5፤ 10:21 13:22 1ሳሙ 13:14፤ 16:12፤ ማዝ 89:20 13:24
ማር 1:4፤ ሉቃ 3:3 13:25 ማቶ 3:11፤ ማር 1:7፤ ሉቃ 3:16፤ ዮሃ 1:20፤
27 13:28 ማቶ 27:22-23፤ ማር 15:13-14፤ ሉቃ 23:21-23፤ ዮሃ 19:15
13:29 ማቶ 27:57-61፤ ማር 15:42-47፤ ሉቃ 23:50-56፤ ዮሃ 19:38-42
13:31 ሃ.ኦ 1:3

ጌቲቲዲ ፃፊቲዳ ዩሱሳ፣ ያሳይ ሃይቆፔ ዳንሊዲ ኑ ማይዛታሰ ኢማና ጊዳይሳ ኑስ ኤንታ ናይታሰ ፖሊሰ። 34 ኢ ዋቆና ማላ ያሳይ ሃይቆፔ ኢያ ዳንሶን ኤሪሳናው።

ታኒ ዳዊቲሰ ኢማና ጊዳ

አማኔቲዳ ጌሻ አንጂዋ ሂንቲው ኢማና) ያጊዲ ኦዲሰ።

35 ሄሳ ጊሾ፣ ማዝሙራ ማፃፋን ሃራሶን ቃሲ።

ሴ ጌሻ ናዓ አሃ ዋቂሳካ) ያጌሰ።

36 «ዳዊቲይ ባ ዎዳ ያሳ ቆፋ ፖሊዳፔ ጉዬ ሃይቂዲ ባ አዋታራ ሞጌቲዲ ዋቂሰ። 37 ሺን ያሳይ ሃይቆፔ ዳንሊዳይሲ ዋቂቤና።

38 «ሄሳ ጊሾ፣ ታ ኢሻቶ፣ ናጋራ አቶቴላይ ዩሱሳ ባጋራ ካሴቲዲ ሂንቲው ኦዳቲዳይሳ ኤሪቲ። ሙሴ ሂጌ ናጋራፔ ዒሊሳናው ዳንዳዔና። 39 ሺን ዩሱሳ አማኒያ ኡባይ ናጋራፔ ዒሊሰ። 40 ሄሳ ጊሾ፣ ናቤቲ ጊዳይሲ ሂንቲ ቦላ ጋኮና ማላ ናጌቲቲ።

41 «ያሳይ ጊዳባ ለቂሴይሳቶ! ቤዒቲ! ማላሌቲቲ! ቆዩቲ!

ኦኒካ ኦዲን፣ ሂንቲ አማኖና ኦሱዋ

ታኒ ሂንቲ ዋዲያን ኦላና) » ያጊሰ።

42 ጳውሎሴኔ ባርናባሲ አይሁዳ ዎሳ ኩላፌ ኩዩሺን፣ ካሊያ ሳሞባታን ሄሳ ጉጂዲ ኦዳና ማላ አሳይ ኤንታና ዎሲዶሶና።

43 ሺቆይ ላሌቲዳፔ ጉዬ ዳሮ አይሁዳቲኔ አይሁዳታ አማኑዋን ጌሊዲ ያሳ ጎይኒያ ዳሮቲ ጳውሎሳኔ ባርናባሳ ካሊዶሶና። አማኒዳይሳቲ ያሳ አቶ ኩሃቴላን ሚኒዲ ዳና ማላ ኤንታ ዘሪዶሶና።

44 ካሊያ ሳሞባታን ካታማን ዳዒያ አሳፔ ዳሮቲ ያሳ ቃላ ሲዓናው ሸቂዶሶና። 45 ሺን አይሁዳቲ ዳሮ አሳ ቤዒዳ ዎዳ ጳውሎሳ ቃናቲዲ ኢያ ሃሳያ ኢዲዲ ኢያ ጫዩዶሶና።

46 ጳውሎሴኔ ባርናባሲ ያዮና፣ «ያሳ ቃላይ ኮይሮቲዲ ሂንቲው ኦዳታናው ኮሺሰ። ሺን ሂንቲ ቃላ ኢዲዲ ሜሪና ደዑዋ ኤካናው ኑስ ቤሴና ጊዲ ሂንቲ፣ ሂንቲ ሁዒን ፒርዲዳ ጊሾ ሂዛ ኑኒ አይሁዳ ጊዶናይሳታኮ ሲሞሰ። 47 ጋሶይካ ጎዳይ፣

አላሜ ኩሜላይ ኔ ባጋራ አታና ማላ፣

ታኒ ኔና አይሁዳ ጊዶና ዳሪያሰ ፖዎ ኦላሰ) ያጊዲ ኑና ከቲሰ» ያጊዶሶና።

48 አይሁዳ ጊዶናይሳቲ ሄሳ ሲዒዳ ዎዳ ኡፋይቲዲ ያሳ ቃላ ቦንቺዶሶና። ቃሲ ሜሪና ደዑዋሰ ዶሬቲዳ ኡባይ አማኒዶሶና።

13:33 ማዝ 2:7 13:34 ኢሳ 55:3 13:35 ማዝ 16:10 13:41 ኢብ 1:5 13:47 ኢሳ 42:6፤ 49:6

49 ጎዳ ቃላይ ሄ ቢታ ኡባ ጋኪሰ። 50 ሺን አይሁዳቲ፣ አይሁዳ ጊደና ያሴ ጎይኒያ ዱሬ ማጫሳታኔ ካታማን ዳዒያ ጊታ አሳታ ጳዉሎሳ ቦላኔ ባርናባሳ ቦላ ዳንጹሊደሶና። ሄ አሳቲ ኤንታ ጎዳ ደሚዲ ባንታ ቢታፊ ኬሲደሶና። 51 ሺን ጳዉሎሳራኔ ባርናባሳራ ኢዳይሳታሰ ማላ ጊደና ማላ ባንታ ቶሁዋፔ ባና ፒቲዲ ኢቆኒዮኔ ካታማ ቢደሶና። 52 ቃሲ አንዮኪያን ዳዒያ አማኔይሳቲ ጌሻ አያናኒኔ ኡፋይሳን ኩሚደሶና።

14

ጳዉሎሲኔ ባርናባሲ ኢቆኒዮኔ ቢደሶና

1 ካሴይሳዳካ፣ ጳዉሎሲኔ ባርናባሲ ኢቆኒዮኔን አይሁዳታ ዋሳ ኬሊ ጌሊዲ ዳሮ አይሁዳቲኔ አይሁዳ ጊደናይሳቲ አማናና ጋካናው ቃላ ኦዲደሶና። 2 ሺን አማኒቦና አይሁዳቲ፣ አይሁዳ ጊደናይሳታ ዋዛና ላሚዲ ኢሻታ ቦላ ዳንጹሊደሶና። 3 ሃዋሬቲ ያን ዳሮ ዋዳ ጋምዒደሶና። ኤንቲ ያዮና ጎዳባ ኦዲደሶና። ጎዳይ ማላታታኔ ኦራሳባ ኤንቲ ኦላና ማላ ኤንታው ማታ አሚዲ ባ አጼ ኬሃቴላ ቃላይ ቱማ ጊዳይሳ ቆንጨሲሰ። 4 ሺን ሄ ካታማ አሳይ ሻኬቲዲ፣ ባጋይ አይሁዳታራ ባጋይ ቃሲ ሃዋሬታራ ጊዲሰ።

5 አይሁዳ ጊደናይሳቲኔ አይሁዳቲ ባንታ ሃላቃታራ ኢሲፊ ጊዲዲ ሃዋሬታ ቆሃናዉኔ ሹቻን ጫዳናው ኮዪደሶና። 6 ሃዋሬቲ ሄሳ ኤሪዲ፣ ሊሰዲራኔ ዳርቤ ጊያ ሊቃዖኒያ ካታማታኔ ኤንታ ሄራን ዳዒያ ቢታ ባቃቲደሶና። 7 ያን ዋንጌላ ኦዲደሶና።

ጳዉሎሲኔ ባርናባሲ ሊሰዲራኒኔ ዳርቤን

8 ዩሌቶሳፔ ደሚዲ ናምቡ ቶሆይ ዋቢን ሃሙቲ ኤርና ኢሲ አዳይ ሊሰዲራን ዳዒሰ። 9 ሄ አዳይ ጳዉሎሲ ኦዲሺን ኡቲዲ ሲዒሰ። ጳዉሎሲ ኢያ ጫዲዲ ያሊያ ዋዳ ፓዳናው ኢያው አማናይ ዳዒይሳ ቤዒዲ፣ 10 ባ ቃላ ጶቁ ኦሊዲ፣ «ሲቲ ጋዳ ኔ ቶሁዋን ኤቃ» ያጊሰ። ያቲን፣ ጉፔ ዳንዲ ኤቁዲ ሃሙላ ደሚሰ።

11 ጳዉሎሲ ኦሊዲይሳ አሳይ ቤዒዲ ባንታ ቃላ ጶቁ ኦሊዲ ሊቃዖኒያ ደናን፣ «ያሳቲ አሴ ዳኒዲ ኑኮ ዋጲደሶና» ያጊደሶና። 12 ባርናባሳ፣ «ዲያ» ጊዲ፣ ጳዉሎሲ ሃሳያን ዋናቲያ ጊሾ ኢያ፣ «ሄርሜሳ» ጊዲ ሱንጹደሶና። 13 ካታማፔ ጋዳን ዳዒያ ኤቃ ዲያ ኬላ ካሂኔይኔ አሳይ ኮርማታኔ አሌቆ ጨሻታ ሃዋሬታሰ ያርሻናው ኮዪዲ ካታማ ፔንጌ ኤሂደሶና።

14 ሺን ባርናባሲኔ ጳውሎሲ ሄሳ ሲዒዳ ዎዴ ኤንቲ ኦላናው ቆፒዳይሳ ኢዲዲ ባንታ ማዑዋ ፔዲደሶና። ኣሳ ገደ ዎዲ ጌሊዲ።
 15 ባንታ ቃላ ቶቁ ኦሊዲ። «ኣሳው፣ ሃይሳ ኣይሰ ኦሌት? ኩካ ሂንቲ ማላ ኣሴ። ሃ ፓሶናባፔ ሳሉዋኔ ሳዓ። ኣባኔ ኤንታ ገደን ዴዲያ ኡባባ ማዲዲ ዴያ ያሳኮ ሂንቲ ሲማና ማላ ሂንቲው ኩኒ ዎንጌላ ኦደሰ። 16 ኢ ቤኒ ኣሳ ባንታ ኦጊያ ባና ማላ ዬዲ ኣጊሰ። 17 ሺን ኢራ ሳሉዋፔ ቡኪሲሰ። ካላካ ዎዴን ዎዴን ኢሚሰ። ካሊ ኢሚዲ ሂንቲና ዳሮ ኡፋይሲሰ። ያቲዲ ሂንቲው ሎዖባ ኦሊዲ ባው ማርካ ቆይሲቤና» ያጊደሶና። 18 ሃዋሬቲ ሄሳ ገዲ ባንታው ኣሳይ ያርሾና ማላ ዋዪዲ ዲጊደሶና።

19 ኣንዮኪያፔኔ ኢቆኒዮኔፔ ዩዳ ኣይሁዳቲ። ኣሳ ባንታ ባጋ ዛሪዲ ሹቻን ጳውሎሳ ጫዲደሶና። ኤንታው ኢ ሃይቁዳባ ዳኒን ካታማፔ ጋዓ ጎቲ ኤፊዲ ዩጊደሶና። 20 ሺን ኣማኔይሳቲ ዩዲ። ኢያ ዩቲዋን ኤቁዳሺን ኢ ዴንዲዲ ካታማ ጌሊሰ። ዎንቲላ ጋላሰ ባርናባሳራ ኢሲፌ ዳርቤ ቢሰ።

ጳውሎሲኔ ባርናባሲ ሶሪያ ኣንዮኪያ ሲሚደሶና

21 ኤንቲ ዳርቤ ካታማን ዎንጌላ ኦዲዲ ዳሮታ ኣማንሉዳፔ ጉዬ ሊሰዲራ። ኢቆኒዮኔኔ ጳሲዲያ ኣንዮኪያ ሲሚደሶና። 22 ያን ኣማኔይሳታ ሚንሌሊሼኔ ኤንቲ ኣማኖን ሚኒዲ ዴዓና ማላ ዘሪሹ። «ያሳ ካዎቲላ ጌላናው ኩኒ ዳሮ ዋዬ ኤካናው ቤሴሰ» ያጊዲ ታማርሲደሶና። 23 ቃሲ ዎሳ ኬላታሰ ሁዒን ሁዒን ጨማታ ደሪደሶና። ያሚዳፔኔ ዎሲዳፔ ጉዬ ኤንቲ ኣማኒዳ ጎዳሰ ኤንታ ሃዳራ ኢሚደሶና።

24 ጳሲዲያ ቢታ ካንሉዲ ኣቋዲ ጳንፊሊያ ቢደሶና።
 25 ጳርጌን ቃላ ኦዲዳፔ ጉዬ ኣፃሊያ ቢደሶና። 26 ያፔ ኤንቲ ባንታ ፖሊዳ ኦሱዋሰ ያሳ ኣቶ ኬሃቲላሰ ኤንታ ሃዳራ ኢሚዳ ኣንዮኪያ ማርካቤራ ሲሚደሶና።

27 ኣንዮኪያ ጋኪዳ ዎዴ ዎሳ ኬላ ኣሳ ሺሺዲ ያሳይ ኤንታራ ኦሊዳ ኦሱዋ ኡባኔ ኣይሁዳ ገደና ኣሳይ ኣማናና ማላ ኤንታው ዋቲ ፔንጌ ደዩዳኮ ኦዲደሶና። 28 ሄሳን ኣማኔይሳታራ ዳሮ ዎዴ ጋዎዲደሶና።

15

ዬሩሳላሜ ሺቁዎ

1 ኢሲ ኢሲ ኣሳቲ ዩሁዳፔ ኣንዮኪያ ቢዲ፣ «ሙሴ ዎጋሶ ሂንቲ ቃፃሬቶና ኢዲኮ ኣታናው ዳንዳዒኬታ» ገዲ ኣማኔይሳታ

14:15 ኬሳ 20:11፤ ማዘ 146:6

ታማርሶ ደሚደሶና። 2 ሄሲ ጳውሎሳኔ ባርናባሳ ኤንታራ ዳር ፓላማናዳኔ ካጫናዳ ኦሊስ። ሄሳ ጊሾ፣ ኣንዮኪያን ዳዒያ ኢሲ ኢሲ ኣሳቲ ጳውሎሳኔ ባርናባሳራ ዩሩሳላሜ ቢዲ ሃዋሬታራኔ ጨማታራ ጋሄቲዲ ሄ ኦዳ ቢላና ሜላ ቆፋ ቃቹደሶና።

3 ዋሳ ኬላይ ኤንታ ኪቲን ቢደሶና። ኤንቲ ሲርፊንቄ ሳማሬራ ኣጲሼ ኣይሁዳ ጊደናይሳቲ ያሳኮ ዋኒዲ ሲሚዳኮ ኦዲደሶና። ሄሲ ኣማኔይሳታ ኡባ ዳር ኡፋይሲስ። 4 ኤንቲ ዩሩሳላሜ ጋኪዳ ዋዴ ዋሳ ኬላይ፣ ሃዋሬቲኔ ጨማቲ ኤንታ ሞኪደሶና። ያሳይ ባንታራ ኦሊዳባ ኡባ ኦዲደሶና። 5 ሺን ፋሪሳዊታ ባጋፌ ኣማኒዳ ኢሲ ኢሲ ኣሳቲ ዳንዲ ኤቂዲ፣ «ኣይሁዳ ጊደናሺን ኣማኒዳ ኣሳቲ ቃፃሬታናወኔ ሙሴ ሂጊያ ናጋናው ቤሴስ» ያጊደሶና።

6 ሃዋሬቲኔ ጨማቲ ሄሳ ዞሬታናው ሺቂደሶና። 7 ዳር ሃሳዩዳፕ ጉዬ፣ ጳዒርሲ ዳንዲ ኤቂዲ፣ «ታ ኢሻቶ፣ ኣይሁዳ ጊደናይሳቲ ዋንጌላ ቃላ ታ ደናፔ ሲዒዲ ኣማናና ሜላ ካሴቲዲ ታና ያሳይ ሂንቲ ጊደፌ ደሪዳይሳ ሂንቲ ኤሬታ። 8 ኣሳ ዋዛና ኤሪያ ያሳይ ጌሻ ኣያና ኑስ ኣሚዳይሳዳ ኤንታወካ ኣሚዲ ቱማይስ። 9 ኣማኖን ኤንታ ዋዛና ጌሺዳ ጊሾ ኑ ጊደኒኔ ኤንታ ጊደን ዳማቴላ ዋሊቤና። 10 ሄሳ ጊሾ፣ ኑ ኣዋቲኔ ኑኒ ቶካናው ዳንዳዒሶና ቃዋባራ ኣማኔይሳታ ሞርጌን ዋሊዲ ሃዒ ኣይስ ያሳ ፓጩቲ? 11 ጎዳ ዩሱስ ኪሪስቶስ ኣጶ ኬሃቴላን ኤንቲ ኣቲዳይሳዳ ኑካ ኣቲዳይሳ ኣማኖስ» ያጊሰ።

12 ኣሳይ ሲዒ ጊዲ፣ ባርናባሲኔ ጳውሎሲ ኣይሁዳ ጊደና ኣሳ ጊደን ባንታ ባጋራ ያሳይ ኦሊዳ ማላታታኔ ኦራላባ ኡባ ኦዲሺን ሲዶሶና።

13 ኤንቲ ሃሳያ ኣንጊዳፔ ጉዬ ያይቆቢ፣ «ኢሻቶ፣ ታ ጌይሳ ሲዒቲ። 14 ያሳይ ኣይሁዳ ጊደናይሳታ ጊደፌ ባ ኣሴ ደራናው ኮዩዲ ኤንታና ኮይሮ ዋቲዲ ቆፕዳኮ ሲሞኒ ኦዲስ። 15 ናቤታ ቃላይ ሃይሳራ ጌኔስ። ጌሻ ማፃፋን፣

16 ሃይሳፌ ጉዬ፣ ታኒ ሲማና፣
ኩንዲዳ ዳዊቲ ካዎቴላ ዳንላና።
ላሌቲዳ ኬላካ ዛራ ኤሳና።

17 ኣቲዳ ኣሳ ኡባይ ታኮ ያና፣
ታኒ ጃጊዳ ኣይሁዳ ጊደና ኣሳ ኡባይ ታና ኮያና። 18 ቤኒፔ ደማዳ ሄሲ ኤሬታና ሜላ ኦሊዳ ያሳይ፣ ታኒ ያጋይስን ያጊሰ።

15:1 ሉዌ 12:3 15:7 ሃ.ኦ 10:1-43 15:8 ሃ.ኦ 2:4፤ 10:44 15:16 ኣዋ 9:11-12

19 «ሄሳ ጊሾ፣ ታ ቆፋይ ያሳኮ ሲሚያ ኣይሁዴ ጊደናይሳታ ኑኒ ዋይሶናኮ ሎዎ። 20 ሺን ኤንቲ ኤቃሰ ያርሼቲዲ ቱኒዳባ ሞና ማላ፣ ላይማቶና ማላ፣ ባዉታ ሞና ማላኔ ሱሉ ኡዮና ማላ ኤንታው ኑኒ ዳብዳቤ ዓፋናው ኮሼሰ። 21 ሙሴ ሂጌይ ቤኒፔ ደሚዲ ሳምባታን ሳምባታን ኣይሁዴ ዋሳ ኬላታን ናባቤቲሼ ካታማ ኡባን ሳባኬቲሰ» ያጊሰ።

22 ሄሳፊ ጉዬ፣ ሃዋሪቲኔ ጨማቲ ዋሳ ኬላ ኣሳ ኡባራ ኢሲፊ ባንታ ጊደፊ ጉላ ኣሳታ ደሪዲ ጳውሎሳራኔ ባርናባሳራ ኣንጾኪያ ዬዳናው ቆፋ ቃቺደሶና። ኤንቲ ዳሮ ቦንቹቲዳ ናምዑ ኣሳታ ባርሳባሳ ጌቲቲያ ዪሁዳኔ ሲላሴ ደሪደሶና። 23 ሃይሳዳ ጌቲቲ ያፊቲዳ ዳብዳቤያ ኤንታ ቦላ ዬዲደሶና። «ኑኒ ሃዋሪቲኔ ጨማቲ ሂንቲ ኣሻቲ፣ ኣንጾኪያን፣ ሶሪያኒኔ ኪልቂያን ዴዒያ ኣይሁዴ ጊደና ኣሻታሰ ኑ ሳርሉዋ ኪቶሰ።

24 «ኑኒ ከቶና ኣሳቲ ኑ ጊደፊ ቢዲ፣ ሂንቲ ቃዓሪታናዉኔ ሂጊያ ናገናው ቤሴሰን ጊዲ፣ ሂንቲና ዋይሲደይሳኔ ዪሎዪዳይሳ ሲዒዳ። 25 ኑኒ ደሲያ ባርናባሳኔ ጳውሎሳ ደሪቲዳ ኣሳታራ ኢሲፊ ሂንቲኮ ኪታናው ኢሲ ዋዛናን ኑ ቆፋ ቃቺዳ። 26 ኤንቲ ኑ ጎዳ ዬሱሰ ኪሪሰቶሳ ጊሾ ባንታ ዴዑዋ ኣሉ ኣሚደሶና። 27 ሄሳ ጊሾ፣ ኑኒ ያፊዳይሳ ኤንቲ ባንታ ደናን ጉጂዲ ሂንቲው ኦዳና ማላ ዪሁዳኔ ሲላሴ ከቲዳ።

28 «ሃ ኮሼይሳታፔ ኣቲን ሃራ ቶሆ ሂንቲና ቶሶና ማላ ኑኔ ጌሻ ኣያናይ ኦዳ ቃቺዳ። 29 ኤቃሰ ያርሼቲዲ ቱኒዳባ ሞፒቲ፣ ሱሉ ኡዮፒቲ፣ ባዉታ ሞፒቲ፣ ላይማቶፒቲ፣ ሃ ኡባፊ ሂንቲ፣ ሂንቲ ሁዒያ ናጊኮ ሎዎባ ኦሌታ» ያጊደሶና።

30 ሄሳ ጊሾ፣ ከቲቲዳይሳቲ ሞይዜቲዲ ኣንጾኪያ ቢዲ ኣማኒያ ኣሳ ሺሺዲ፣ ዳብዳቤ ኣሚደሶና። 31 ኤንቲ ሄ ሚንሌሌያ ዳብዳቤያ ናባቢዳ ዋዴ ኡፋይቲደሶና። 32 ቃሲ ዪሁዳኔ ሲላሴይ ባንታ ሁዒን ናቤ ጊዲያ ጊሾ ኣማኔይሳታ ሎይሉ ዘሪዲ ሚንሌሌደሶና። 33 ኤንቲ ኣንጾኪያን ጉላ ጋላሰ ኡቲዳፔ ጉዬ ኣሻቲ ሎዎራ ሞይዚን ባንታና ከቲዳይሳታኮ ሲሚደሶና። 34 * [ሺን ሲላሴይ ያን ኣታናው ኮዪሰ።]

35 ቃሲ ጳውሎሲኔ ባርናባሲ ሃራ ዳሮ ኣሳታራ ኢሲፊ ጎዳ ቃላ ታማርሲሼኔ ዋንጌላ ኦዲሼ ኣንጾኪያን ጋምዒደሶና።

ጳውሎሲኔ ባርናባሲ ሻኬቲደሶና

15:20 ኪሳ 34:15-17፤ ሉዌ 17:10-16፤ 18:6-23 * 15:34 ኢሲ ኢሲ ማፃፋታን ፓይዶ 34 ባዋ።

36 ጉላ ጋላሳ፣ ጉዬ ጳውሎስ ባርናባዮስ፡ «ኮኒ ጎዳ ቃላ ኦዲዳ ካታማ ኡባን አማኔይሳቲ ዋኒዲ ዴዲያኮ ጉዬ ሲሚሽ ያሞሳና» ያገሰ። 37 ባርናባዮስ ማርቆስ ጌቴቲያ ዮሃንሳ ባንታራ ኤፋናው ኮዩስ። 38 ሺን ጳውሎስ ማርቆስ ባንታራ ኤፋናው ኮዩቤና። ጋሶይካ፡ ኢ ጲንጌሊያን ሻኬቲዲ ኤንታራ ኦላናው ቢቤና። 39 ኤንታ ጊዶን ኢታ ኦሺ ኮዩን ኢሶይ ኢሱዋሬ ሻኬቲዶሶና። ባርናባዮስ ማርቆስ ኤኪዲ ማርካቤራ ቆጲሮሳ ቢስ። 40 ሺን ጳውሎስ ሲላሴ ዶሪስ፤ አማኔይሳቲ ጳውሎስ ያሳ አቋ ኬሃቴላስ ሃዳራ ኢሚዳ፣ ጉዬ ኢ ኬዩዲ ቢስ። 41 ያቲዲ፡ ዋሳ ኬላታ ሚንጮሲሽ ሶሪያራኔ ኪልቂያራ አቋስ።

16

ዲሞቲዮስ ጳውሎሳራኔ ሲላሴራ ጋሂቲስ

1 ጳውሎስ ዳርቤኔ ሊስዲራ ቢስ። ያን ዲሞቲዮስ ጊያ አማኒያ አሲ ዴዴስ። ኢያ አያ አማኒያ አይሁዳ ማጫስ፤ ኢያ አዋይ ጌሪኬ ኣስ። 2 ሊስዲራኔ ኢቆኒዮኔን ዴዲያ አማኔይሳቲ ዲሞቲዮስ ባሎይሊዲ ማርካቲዶሶና። 3 ጳውሎስ ዲሞቲዮስ ባራ ኤፋናው ኮዩዲ፤ ኢያ አዋይ ጌሪኬ አሲ ጊዲዲይሳ ሄ ቤሳን ዴዲያ አይሁዳ ኡባይ ኤሪያ ጊሾ ኢያ ቃፃሪስ። 4 ኤንቲ ካታማታራ ቢሽ ዩሩሳሌሜን ዴዲያ ሃዋርያቲኔ ጨማቲ ዋሊዳ ሂጊያ አማኔይሳቲ ናጋና ሜላ ኤንታው ኦዲሽ አቋዶሶና። 5 ሄሳ ጊሾ፡ ዋሳ ኬላቲ አማኖን ሚኒሽ፡ ታይቦንካ ጋላስ ጋላስ ዳሪ ዳሪ ቢዶሶና።

ጳውሎስ ማቄደኒያ ባናዳ ጭቲስ

6 ኢሲያን ቃላ ኦዶና ሜላ ጌሻ ኣያናይ ኤንታ ዲጊዳ ጊሾ ጲርጌራኔ ጋላቲያ ቢታራ አቋዶሶና። 7 ኤንቲ ሚሲያ ዛዋ ጋኪዳ ዋዳ ቢቲኒያ ባናው ኮዩዶሶና። ሺን ዬሱሳ ኣያናይ ኤንታ ዲጊስ። 8 ሄሳ ጊሾ፡ ኤንቲ ሚሲያ ማታራ አቋሽ ሚሮዳ ዋቋዶሶና። 9 ጳውሎስ ቃማ ቆንጮፋን ኢሲ ማቄደኒያ አሲ ባኮ፡ «ማቄደኒያ ፒናዳ ኦና ማዳርኪ» ያገሽ ኤቂዲ ዋሲሽን ቤዲስ። 10 ቆንጮፋ ኢ ቤዲዳ፣ ጉዬ ኤሌሲዲ ኮኒ ማቄደኒያ ባናው ኮዩዲ። ሄሲካ፡ ዋንጌላ ያን ዴዲያ ኣሳስ ኦዳናው ያሳይ ኦና ጭዲይሳ ኤሪዳ ጊሾሳ።

ሊዲያ ኪሪስቶስ አማናሱ

11 ደርዳዳ፣ ደንዲዲ ማርካቤን ጌሊዲ ሳምቲራቄ ቢዳ፣
ዋንቱላ ጋላስ ናጹሌ ቢዳ። 12 ያፔ ደንዲዲ ማቄደኒያ ቢታን
ደዒያ ፊልጲሲዩሳ ጊያ ኮይሮ ካታማ ቢዳ። ቃሲ ፊልጲሲዩሲ
ሮሜ አሳይ ደዒያ ካታማ። ኮኒ ሄ ካታማን ጉላ ጋላስ ኡቲዳ።

13 ሳምባታ ጋላስ ካታማ፣ ጋፃን ሻፋ ዶናን አይሁዳቲ ያሳ
ዋሲያ ቤሲ ደዒይሳ ኤሪዲ ያ ቢዳ። ሄ ቤሳን ሺቄዳ ማጫሳስ
ቃላ ኦዲዳ።

14 ኑና ሲዒያ አሳ፣ ኢሲ ሊዲያ ጌቲቲያ ቲያቲሮና ካታማ፣
ዪዳ፣ ያሳ አማኒዳ ዘያ አፊላ ዛልዒያ፣ ማጫሲያ ደዒወሱ።
ጳውሎሲ ኦይይሳ ኢያ ሲዒና ሜላ ያሳይ ኢ ዋዛና ዶዩሰ።

15 ሊዲያ ባ ሶ አሳራ ኢሲፊ ፃማቄቲዳ፣ ጉዬ ኑሶ፣ «ሂንቲ
ታና ጎዳ ቱማ አማናሱ ጊኮ ታ ሶ ዬጲቲ» ጋዳ ሚንላዳ ዋሳሱ።

ጳውሎሲኔ ሲላሲ ቃሼቲዶሶና

16 ኮኒ ያሳ ዋሲያ ቤሳ ቢሺን ኢታ አያኒ ኢ ቦላ ደዒዲ
ካይሲያ ኢሲ ጌላዎ አይሌይ ኑራ ጋሄታሱ። ኢያ ካያዳ ዳሮ ሚሼ
ባ ጎዳታስ ኤሃወሱ። 17 ጳውሎሳኔ ኑና ካላዳ፣ «ሃይሳቲ ኡባፊ
ቦላ ያሳ አይሌታ! ኤንቲ ሂንቲ አታና ኦጊያ ኦይይሳታ» ጋዳ
ዋሳሱ።

18 ኡባ ጋላስ ሄሳዳ ጋወሱ። ሺን ጳውሎሲ ዪሎቲዲ ጉዬ
ሲሚዲ፣ ሄ አያና፣ «ዬሱሰ ኪሪሰቶሳ ሱንላን ኢፔ ኬያ» ጊዲ
ኪቲሰ። ኡራካ ኢታ አያናይ ኢፔ ኬዪ አገሰ።

19 ሺን ኢ ጎዳቲ ባንታው ሚሼ ደሚያ ኦጊይ ቆዩዳይሳ
ቤዒዲ፣ ጳውሎሳኔ ሲላሲ ኦይኪዲ፣ ዳባባ ዳይናታ ሲንፍ ጎቺ
ኤፊዶሶና። 20 ዳይናታ ሲንፍ ኤንታ ኤፊዲ፣ «ሃይሳቲ አይሁዳ
አሲ ጊዲሼ ኑ ካታማ አሳ ዳሮ ዋይሶሶና። 21 ኮኒ ሮሜ ቢታ አሲ
ጊዲሼ ኤካናወኔ ኦላናው ዋጋ ጊዶናባ ታማርሶሶና» ያጊዶሶና።

22 አሳይ ኢሲ ባጋ ጊዲዲ፣ ጳውሎሳ ቦላኔ ሲላሲ ቦላ
ደንዲዶሶና። ዳይናቲ ኤንታ ማዑዋ ቃሪዲ ፃምዒን ኤንታ
ሾጫና ሜላ ኪቲዶሶና። 23 ኤንታ ዳሮ ዋጲዳ፣ ጉዬ ቃሾ
ኬላ ጌልሲዶሶና። ቃሾ ኬላ ናጌይሲ ኤንታ ሚንፊ ናጋና ሜላ
ኪቲዶሶና። 24 ቃሾ ኬላ ናጌይሲ ሄ ኪታ ኤኪዲ፣ ጳውሎሳኔ
ሲላሲ ቃሾ ኬላሰ ቆልዓ ጌልሲሰ። ኤንታ ቶሁዋ ዲዒሰ

25 ሺን ጊዲ ቢላሂ ጊዲያ ዋዴ ጳውሎሳኔ ሲላሲራ ዋሲሼኔ
ማዘሙሬ ዩዒሼ ያሳ ጋላቶሶና። ቃሾ ኬላን ደዒያ ሃራ አሳቲካ
ኤንቲ ጊያባ ሲዶሶና። 26 ቆፖና ቃሾ ኬላ ባሶይ ቃፃና ጋካናው ቢታ
ቃይይ ሃኒሰ። ሄ ሳቴንካ ፔንጌ ኡባይ ዶዬቲ አገሰ፤ ቃሼቲዳ አሳ

ኡባ ሳንላላታይ ቢርሼቲ ዋዲስ። 27 ቃሾ ኩላ ናጌይሲ ዲሰኮሬ ባርኪዳ ዋዴ ቃሾ ኩላ ፔንጌ ኡባይ ዶዩቲዳይሳ ቤዒዲ ቃሾ ኣሳይ ኬሲ ኤኪ ቢዳባ ዳኒን ባና ዋዳናው ማሹ ኤኪስ። 28 ሺን ጳውሎሲ ቃላ ጶቁ ኦሊዲ «ኮ ኡባይ ሃይሳን ዴዒያ ገሾ ኔኒ ኔና ቆሆፓ» ያገሰ።

29 ቃሾ ኩላ ናጌይሲ ያምፔ ዋሲ ኤኪዲ ኤሌሲዲ ጋሊ ዋዲስ። ኮኮሪሽ ጳውሎሳ ሲንላኒኔ ሲላሴ ሲንላን ጉፋኒስ። 30 ኤንታ ካሬ ኬሲዲ፣ «ታ ጎዳቶ፣ ታኒ ኣታናው ኣይ ኦላናው ቤሲ?» ያገሰ።

31 ጳውሎሳራኔ ሲላሴራ ኢያኮ፣ «ጎዳ ዩሱስ ኪሪሰቶሳ ኣማና፤ ኔራኔ ኔ ሶ ኣሳራ ኣታና» ያገደሶና። 32 ኤንቲ ኢያሲኔ ኢያ ሶን ዴዒያ ኡባሰ ጎዳ ቃላ ኦዲደሶና። 33 ቃማ ሄ ሳቲንካ ቃሾ ኩላ ናጌይሲ ኤንታ ኤፊዲ ኤንታ ማዲንላ ማጨሰ። ኤሌሲዲ ባ ሶ ኣሳ ኡባራ ምቐቲስ። 34 ጳውሎሳኔ ሲላሴ ባ ሶ ኤፊዲ ኤንታው ካሊ ኣሊስ። ኢ ባ ሶ ኣሳ ኡባራ ያሳ ኣማኒዳ ገሾ ኡፋይቲስ።

35 ሳዒይ ዋንቲን ዳይናቲ፣ «ሄ ኣሳታ ቢላ» ያገዲ ፖሊሴ ሃላቃታ ኢያኮ ከቲደሶና። 36 ቃሾ ኩላ ናጌይሲ፣ «ሂንቲ ቢሌታና ማላ ዳይናቲ ከቲደሶና። ሂዛ፣ ኬዩዲ ሳር ቢቲ» ያገዲ ሄ ከታ ጳውሎሳስ ኦዲስ።

37 ሺን ጳውሎሲ ሄ ፖሊሴ ሃላቃታኮ፣ «ኮኒ ሮሜ ኣሲ * ገዲሺን ኤንቲ ኦና ፐርዲ ባይና ኣሳ ሲንላን ዋዲዲ፣ ቃሾ ኩላን ዩገደሶና። ሃዒ ኦና ጌማን ኬዩዲ ሶ ጎና? ሃኔና፣ ኤንቲ ባንታ ሁዒን ዩዲ ኦና ኬሶ» ያገሰ።

38 ፖሊሴ ሃላቃቲ ዳይናታስ ሄሳ ኦዲን፣ ጳውሎሳራኔ ሲላሴራ ሮሜ ቢታ ኣሲ ገዲዳይሳ ሲዒዳ ዋዴ ያዩደሶና። 39 ሄሳ ገሾ፣ ዳይናቲ ዩዲ ኤንታኮ፣ «ኮኒ ሂንቲና ቆሂዳ» ገደሶና። ቃሾ ኩላፊ ካሬ ኤንታ ኬሲዲ፣ ካታማፔ ኬዩዲ ባና ማላ ዋሲደሶና። 40 ጳውሎሳራኔ ሲላሴራ ቃሾ ኩላፊ ኬዩዲ ሊዲያ ሶ ቢደሶና። ያን ኣማኔይሳታራ ጋሂቲዲ ኤንታ ሚንሌሊዲ ኬዩዲ ቢደሶና።

17

ጳውሎሲ ቲሴሎንቄን ታማርሲስ

* 16:37 ሮሜ ኣሲ፡ ጳውሎሲ ሮሜ ኣሲ ያገዲ ባና ቄጊዳይ ሄ ዋዴ ኣይሁዴ ቢታ ሃራይ ሮሜ ካዎቲላ ገዲዳ ገሾሳ። ሄ ዋዴ ሮሜ ቢታን ዴዒያ ኣሳይ ፐርዲ ባይና ጋራፊቶና።

አሳታራ ኡባ ዋዴ ፓላሜስ። 18 ኤጲቆሮሳኔ ኢስቶይኬ ጌቲቲያ ጩጋታፔ ኢሲ ኢሲ ኤራንቸቲ ጳውሎሳራ ፓላሚዶሶና። ኤንታፊ ኢሶቲ ኢሶቲ፣ «ሃ ዮያማይ አይ ኦዳናው ኮዩ?» ያጊዶሶና።

ሃራቲ ጳውሎሲ ዬሱሳባኔ ሃይቆፔ ኢ ዴንዲዳይሳ ባንታው ኦዲዳ ጊሾ «ኦራላ ያሳታባ ኦዲያ ዳኔስ» ያጊዶሶና።

19 ጳውሎሳ ኦይኪዲ አርዮስፓጎሳ ጊያ ሺቆ ቤሳ ኤፊዲ፣ «ሃ ኔኒ ታማርሲያ ኦራላባይ አይቤኮ ኦና ኤሪሲኪ? 20 አይስ ጊኮ፣ ኔኒ ኦስ ኦራላባ ኦዳሳ፤ ሂዛ ሄሲ አይቤኮ ኦኒ ኤራናው ኮዮስ» ያጊዶሶና። 21 አቲና አሳ ኡባይኔ ያን ዴዲያ ኢማላቲ ኦራላባ ኦዴቶናኔ ሲያና ፔያኮና።

22 ጳውሎሲ አርዮስፓጎሳን ሸቁዳ አሳ ሲንላን ኤቁዲ፣ «አቲና አሳው፣ ሃንቴ ያሳታስ ኡባባን ዳሮ ያዬይሳ ታኒ ቤሳይስ። 23 ታኒ ሃንቴ ካታማራ ዩያሼ ሃንቴ ጎይኒያ ቤሳታ ቤዲያ ዋዴ «ኤሬቶና ያሳስ» ጌቲቲ ጻፊቲዳ ያርሾ ቤሳ ዴማስ። ሃ ሃንቴ ኤሮናሺን ጎይኔይሳ ታኒ ሃንቴው ኦዲይስ። 24 ሳባኔ ሳባን ዴዲያ ኡባባ ሜዲዳ ያሳይ፣ ሳሉዋኔ ሳባ ጎዳይ፣ አሲ ከዲዳ ከላን ዴና። 25 ኢ ዴያ፣ ሹምፖኔ ኡባባ አሳ ኡባስ ኢሚያ ጊሾ ፓጩ ዴዲያ አሳዳ አሳ ማዴ ኮዩና። 26 ያሳይ አሳ ዜሬሲ ኡባ ኢሲ አዲያፊ ሜዲዳ ቢታ ኡባን ዋሲስ። ያቲዲ ኤንቴ ዴባና ዋዲያሲኔ ቤሳስ ዛዋ ኢሚስ። 27 ኢ ሃሳ ኦሲዳይ አሲ ኢያ ኮያና ሜላኔ ፒልጊዲ ዴማና ሜላሳ። ሃኒኮካ ኢ ኦፔ ጌሚቤና። 28 ሃንቴፊ ኢሲ ኢሲ ዬጃይሳቲ፣ «ኦኒ ኢያ ናይታ» ጊዳይሳዳ፣ «ኦኒ ኢያን ፓፃ ዴያስ፣ ቃያስ።» 29 ሃዛ፣ ኦኒ ያሳ ናይታ ጊዲያ ጊሾ «ያሳይ አሳ ሃላቴላኒኔ ቆፋን ዋርቃፊ ዋይኮ ቢራፔ ዋይኮ ሹቻፊ ኦሴቲዳባ ዳኔስ» ያጊዲ ቆፓናው ቤሴና። 30 ሃሳ ጊሾ፣ ያሳይ ካሴ ዋዴ አሳይ ኤሮና ኦሲዳይሳ አጊዲ አዲስ፣ ሺን ሃዲ ኡባሶን ዴዲያ አሲ ኡባይ ናጋራፔ ሲማና ሜላ ከቴስ። 31 አይስ ጊኮ፣ ያሳይ ባ ዶሪዳ አዲያን ሳባን ዴዲያ አሳ ኡባ ቦላ ዊሎ ፒርዳ ፒርዳናው ቃማ ጊጊሲ ዋሲስ። ኢያ ሃይቆፔ ዴንሲዲ ሃሳ አሳ ኡባስ ቱማዩስ» ያጊስ።

32 ኤንታፊ ኢሲ ኢሲ አሳቲ ሃይቆፔ ዴንደባ ጳውሎሳፔ ሲዲዲ፣ ኢያ ቦላ ቁልቁሲዶሶና። ሺን ሃራቲ፣ «ኦኒ ሃሳ ኔፔ ፑጂዲ ሲባናው ኮዮስ» ያጊዶሶና። 33 ሃሳ ጊሾ፣ ጳውሎሲ ኤንታ ጊዶፊ ከዩስ። 34 ሺን ኢሲ ኢሲ አዴቲ ጳውሎሳራ ጋሂቲዲ አማኒዶሶና። ኤንታ ጊዶፊ አርዮስፓጎሳን ሸቁዋን ዴዲያ ዲዮናስዮሳ ጊያ አዴይ፣ ዳማርሶ ጊያ ኢሲ ማጫሲያኔ ሃራቲ ዴያሶና።

17:24 1ካዋ 8:27፤ ኢሳ 42:5፤ ሃ.ኦ 7:48

18

ጳውሎስ ቆርንቶሳ ቢስ

1 ሄሳፌ ጉዬ፥ ጳውሎስ አቴናፔ ከዩዲ፥ ቆርንቶሳ ቢስ። 2 ያን አቀላ ጊያ ጳንዖሳን ዩሌቲዳ ኢሲ አይሁዳ አሲ ዳሚስ። አይሁዳ አሳ ኡባይ ሮሜፔ ከያና ሜላ ካዎይ ቃላወዲዮሲ ከቲዳ ጊሾ ጉላ ዎዴፔ ካሴ ኢ ባ ማቺ ጲሪስቁላራ ፃሌፔ ዩስ። ጳውሎስ ኤንታራ ጋሄታናው ቢስ። 3 ኢያ ኦሶይ ኤንታይሳዳ ዲንካኔ ሲኮ ጊዲያ ጊሾ ኤንታራ ኡቲዲ ኢሲፌ ኦሊስ። 4 ጳውሎስ ሳምባታ ኡባን አይሁዳታኔ ገሪኬታ አማንላናው አይሁዳ ዎሳ ከላን ፓላሜስ።

5 ሲላሴይኔ ፃሞቲዮሲ ማቄዲያፔ ዩዲ ዎዴ ጳውሎስ ባ ኩሜላ ዎዲያ አሚዲ አይሁዳታስ ዩሱሲ ኢ፥ ከሪስቶሳ ጊዲ ቃላ ኦዲስ። 6 ሺን ኤንቲ ጳውሎሳ ኢዲዲ ኢያ ጫዩን ጳውሎስ ባ ማዑዋፔ ባና ቆቆፊሼ፥ «ሂንቴ ጎሜይ ሂንቴና ኦይኮ፤ ታኒ ሄሳን ዳዒኬ። ሂዛፔ ጉዬ፥ ታኒ አይሁዳ ጊዶና አሳኮ ባይስ» ያጊስ።

7 ያፔ ከዩዲ ዎሳ ጎይኒያ ቲቶስ ዮስዖሳ ጊያ ኡራ ሶ ቢስ። ዮስዖሳ ከላይ አይሁዳ ዎሳ ከላ ማታን ዳዒስ። 8 አይሁዳ ዎሳ ከላ ሃላቃይ ቃሪስጲሲ ባ ሶ አሳ ኡባራ ጎዳ አሚኒስ። ቆርንቶሳ አሳታፔካ ዳሮቲ ዎሳ ቃላ ሲዒዳ ዎዴ አሚኒዲ ፃማቄቲዶሶና።

9 ጎዳይ ኢሲ ቃማ ጳውሎሳስ ቆንጨዲ፥ «ያዮፋ፤ ኦዳ፥ ሲዒ ጎፓ። 10 ታኒ ኔራ ዳዒይስ። ታው ሃ ካታማን ዳሮ አሲ ዳዒያ ጊሾ ኔና ቆሂዲ ኢታባን ዩጋና አሲ ኦኒካ ባዎ» ያጊስ። 11 ሄሳ ጊሾ፥ ጳውሎስ ዎሳ ቃላ አሳ ታማርሲሼ ኢሲ ላይሌኔ ኡሱፑን አኔና ኤንታራ ኡቲስ።

12 ጋሊዮሲ አካያ ቢታ አይሲያ ዎዴ አይሁዳቲ ኢሲፌ ጳውሎሳ ቦላ ዴንዲዲ ፒርዳ ከሌ ኢያ ኤፊዲ፥ 13 «ሃ አዳይ ሂጊያ ኢዲዲ፥ አሳይ ዎሳ ጎይናና ሜላ ኦፊስ» ያጊዶሶና።

14 ጳውሎስ ሃሳያና ሃኒሺን፥ ጋሊዮሲ አይሁዳታኮ፥ «አይሁዳቶ፥ ሄሲ ኢታ ኦሶ ዎይኮ ናቆ ጊዲያኮ ታኒ ሂንቴባ ዲንዳዳዳ ሲዳናው ቤሴስ። 15 ሺን ቃላስ፥ ሱንሳሲኔ ሂንቴ ሂጊያስ ሂንቴ ፓላሚያባ ጊዲኮ ሂንቴ፥ ሂንቴው ቢሊቴ፤ ሄሳ ታኒ ፒርዲኬ» ያጊስ። 16 ያቲዲ፥ ኤንታ ፒርዳ ከላፌ ካሪ ከሲስ። 17 ሄሳፌ ጉዬ፥ ገሪኬ አሳ ኡባይ አይሁዳ ዎሳ ከላ ሃላቃ ሶስቲኒሳ ኦይኪዲ ፒርዳ ከላ ሲንላን ዎዲዶሶና። ሺን ጋሊዮሲ ሄሳ ፓፃባ ጊቤና።

ጳውሎስ እንደሆነ ቢሰ

18 ጳውሎስ ዳር ጋላስ ቆርንቶሳን ኡቲዳፔ ጉዬ አማኒያ አሳ ሳርሊዲ፣ ጲሪስቁሊራኔ አቁላራ ማርካቤራ ሶሪያ ቢሰ። ሺን ኢ ባናፔ ሲንፍ ባው ጋሶይ ዳዒያ ጊሾ ኪንኪሪያ ካታማን ባ ሁዒያ ቡሉሴቲሰ። 19 ኤንቲ ኤፌሶና ጋኪዳ ዋዴ ጳውሎስ ጲሪስቁሎኔ አቁላ ያን አጊሰ። ሺን ባው አይሁዴ ዋሳ ኬሊ ፔሊዲ አይሁዴታራ ኦዴቲሰ። 20 ኤንቲ ባንታራ ዳር ዋዴ ኡታና ማላ ጳውሎሳ ዋሲዶሶና ሺን ኢ ኢዳሰ። 21 ኤንታፌ ሻኬቲሹ፣ «ታኒ ያ ባሊያ ዬሩሳላሜን ቦንቻናው ቤሴሰ። ሺን ያሲ ጊኮ ሂንቴኮ ሲማዳ ያና» ያጊዲ ኤፌሶናፔ ማርካቤራ ቢሰ። 22 ቁሳሪያ ጋኪዳ ዋዴ ዬሩሳላሜ ቢዲ ዋሳ ኬላ አሳ ሳርሊዲ ጉዬ እንደሆነ ቢሰ።

23 ያን ጉላ ዋዴ ጋምዒዳፔ ጉዬ አማኒያ አሳታ ኡባ ሚንፍሊሽ ጋላቲያራኔ ጲርጌራ አዲሰ።

አጲሎስ ኤፌሶናኔ ቆርንቶሳን

24 ኢሲከንዲሪያን ዬሌቲዳ ኢሲ አጲሎሳ ጊያ አይሁዴ አሲ ኤፌሶና ቢሰ። ኢ ኦዳ ኤሪያ አሲኔ ያሳ ቃላ ዳር ኤሪያ አሲ። 25 ኢ ጎዳ ኦጊያ ታማሪዲ፣ አያናን ፀጉቲዲ ዬሱሳባ ሱሬ ታማርሴሰ። ጊዶሺን፣ ዮሃንሳ ዲንቃቲያ ዓላላ ኤሬሰ። 26 ኢ አይሁዴ ዋሳ ኬላን ያዮና ታማርሴሰ። ጲሪስቁሊኔ አቁሊ ኢ ኦዴይሳ ሲዒዳ ዋዴ ኢያ ባንታራ ሶ ኤፊዲ ያሳ ኦጊያ ካሴይሳፌ ፔሺዲ ኢያው ኦዲዶሶና።

27 አጲሎስ አካያ ባናው ኮዩን ኤፌሶናን ዳዒያ አማኒያ አሳይ ኢያ ቆፋ ኤኪዲ አካያን ዳዒያ አማኔይሳቲ ኢያ ሞካና ማላ ኤንታው ዳብዳቤ ፃፊዶሶና። ኢ ያ ጋኪዳ ዋዴ ያሳ አጼ ኬሃቴላ ባጋራ ዬሱሰ ኪሪስቶሳ አማኒዳይሳታ ዳር ማዲሰ። 28 አይሰ ጊኮ፣ ዬሱሰ ኢ ኪሪስቶሳ ጊዳይሳ አይሁዴታሰ ያሳ ቃላፔ ቆንጨሲዲ ዴሪያ ሲንላን ሚንፍ ኦዲዲ ኤንታ ላሊሰ።

19

ጳውሎስ ኤፌሶና ቢሰ

1 አጲሎስ ቆርንቶሳን ዳዒሺን፣ ጳውሎስ ቆሞ ባጋራ አዲዲ ኤፌሶና ቢሰ። ያን ኢሲ ኢሲ አማኒያ አሳታ ዳሚሰ። 2 ኤንታኮ፣ «ሂንቴ አማኒዳ ዋዴ ጌሻ አያና ኤኪዳቲ?» ያጊዲ ኦይቺሰ።

ኤንቲ፡ «አካይ፡ ኤኪቦኮ፤ ሃሪ አቶሺን፡ ጌሻ አያኒ ዴዲያባካ ሲዲቦኮ» ያጊደሶና።

3 ጳውሎስ ኤንታኮ፡ «ያቲን፡ አይቢን ፃማቄቲዳቲ?» ያጊሰ።

ኤንቲ፡ «ኦኒ ዮሃንሳ ዊንቃቲያን ፃማቄቲዳ» ያጊዲ ዛሪደሶና።

4 ጳውሎስ፡ «ዮሃንሲ ባፔ ጉዬራ ያ ዩሱስ ኪሪስቶሳን አሳይ አማናና ማላ አሳሰ ኦዲሼ፡ ናጋራፔ ሲሞ ቤሲያ ዊንቃቲያን ፃማቄስ» ያጊሰ።

5 ኤንቲ ሄሳ ሲዲዳ ዋዳ ጎዳ ዩሱስ ኪሪስቶሳ ታማሬ ጊዳናው ፃማቄቲደሶና። 6 ጳውሎስ ባ ኩሺያ ኤንታ ቦላ ዋሊዳ ዋዳ ጌሻ አያኒ ኤንታ ቦላ ዋሊን፡ ዲማ ዲማ ደናን ኦዳቲደሶና፤ ቃሲ ቲንቢቲ ኦዲደሶና። 7 ሄ ቤሳን ታማኔ ናሞዓ ጊዲያ አሳቲ ዴዎሶና።

8 ጳውሎስ አይሁዴ ዋሳ ኬላ ጌሊዲ፡ ያሳ ካዋቲላባ ያዮና ፓላሚሼኔ ሎይሉ ቆንጨሲሼ ኤንታራ ሄቭ አጌና ጋካናው ጋሞዲሰ።

9 ሺን ኤንታፌ ኢሶቲ ኢሶቲ ቆቤ ጊዲዲ ዳሮ አሳ ሲንላን ጎዳ ኦጊያ ጫዩዲ አማናና ኢዲደሶና። ጳውሎስ አማኔይሳታ ኤንታፌ ሻኪ ኤኪዲ ዊራኖሳ ጊያ ቲሚርቲ ኬላን ኡባ ዋዴ ኤንታ ታማርሲሰ። 10 ጳውሎስ ናሞዑ ላይሉ ጋካናው ቃላ ኦዲሰ። ሄሳ ጊሹ፡ ኢሲያን ዴዲያ አሳ ኡባይ፡ አይሁዴቲኔ አይሁዴ ጊደናይሳቲ ጎዳ ቃላ ሲዲደሶና።

ያሳይ ጳውሎሳ ኩሺን ኦሊዳ ማላታታ

11 ያሳይ ጳውሎሳ ኩሺን ዋልቃማ ማላታታ ኦሊሰ። 12 ሄሳ ጊሹ፡ አሳይ ኢያ ቦላ ቦቹዳ ማራቢያ ዋይኮ ማዑዋ ሃርጋንቾታሰ ኤፎሶና። ኤንቲካ ፓዎሶና፤ ቱና አያናቲካ ኤንታፌ ኬዮሶና።

13 ቱና አያናታ ኬሲሼ ዩያ አይሁዴታፔ ኢሶቲ ኢሶቲ፡ «ጳውሎስ ሳባኪያ ዩሱሳ ሱንላን ኬዩቲ ጊዲ ሂንቴና ኪቶሰ» ያጊዲ፡ ቱና አያናቲ ኦይኪዳ አሳታ ቦላ ጎዳ ዩሱሳ ሱንላ ዊጊደሶና 14 ካሂኔ ሃላቃ አሰቁዌ ጊያ ኢሲ አይሁዴ አዲያሰ ሄሳ ኦሊያ ላፑን ናይቲ ዴዎሶና።

15 ሺን ቱና አያናይ ኤንታኮ፡ «ታኒ ዩሱሳካ ጳውሎሳካ ኤራይሰ፡ ሺን ሂንቴ ኦናንቴ?» ያጊሰ።

16 ቱና አያናይ ኦይኪዳ አዴይ ኤንታ ቦላ ጉፒ ዋሊዲ፡ ኤንታ ማዲንዊሲዲ፡ ሄ ኬላፌ ካሎ ባቃታና ጋካናው ዋልቃሚሰ።

17 ኤፌሶናን ዴዲያ አይሁዴቲኔ አይሁዴ ጊደናይሳቲ ኡባይ ሄሳ ሲዲዲ ዳሮ ያዩደሶና። ጎዳ ዩሱሳ ሱንላይ ዳሮ ቦንቹቲሰ።

19:4 ማቶ 3:11፤ ማር 1:4፣ 7-8፤ ሉቃ 3:4፣ 16፤ ዮሃ 1:26-27

18 አማኔይሳታፔ ዳርቲ ባንታ ኦሊዳ ኢታ ኦሱዋ ፓገሼኔ ቆንጨን ኦዲሼ ዮሶና። 19 ቢቴይሳታፔ ዳርቲ ባንታ ማፃፋታ ሺሺዲ አሳ ኡባ ሲንፋን ፀጊዶሶና። ሄ ማፃፋታ ጋቲያ ቆዳይ አሻታሙ ሙኩሉ ቢራ ሳንቲሜ * ገዲሰ። 20 ሄሳዳ ሃኒዲ ያሳ ቃላይ ዲጨሽኔ ዳልገሼ ቢሰ።

ኤፌሶና ካታማን ኦሺ ዳንዲሰ

21 ሄሲ ፖሌቲዳፔ ጉዬ ጳውሎስ፣ «ታኒ ዬሩሳላሜ ባ ሲማዳ ሮሜካ ባናው ቤሴስ» ያገዲ ማቆደኒያራኔ ኣካያራ ኣጲዲ ዬሩሳላሜ ባናው ቆፋ ቃቸስ። 22 ቃሲ ባና ማዳይሳታፔ ናምዓታ ግሞቲዮሳኔ ኤራሰያሳ ማቆደኒያ ከቲዲ፣ ባው ኢሲያን ጉላ ዎዴ ጋምዒሰ።

23 ሄ ዎዴ ጎዳ ኦጊያ ገሾ ኤፌሶናን ዎልቃማ ካቸ ከዩሰ።

24 ኢሲ ቢራ ኦሊያ ዳሜዲሮሳ ጊያ ኡራይ ኣርፃሚሲ ኤቃ ኩላ ሚሲሊያ ቢራፔ ኦሊዲ ዳር ዎዴ ዳሜሰ። 25 ሄሳ ገሾ፣ ሄሳ ሜላ ኦሶ ኦሊይሳታ ኢሲፌ ሺሺዲ፣ «አሳው፣ ኑ ዱራቴላይ ሃ ኦሱዋን ጊዳይሳ ሂንቴ ኤሬታ። 26 ሃይሲ ጳውሎስ፣ «አሳ ኩሼን ኦሴቲዳይሳቲ ያሳታ ገዶኮና» ያገዲ፣ ኤፌሶናኒኔ ጉላ ቢታታፔ ኣቲን ኩሜላ ኢሲያ ኡባን ዳዒያ ዳር አሳ ኦዲ ኣማንላዳይሳኔ ባሌላዳይሳ ሂንቴ ቤዒዳታኔ ሰዒዳታ። 27 ሜቶ ገዲዳይ፣ ኑ ኦሶይ ካዴቴይሳ ፃላላ ገዶናሺን ኢሲያኒኔ ቢታ ኡባን ዳዒያ ኣሲ ጎይኒያ ጊታ ያሴ ኣርፃሚሲ ኩላይ ቦንቸቶና ኣቴይሳኔ ኢ ጊታቴላይካ ኩንዳናይሳ» ያገሰ።

28 አሳይ ሄሳ ሲዒዳ ዎዴ ሸኔን ፀጊቲዲ፣ «ኤፌሶና ኣርፃሚሳ ጊታ» ያገዲ ዎሲዶሶና። 29 ሄ ዎሶይ ካታማ ኡባ ጋኪሰ። ጳውሎሳራ ሃሙቲያ ማቆደኒያ አሳታ፣ ጋዮሳኔ ኣርሰፃሮኮሳ ኦይኪዲ ጎቸሼ ካሳ ቤሳ ዎፂዶሶና። 30 ጳውሎሲካ አሳይ ሸቆዳሱዎ ጌላናው ኮዩሰ፣ ሸን ኣማኔይሳቲ ኢያ ዲጊዶሶና። 31 ኢሲያ ቢታ ሃላቃታፔ ጳውሎሳ ላጌ ገዲዳ ኢሶቲ ኢሶቲ ጳውሎሳኮ ከቲዲ፣ «ካሳ ቤሳ ቆንጨን ኬያዳ ቤንቶፋ» ገዲ ኢያ ዎሲዶሶና።

32 ሸቆዳ አሳሰ ሃናናባይ ጳይሰ፤ ዳሪያ ባጋ አሳይ ሃሪ ኣቶሺን ኣይሰ ሸቆዳኮ ኤሮና ገሾ ኢሶይ ኢሲባሰ ዎሲያ ዎዴ ሃንኮይ ሃራባሰ ዎሴሰ። 33 ኣይሁዴቲ ኢሰከንዲሬ ጊያ ኣዲያ ኣላ ቤሲን፣ ኢሲ ኢሲ አሳይ ኢ ጋናባ ኦዲዲ ኢያ ሲንፎ ኣላዶሶና። ኢ አሳይ ሲዒ ጋና ሜላ ባ ኩሺያን ማሊ ቤሲዲ፣ አሳሰ ሞቲታናው

* 19:19 ቢራ ሳንቲሜ፡ ማቶሳ 26:15 ጻሊቲ።

ኤቂስ። 34 ሺን ኢስኪንዲሬይ አይሁዳ አሲ ጊዲዳይሳ አሳይ ኤሪዳ ዋዴ ናምዑ ሳቲ ጊዳናይሳ ማላ ኡባይ ኢሲ ቃላን። «ኤፌሶና ኣርፄሚሳ ጊታ» ያጊዲ ዋሲዶሶና።

35 ወርሴላን ካታማ ፃፊይ አሳ ሲዒ ኦሊዲ፣ «ኤፌሶና አሳው! ኤፌሶና ካታማይ ጊታ ኣርፄሚሲ ኤቃ ኩላኔ ሳሎፔ ዋቋዳ፣ ኢ ሹቻ ሚሲሊያ ናጌይሳ ጊዳይሳ ኤርና አሲ ባዋ።

36 ሃይሳ ካሺ ጊያ አሲ ባይና ጊሾ ሂንቲ ሲዒ ጋናወኔ ዲርጊዲ አይኮ ኦላና አጋናው ቤሴስ። 37 ሂንቲ ሃ አሳታ፣ ኤቃ ኩላ ሚሼ ካይሶተቦናይሳታኔ ኑ ያሳታ ጫይቦናይሳታ ኤሂዳታ። 38 ሃሳ ጊሾ፣ ዲሜዒርሲኔ ኢያራ ዳዒያ አሳንቸቲ አሳ ሞታናው ኮይኮ።

ፐርዳ ኩላይ ዶያ ዳዒስ፤ ዳይናቲካ ዳይሶና፤ ኤንቲ ሞታናው ዳንዳይሶና። 39 ሺን ሂንቲ ሃራ ኦዳ ኮይኮ፣ ሻንጎ ሺቆን ኦዳይ ቤዒቶ። 40 ሃሳ ጊዳና ኢዳኮ ሃቺ ሃኒዳባሰ ሮሜ ካዎቲላይ ኑና ኦይቻና። ሃ ቡቁላሰ ጋሶይ ባይና ጊሾ ኑኒ ጋሶ ኦዳናው ዳንዳይሶ»

41 ያጊዲ ሺቁዋ ላሊስ።

20

ጳውሎሲ ማቁደኒያኔ ጊሪኬ ቢስ

1 ዋሶይ ዳጩዳፔ ጉዬ ጳውሎሲ አማኒያ አሳታ ፀጊሲዲ ኤንታ ዘሪዳፔ ጉዬ ሳርሊዲ ማቁደኒያ ባናው ኩዩስ። 2 ኢ አዲያ ቢታታን ዳዒያ አማኒያ አሳ ቃላ ኦዲዲ ሚንሌሊዳፔ ጉዬ ጊሪኬ ቢታ ቢስ። 3 ኢ ያን ሃቸ ኣጌና ኡቲዲ፣ ማርካቤራ ሶሪያ ባናው ቆፐዲ ዳዒሺን፣ አይሁዳቲ ባና ዋቋናው ኮይይሳ ኤሪዳ ማቁደኒያራ ጉዬ ሲማናው ኮዩስ።

4 ጳውሎሳ ሞይዚዳይሳቲ ቤሪያፔ ጳርሁሳ ናዓ ሶጳዒርሳ፣ ቲሴሎንቁሬ ኣርሰዒርኮሳኔ ሲኮንዲሳ፣ ዳርቤሬ ጋዮሳ፣ ኢሲያፔ ቲኪቆሳ፣ ዒርፊሞሳኔ ዒሞቲዮሳ። 5 ሃሳቲ ሲንሌ ቢዲ ኑና ዒርዓዳን ናጎሶና። 6 ኑኒ ኡይላ ባሊያ ቦንቺዳፔ ጉዬ ፊልጲሲዩሳፔ ማርካቤራ ዳንዲዲ፣ ኢቻሻንሎ ጋላሳን ኤንታ ዒርዓዳን ጋኪዲ ያን ላፑን ጋላስ ጋምዒዳ።

ጳውሎሲ ዒርዓዳን

7 ሳሚንታሬ ኮይሮ ጋላሳን ኑኒ ኡይላ ማንላናው ሺቁዲ ዳዒሺን፣ ጳውሎሲ ዋንቲሌ ባናው ቆፐዳ ጊሾ ኤንታው ቃላ ኦዲሺ ጊዲ ቢላሃ ጋካናው ኦዳ አዲሲስ። 8 ኑኒ ሺቁዲ ኡቲዳ ፖቂያን ዳሮ ፖይይ ዳዒስ። 9 ኤወዒኮሳ ጊያ ኢሲ ናሳቲላይ ማስኮቲ ቦላ ኡቲዲ፣ ባና ዶጊዲ ጲስኪስ። ጳውሎሲ ኦዳ

አዲሲዳ ዎዴ ኤወዲኮሲ ጳሰኮ ኤዩዲ ሃቫንላ ፖቂያፔ ኩንዲዲ ሃይቂዳይሳ አሳይ ዳንሉስ። 10 ሺን ጳወሎሲ ዎጲዲ፣ ኢያ ቦላ ጉፋኒስ። ኢያ ኢዲሚዲ፣ «ኢ ሃይቂቤና፣ ሂርጎፊቴ» ያገሰ። 11 ሃሳፌ ጉዬ፣ ፑዴ ፖቂያ ቦላ ከዩዲ ኤይላ ማንሲዲ ሚስ። ሳዒ ዎንታና ጋካናው አሳስ ኦዲዳፔ ጉዬ ዴንዲዲ ቢስ። 12 ሄ ፓዲዳ ናቴላ ሶ ኤፊዲ ዳሮ ኡፋይቲዶሶና።

ጳወሎሲ ዓርዓዳፔ ሚሊዳ ቢስ

13 ሺን ጳወሎሲ ባና ያፔ ሞካና ማላ ኦስ ኦዲዳ ጊሾ ካሴቲዲ ማርካቢያኮ ቢዲ፣ አሶሳ ባናው ዴንዲዳ። አይስ ጊኮ፣ ኢ ቶሆን ባናው ቆፒዳ ጊሾ ኦና ሃሳላ ከቲስ። 14 ኢ ኦራ አሶሳን ጋሂቲን ማርካቢያን ኢያ ኤኪዲ ሚዲሊኔ ቢዳ። 15 ዎንቴላ ጋላስ ያፔ ዴንዲዲ ማርካቤራ ከዮሳ ሲንጼን ዴዒያ ቤሳ ጋኪዳ፤ ቃሲ ዎንቴላ ጋላስ ሳሞሳ ፒኒዲ ካሊያ ጋላስ ሚሊዳ ጋኪዳ። 16 ጳወሎሲ ኢሲያን ዳሮ ጋሞዖና ኤፊሶና ማታራ አጳናው ቆፒስ። ባው ዳንዳዔቲኮ ጳንዩቆስዩ ባሊያ ጋላስ ዩሩሳላሚ ጋካናው ኤሶቴስ።

ጳወሎሲ ኤፊሶና ጨማታ ዞሪስ

17 ጳወሎሲ ሚሊዳፔ ኤፊሶና ከቲዲ ዎሳ ኬላ ጨማታ ያገሰሰ። 18 ዎሳ ኬላ ጨማቲ ኢያኮ ዪን፣ ኤንታኮ ሃይሳዳ ያገሰ። «ታኒ ኢሲያ ጌሊዳ ኮይሮ ጋላሳፔ ዶሚዳ ሂንቴራ ዴዒዳ ዎዴ ኡባን ዋና ዴዒዳኮ ሂንቴ ኤሬታ። 19 አይሁዳቲ ዲላቲዲ ታ ቦላ ሚቶ ጋሊኮካ ታኒ አሽኬቴላኒኔ ዳሮ አፋላን ጎዳስ ኦላስ። 20 ዳባባንካ ሂንቴ ኬላን ኬላን ሂንቴና ታማርሲሼ ሂንቴና ማዲያባፔ ኢሲባካ ፓጨሳቢኬ። 21 ታኒ አይሁዳታሲኔ አይሁዳ ጊዶናይሳታስ ናጋራፔ ያሳኮ ሲማና ማላኔ ኦ ጎዳ ዩሶሳ አማናና ማላ ማርካታስ።

22 «ያን ታና አይቢ ጋካኔኮ ኤሪኬ፣ ሺን ሃዒ ታኒ ጌሻ አያናስ ከቲታዳ ዩሩሳላሚ ባይስ። 23 ጌሻ አያናይ ቃሾይኔ ዋዩይ ታና ናጌይሳ ካታማ ኡባን ታው ማርካቲስ። 24 ሺን ታ ዎላ ፖላናወኔ ጎዳ ዩሶስ ኪሪስቶሳፔ ኤኪዳ ኦሱዋ፣ ያሳ አጼ ከሃቴላ ዎንጌላ ማርካቴይሳ ፖላናው ታ ሸምፒው ፓሶናባዳ ቆዳይስ።

25 «ታኒ ሃዒካ ያሳ ካዎቴላ ማርካታሼ ሂንቴ ኡባ ጊደን ዩያስ። ሂዛፔ ጉዬ ሂንቴፌ ኦኒካ ታና ቤዖናይሳ ኤራይስ። 26 ሃሳ ጊሾ፣ ሂንቴፌ ኢሲ ኡራይ ጳዩኮካ ታ ኦይሼቶናይሳ ሃቺ ሂንቴው ጌሻዳ

ኦዲይስ። 27 እይስ ጊኮ፣ ያሳይ ኦላናው ቆፒዳባ ኡባ ሂንቴው አይቢባካ አሾና ኦዲስ።

28 «ባ ናባ ሱላን ዋዚዳ ያሳ ዋሳ ከላ ናጊቴ። ጌሻ አያናይ ሂንቴና ሃላቃ ኦሲዲ ደሪዳ ዉዲያሲኔ ሂንቴ ሁዒያሰ ናጊቴቴ። 29 ታኒ ቢዳፔ ጉዬ፣ ዉዲያሰ ቃጭቶና ኢታ ሱጵሜቴ ሂንቴ ጊዶ ጌላናይሳ ታ ኤራይስ። 30 አማኔይሳታ ባንታ ጌዶ ካሌላናው ዋርዶ ታማርሲያ አሳቴ ሂንቴ ጊዶፌ ዴንዳና። 31 ሄሳ ጊሾ፣ ታኒ ሄሹ ላይሴ ቃማኔ ጋላሰ አፋላን ሂንቴና ሁዒን ሁዒን ሚንሌሴዳይሳ ቆፒሼ ናጊቴቴ።

32 «ሃዒካ ሂንቴና ሚንላናውኔ ጌሻ አሳራ ላቴሳናው ዳንዳዒያ ያሳሲኔ ኢያ አጵ ከሃቴላ ቃላሰ ሂንቴና ሃዳራ ኢማይስ።

33 «ታኒ ኦፐካ ቢራ ዋይኮ ዋርቃ ዋይኮ አፊላ አዋታቢከ።

34 ታኒ ታ ኩሼን አላዳ ታናኔ ታራ ዴዒይሳታ ኮሺዳባ ማዲዳይሳ ሂንቴ፣ ሂንቴ ሁዒን ኤሬታ። 35 ሂንቴ ሃይሳዳ ዳቡሪዲ ኦሲሼ ዳቡራንቸታ ማዳናይሳኔ ጎዳ ዩሱሲ፣ «ኤኬይሳፌ ኢሜይሲ አንጃቴዳይሳ» ጊዳ ቃላ ሂንቴ ቆፓናው ቤሴይሳ ታኒ ሂንቴና ኡባባን ቤሳሰ» ያገሰ።

36 ጳዉሎሲ ሄሳ ኦዲ ኦንጊዲ ኤንታ ኡባራ ጉልባቴዲ ያሳ ዋሲስ። 37 ኤንቴ ኡባይካ ጳዉሎሳ ኢዲሚዲ ዩኪዲ ዩሪዶሶና። 38 ኢ ዛሪዲ፣ «ታና ቤዒኬታ» ያገዲ ቃላይ ኤንታ ዳር አዛንሴስ። ኤንቴ ማርካቢያ ጋካናው ኢያ ሞይዚዶሶና።

21

ጳዉሎሲ ዩሩሳሌሜ ቢስ

1 ኑኒ ኤፌሶና ጨማታፔ ሻኬቴዳ ሜላ ቆሴ ቢዳ። ዋንቴላ ጋላሰ ሮዳ ጋኪዲ ያፔ ጳፃራ ቢዳ። 2 ሲሮፊንቄ ፒኒያ ማርካቤ ዴሚዲ ኢያን ጌሊዲ ባናው ዴንዲዳ። 3 ኑኒ ቆጲሮሳ ቤዳናው ዳንዳዒያ ሶ ዩዲ፣ ቆጲሮሳ ሃዲርሳ ባጋ ኦጊዲ ሶሪያ ቢዳ። ማርካቤይ ባ ጫና ያን ዋላናው ኮዩዳ ጊሾ ዲሮሳ ቢዳ። 4 ያን አማኒያ አሳታ ዴሚዲ ኤንታራ ላፑን ጋላሰ ኡቴዳ። ጳዉሎሲ ዩሩሳሌሜ ሶና ሜላ ኤንቴ ኢያው አያናን ኦዲዶሶና። 5 ኑኒ ኤንታራ ኡቴያ ዋይይ ዉሪን ከዩዲ ቢዳ። ኤንቴ ኡባይ ባንታ ማጫሳታራኔ ባንታ ናይታራ ኢሲፌ ካታማፔ ካሪ ከሲዲ ኑና ሞይዚዶሶና። ኑኒ አባ ዶናን ጉልባቴዲ ያሳ ዋሲዳ። 6 ሄሳፌ ጉዬ፣ ዋሊ ሳርሴዲ ኑ ማርካቢያን ጌሊዳ፤ ኤንቴ ባንታ ሶ ሲሚዶሶና።

7 ኑኒ አባ ኦጊያ ኦንጊዲ፣ ዲሮሳፔ ጳጳሌማይሳ ጋኪዳ። ያን አማኒያ አሳታ ሳርሊዲ፣ ኤንታ ማታን ኢሲ ጋላስ ፔሲዳ።
 8 ዋንቴላ ጋላስ ከዪዲ፣ ቁሳሪያ ቢዳ። ሳባኪያ ፊልጶሳ ሶ ጋኪዲ ኢያ ማታን ኡቲዳ። ኢ ዪሩሳሌሜን ካሴ ዶሪቲዳ ላፑናታፔ ኢሱዋ። 9 ፊልጶሳስ ናቤ ጊዲዳ ኦይዲ ጌላዖ ናይቲ ዴዖሶና።

10 ኑኒ ኡንዴና ጋላስ ያን ኡቲዲ ዴሲሺን አጋሶሳ ጊያ ናቤይ ዪሁዳፔ ቁሳሪያ ዪሶ። 11 ኑኮ ዪዲ ጳውሎሳ ሳቁያ ኤኪዲ ባ ኩሺያኔ ባ ቶሁዋ ቃቺዲ፣ «ጌሻ አያናይ ሃ ሳቁያ ጎዳ፣ ዪሩሳሌሜን አይሁዳቲ ሃይሳዳ ቃቺዲ፣ አይሁዳ ጊዶና አሳስ አሊዲ ኢማና ያጌሰ» ያጌሰ።

12 ኑኒ ሄሳ ሲዲዳ ዋዴ ኑኔ ያን ዴሲያ አሳቲ ጳውሎሲ ዪሩሳሌሜ ቦና ማላ ዋሲዳ። 13 ሺን ጳውሎሲ ዛሪዲ፣ «ሂንቲ ሃይሳዳ ዩኪሼ አይስ ታ ዋዛና ሹጊሴቲ? ታኒ፣ ጎዳ ዩሱሳ ሱንላ ጊሹ ቃሹቴላ ዓላላ ጊዶናሺን ዪሩሳሌሜን ሃይቃናዉካ ጊጌታስ» ያጌሰ።

14 ኑ ዞሪያ ኢ ኤኮና ኢዲን፣ «ጎዳ ሸኔይ ሃና» ያጊዲ ሲዲ ጊዳ።

15 ያን ጉላ ዋዴ ጋምሲዳፔ ጉዬ ጊጌቲዲ ዪሩሳሌሜ ባናው ከዪዲ። 16 ቁሳሪያን ዴሲያ አማኒያ አሳታፔ ጉላቲ ኑራ ቢዶሶና። ኤንቲ ኑኒ ሸምፓናሱዋ ሚናሶና ጊያ ቆጶሪሳ አዲያ ሶ ኤፊዶሶና። ሚናሶኒ ኮይሮ አማኒዳ አሳፔ ኢሱዋ።

ጳውሎሲ ዪሩሳሌሜ ጋኪሰ

17 ኑኒ ዪሩሳሌሜ ጋኪዳ ዋዴ አማኒያ አሳቲ ኑና ኡፋይሳን ሞኪዶሶና። 18 ዋንቴላ ጋላስ ጳውሎሲኔ ኑኒ ያይቆባራ ጋሄታናው ቢዳ። ዋሳ ኬላ ጨማቲ ኡባቲካ ያን ዴዖሶና። 19 ጳውሎሲ ኤንታ ሳርሊዳፔ ጉዬ አይሁዳ ጊዶና አሳ ጊዶን ባ ባጋራ ያሳይ ኦሊዳባ ኡባ ኤንታው ኡዲሰ።

20 ኤንቲ ሄሳ ሲዲዳ ዋዴ ያሳ ጋላቲዲ ጳውሎሳኮ ሃይሳዳ ያጊዶሶና፣ «ኑ አሻው፣ አይሁዳታ ጊዶን አፑን ሙኩላቲ ያሳ አማኒዳኮ ኔ ቤዓሳ፤ ኤንቲ ኡባይካ ሂጊያ ሚንሊ ናጎሶና። 21 ኑኒ አይሁዳ ጊዶናይሳታ ቢታን ዴሲያ አይሁዳ ኡባይ ባንታ ናይታ ቃፃሮና ማላ፣ አይሁዳታ ዋጋ ካሎና ማላኔ ሙሴ ሂጊያ ኢፃና ማላ ኔኒ ታማርሴይሳ ዪሩሳሌሜን ዴሲያ አይሁዳቲ ሲዲዶሶና። 22 ያቲን አይቤ ሎዖ? ኔኒ ዪዳይሳ ዳሮቲ ሲዳና።

23 «ሄሳ ጊሹ፣ ኑኒ ኔው ኦዴይሳ ሲባይ፤ ጋሶይ ዴባያ ኦይዱ ኣሳቲ ኑ ማታን ዴዖሶና። 24 ኤንታ ኤካዳ ኤንታራ ጌያ፤ ቃሲ ኤንቲ ባንታ ሁባያ ማዴታና ማላ ኤንታው ሚሼ ኢማ። ኤንቲ ካሴ ኔባ ሲባይሲ ቱማ ጊዶናይሳኔ ኔኒ ኔ ሁዔንካ ሂጌ ናጊያ ኣሲ ጊዴይሳ ኡባይ ኤራና።

25 «ሺን ኣማኒዳ ኣይሁዳ ጊዶና ኣሳታ ጊዲኮ፣ ኤንቲ ኤቃሰ ያርሹቲዳባ ሞና ማላ፣ ሱፉ ኡዮና ማላ፣ ባዉታ ሞና ማላኔ ላይማቶና ማላ፣ ኑኒ ኦዳ ቃቹዲ፣ ኤንታው ዳብዳቤ ፃፊዳ» ያጊደሶና።

26 ሄሳፊ ጉዬ፣ ጳውሎሲ ዋንቱላ ጋላስ ኣሳታ ኤኪዲ፣ ኤንታራ ጌዩስ። ኢ ባንታ ጌያ ጋላሳይ ኣዉዴ ፖሌቲያኮ ኤሪሳናዉኔ ባንታ ያርሹዋ ኣዉዴ ያርሻኑኮ ኤሪሳናው ያሳ ኬላ ጌሊስ።

ጳውሎሲ ኣይኬቲስ

27 ላፑን ጋላሳይ ዉራና ሃኒሺን፣ ኢሲያፔ ዩዳ ኣይሁዳቲ ያሳ ኬላን ጳውሎሳ ቤባዲ፣ ኣሳ ኡባ ዴንሌላዲ ጳውሎሳ ኦይኪደሶና። 28 «ኢሰራዔሌ ኣሳው፣ ኑና ማዲቲ፤ ሃ ኡራይ፣ ኑ ዴሪያ፣ ኑ ሂጊያኔ ሃ ያሳ ኬላ ኢፃና ማላ ኣሳ ኡባ ታማርሴስ። ሄሲካ ጊዶና ኢፃን ኣይሁዳ ጊዶናይሳታ ያሳ ኬላ ጌልሲዲ፣ ሃ ጌሻ ቤሳ ቱኒሲስ» ያጊዲ ዋሲደሶና። 29 ኤንቲ ሄሳ ጊዳይ ካሴ ኤፊሶና ፃሪፊሞሳ ጳውሎሳራ ካታማን ቤባዲ ጊሾ ሃባ ጳውሎሲ ያሳ ኬላ ኢያ ኤኪ ጌሊዳባ ኤንታው ዳኒስ።

30 ካታማ ኡባይ ቡቁቲስ፤ ኣሳ ኡባይ ሸቁዲ ጳውሎሳ ኦይኪዲ ያሳ ኬላፊ ካሬ ጎቹደሶና። ያሳ ኬላ ፔንጌቲ ኤሌሲዲ ጎርዴቲደሶና። 31 ኣሳይ ጳውሎሳ ዋጳና ሃኒሺን፣ «ዩሩሳላሜ ካታማይ ኩማላ ቡቁቲስ» ጊያ ኦዳይ ሮሜ ሻላቃኮ ጋኪስ። 32 ሻላቃይ ዋታዳሬታኔ ማቶ ሃላቃታ ኤኪዲ ዋፂሼ ዩስ። ኣሳይ ሻላቃኔ ዋታዳሬታ ቤባዲ ዋዴ ጳውሎሳ ዋጴይሳ ኣጋጊደሶና።

33 ሄ ዋዴ ሻላቃይ ሸቁዲ፣ ጳውሎሳ ኦይኪዲ፣ ናሞቡ ሳንላላታን ቃሹታና ማላ ከቲስ። ያቲዲ፣ ኢ ኦኔኮኔ ኣይ ኦሊዳኮ ኣሳ ኦይቹስ። 34 ኣሳፔ ባጋይ ኢሲባ ጊዲ ዋሲያ ዋዴ ሃራቲ ሃራባ ጊዲ ዋሴስ። ዋሶይ ዳሪዳ ጊሾ ሻላቃይ ቱማ ሻካንው ዳንዳዔቶና ኢፃን፣ ዋታዳሬቲ ጳውሎሳ ባንታ ዴባያሶ ኤፋና ማላ ከቲስ። 35 ጳውሎሲ ዩጲ ኬያ ዴላ ጋኪያ ዋዴ ኣሳ ሱጌላ ጊሾ

ዎታዳሬቲ ኢያ ቶኪደሶና። 36 ዳር አሳይ፡ «ኢ ሃይቆ!» ያጊዲ ዋሲሽ ካሎሶና።

ጳውሎስ ሞቱዋሰ ዛር ኢሚስ

37 ዎታዳሬቲ ጳውሎሳ ባንታ ዳዒያሱዋ ጌልሳና ሃኒሺን፡ ጳውሎሲ ሻላቃኮ፡ «ታኒ ኔው ኢሲባ ኦዶ?» ያጊሰ።

ኢ ጳውሎሳኮ፡ «ኔኒ ጊሪኬ ዶና ኤራይ? 38 ኔኒ ሃይሳፌ ሲንጼ ቡቁሴ ሜዲዲ ሸዎፖ ዎዲዳ ኦይዲ ሙኩሉ አሳታ ኤኪዲ ባዞ ጌሊዲ ጊብፃ ኡራ ጊዲኪ?» ያጊሰ።

39 ሺን ጳውሎሲ፡ «ታኒ፡ ኪልቂያን ዳዒያ ኤሬቲዳ ቲርሴሴ ካታማን ዩሉቲዳ አይሁዳ አሲ። ሃያና ታና ኦዲሳርኪ?» ያጊሰ።

40 ሻላቃይ ኢያኮ፡ «ኦዳ» ያጊን ጳውሎሲ ዳላ ቦላ ኤቂዲ፡ አሳይ ሲዒ ጋና ሜላ ባ ኩሺያን ማሊሰ። አሳይ ሲዒ ጊን ኢብራይስፄ ዶናን ሃይሳዳ ያጊሰ።

22

1 «ታ ኢሻቶ፡ ታ አዋቶ፡ ታኒ ሃዒ ሂንቴው ኢሚያ ዛሩዋ ሲዒቲ።» 2 ጳውሎሲ ኤንታው ኢብራይስፄ ዶናን ኦዳይሳ ሲዒዲ ካሴይሳፌ አሉዲ ሲዒ ጊደሶና። ኢ ካሊዲ፡

3 «ታኒ ኪልቂያን ዳዒያ ቲርሴሴን ዩሉታዳ ሃ ካታማን ዲጫሰ። ታ አሰታማሬይካ ጋማሊያሌ፤ ታኒ ኦ አዋታ ሂጊያ ሚንላ ታማሪዳ፡ ሃቺ ሂንቴ ኡባይ ሃኔይሳዳ ያሳሰ ሚሼቲያ አይሁዳ አሲ። 4 ታኒ ሃ ኦጊያ ካሊያ ማጫታኔ አዳታ ኦይካዳ ቃሾ ኬላን ዩጋሼን ኤንታ ዎዲሳና ጋካናው ዋዬ ቤሲዳ አሲ። 5 ሂሳዳካ፡ ካሄኔ ሃላቃይኔ ሻንጎ ኡባይ ታባ ማርካታናው ዳንዳዔሰ። ታኒ ዳማሰቆን ዳዒያ ኤንታ ኢሻታሰ ኤንታፌ ዳብዳቤ ኤካዳ ያን ዳዒያ አሳቲ ቃሼቲዲ ሴሬታና ሜላ ዩሩሳላሜ ኤንታ ኤሃናው ያ ባሰ።

6 «ታኒ ባዳ ዳማሰቆ ማቲዳ ዎዳ ሴታ ጋላሰ ቆፖና ሳሎፔ ጊታ ፖይይ ታ ዩሹዋን ፖዒሰ። 7 ታኒ ሳዒን ኩንዳ ዳዒሺን፡ ሳያላ፡ ሳያላ፡ ታና አይሰ ጎዳይ?» ጊያ ቃላ ሲዒሰ። 8 ታኒ ዛራዳ፡ ሳዳው፡ ኔኒ ኦኔ?» ያጋሰ።

ኢ ዛራዲ፡ «ታኒ፡ ኔኒ ጎዲያ ናዚሬቲ ዩሱሳ» ያጊሰ። 9 ታራ ዳዔይሳቲ ፖዑዋ ቤዒደሶናፔ ኣቲን ታው ኦዳይሳ ቃላ ኣኬኪቦኮና።

10 «ታኒ፥ ሳዳው፥ ታ ኣይ ኦሎ?» ያገሰ።
 «ሳዳይ ታኮ፥ ሩዳዳ ዳማሰቆ ባ። ኔኒ ኦላና ሜላ ያሳይ ቆፒዳባ ኡባይ ያን ኔው ኦዳታና» ያገሰ። 11 ሄ ዋልቃማ ፖዑዋ ጋሶን ታ ኣይፊይ ቆቂን፥ ታራ ዳዒያ ኣሳቲ ታ ኩሺያ ኦይኪዲ፥ ታና ሳቲን ዳማሰቆ ጋካሰ።

12 «ዳማሰቆን ዳዒያ ኣይሁዳ ኡባይ ዳሮ ቦንቲያ ኢሲ ሃናኒያ ጊያ ኣዳይ፥ ኦ ሂጊያ ቦንቲይሲኔ ያሳ ሚንሲ ዋሴይሲ ዳዒሰ። 13 ሃናኔይ ታኮ ዪዲ፥ ታ ማታን ኤቂዲ፥ ታ ኢሻው ሳዖላ፥ ያላ» ያገሰ። ኤሌሳዳ ታኒ ኢያ ያላ ኣገሰ።

14 «ኢ ታኮ፥ ሩ ኣዋታ ያሳይ ኔኒ ኢያ ሺኒያ ኤራና ሜላ፥ ኢያ ያሎ ናባ ቤዓና ሜላኔ ኢያ ደናፔ ቃላ ሲዓና ሜላ ካሴቲዲ ኔና ደሪሰ። 15 ኔኒ ቤዒዳባኔ ሲዒዳባ ኣሳ ኡባ ሲንሳን ኢያው ማርካታና። 16 ሃዒ ኣይሰ ጋሞዓይ? ዳንዳዳ ፃማቂታ፤ ኢያ ስንሳ ያጋዳ ኔ ናጋራፔ ሜጩታ» ያገሰ።

17 «ታኒ ጉዬ ዬሩሳላሜ ሲማዳ ያሳ ኬላን ዋሲሺን፥ ታው ቆንጩሲ ቤንቲሰ። 18 ቆንጩሳን ሳዳይ ታኮ፥ ሩ ታው ማርካቲያ ማርካቲሳ ኣሳይ ኤኮና ጊሾ ኤሌሳዳ ዬሩሳላሜፔ ኬያ» ያገሺን ቤዓሰ።

19 «ታኒ፥ ሳዳው፥ ኣይሁዳ ዋሳ ኬላ ኡባን ኔና ኣማኔይሳታ ኦይካዳ ዋዲዳይሳኔ ቃሾ ኬላን ዬጊዳይሳ ኤንቲ ኤሮሶና። 20 ኤንቲ ኔ ማርካ ኢሰዲፋኖሴ ዋዲያ ዋዳ ታኒ ሄ ኦዳን ኢሲፋሰ። ቃሲ ኤንታ ማታን ኤቃዳ ኢያ ዋዲይሳታ ማዑዋ ናጋይሰ» ያገሰ።

21 «ሳዳይ ታኮ፥ ታኒ ኔና ኣይሁዳ ጊዶና ኣሳኮ ሃሆሶ ኪቲያ ጊሾ ዳንዳዳ ባ » ያገሰ።

ጳውሎሲ ሮሜ ኣሲ ጊዳይሳ ቆንጩሲሰ

22 ጳውሎሲ ሄ ቃላ ኦዲዲ ኦንጋና ጋካናው ኣሳይ ኢ ጌይሳ ሲዖሶና። ሄሳፊ ጉዬ፥ ባንታ ቃላ ቶቁ ኦሲዲ፥ «ሃይሳ ቢታፊ ቆይሳ! ኢ ዳናው ቤሴና» ያገደሶና።

23 ኤንቲ ዋጫሚሺን፥ ባንታ ማዑዋ ቦላ ሆሊሺኒኔ ባና ቦላ ላሊሺን፤ 24 ሻላቃይ ቤዒዲ ዋታዳሬቲ ጳውሎሳ ባንታ ዳዒያሱዋ ኤፋና ሜላ ኪቲሰ። ቃሲ ኣሳይ ኣይሰ ሄሳዳ ዋጫሚዳኮ ኤራናው ኮዪዲ ጳውሎሳ ሊሶን ጋራፊዲ ፒልጋና ሜላ ኤንታ ኪቲሰ። 25 ሺን ዋታዳሬቲ ጳውሎሳ ዳፎን ሚንሲ ቃቲዲ ጋራፋና ሃኒያ

ዎዴ ጳውሎሲ ባ ማታን ኤቁዳ ማቶ ሃላቃኮ፡ «ሮሜ ኣሲ * ፒሮዲ ባይና ጋራፌይሲ ሂንቴው ዎጌ?» ያጊሰ።

26 ማቶ ሃላቃይ ሄሳ ሲዒዳ ዎዴ ሻላቃኮ ቢዲ፡ «ሃ ኣዳይ ሮሜ ኣሲ። ኔኒ ኣይ ኦላናው ቆፓይ?» ያጊዲ ኦይቺሰ።

27 ሻላቃይ ጳውሎሳኮ ሸቁዲ፡ «ኔኒ ሮሜ ኣሲ? ኣኔ ታው ኦዳ» ያጊሰ።

ጳውሎሲ፡ «ኤ» ያጊሰ።
28 ሻላቃይ ዛሪዲ፡ «ታኒ ሃ ጋዴቴላ ዳሮ ሚሼን ሻማስ» ያጊሰ።

ሺን ጳውሎሲ፡ «ታ ሃ ጋዴቴላ ዬሌቴላን ዳማ ኤካሰ» ያጊሰ።
29 ሄሳ ጊሾ፡ ጳውሎሳ ፒልጋናው ቆፒዳይሳቲ ኢራ ኢያፔ ሻኬቴዶሶና። ሻላቃይ ሮሜ ኣሲ ሳንላላታን ቃቺዳይሳ ኤሪዳ ዎዴ ያዩሰ።

ጳውሎሲ ኣይሁዳ ሻንጎ ሲንጼ ሸቁሰ

30 ዎንቴላ ጋለስ ሻላቃይ፡ ኣይሁዳቲ ጳውሎሳ ኣይስ ሞቲዳኮ ጌሺ ኤራናው ኮዩሰ። ካሂኔ ሃላቃቲኔ ሻንጎ ኡባይ ሸቃና ሜላ ከቲሰ፤ ቃሲ ጳውሎሳ ቃሾፔ ቢሊሲዲ ኤንታ ሲንላን ኤሲሰ።

23

1 ጳውሎሲ ሸቁዋ ጫዲ ጃሊዲ፡ «ታ ኢሻቶ፡ ታኒ ሃቺ ጋካናው ያሳ ሲንላን ታ ዴዎ ኡባን ሎዎ ዎዛናን ዴዳስ» ያጊሰ።

2 ካሂኔ ሃላቃይ ሃናኔይ፡ ጳውሎሳ ደናን ባቃና ሜላ ኢያ ማታን ኤቁዳይሳታ ከቲሰ።³ ሄ ዎዴ ጳውሎሲ ኢያኮ፡ «ላ ኔ ቦቁንቴ ቲዩዳ ጎዳ ዳኔይሶ፡ ያሳይ ኔና ባቃና። ኔኒ ታ ቦላ ሂጊያላ ፒሮዳናው ኡታዳ ዴዳሼ ሂጌይ ባይና ታና ባቃና ሜላ ከታይ?» ያጊሰ።

4 ጳውሎሳ ማታን ኤቁዳይሳቲ ኢያኮ፡ «ኔ ያሳ ካሂኔ ሃላቃ ጫያይ?» ያጊደሶና።

5 ጳውሎሲ፡ «ታ ኢሻቶ፡ ኢ ካሂኔ ሃላቃ ጊዲዳይሳ ታኒ ኤራቢኬ፤ ኣይስ ጊኮ ያሳ ቃላን፡ ሳይ ዴዳያ ኣይሴይሳ ቦላ ኢታ ቃላ ሃሳዮፓ፡ ጌቴቲ ፃፊቲሰ» ያጊሰ።

6 ሺን ጳውሎሲ ሄ ቤሳን ዴዳያ ኣሳፔ ባጋቲ ሳዲቃዌታ፡ ባጋቲ ፋሪሳዌታ ጊዴይሳ ቤዒዲ፡ «ታ ኢሻቶ፡ ታኒ ፋሪሳዌኔ ፋሪሳዌ

* 22:25 ሮሜ ኣሲ፡ 16:37 ጃሊቲ። 23:3 ማቶ 23:27-28 23:5 ኬሳ 22:28

ናዓ፤ «ሃይቂዳይሳት ሃይቆፔ ዳንዳና፤ ጋዳ ታኒ ኡፋይሳን ናጊያ ጊሾ ኤንቲ ታ ቦላ ፐርደሶና» ያጊዲ ኦዲስ።

7 ጳውሎስ ሄሳ ጊዳ ዎዴ ፋሪሳዊታ ጊዳኒኔ ሳዲቃዊታ ጊዳን ኦሺ ከዩን ቫኬቲደሶና። 8 ኣይስ ጊኮ፣ ሳዲቃዊቲ፣ «ሃይቂዳ ኣሲ ዳንዳና፤ ኪታንቸይካ ኣያኒካ ባዋ» ያገሶና። ሺን ፋሪሳዊቲ ናምዓይካ ዳዔይሳ ኣማኖሶና። 9 ጊታ ካቲ ኬዩስ፤ ፋሪሳዊታ ባጋ ጊዲዳ ሂጌ ኣስታማሬቲ ዳንዲ ኤቂዲ፣ «ሃ ኡራ ቦላ ኣይቢ ባላካ ዳሚቦኮ፤ ኢያው ኣያኒ ዎይኮ ኪታንቸይ ሃሳዮና ኣጌና» ያጊዲ ፓላሚደሶና።

10 ኦሻይ ዳሪን ኣሳይ ጳውሎሳ ቫቂሬሶና ማላ ጊዲ፣ ቫላቃይ ባ ዎታዳሬቲ ዎዲዲ ኤንታ ጊደሬ ኢያ ኤሌሲ ኬሲዲ ባንታ ዳዒያሱዎ ኤፋና ማላ ከቲስ።

11 ሄ ቃማ ጎዳይ ጳውሎሳ ማታን ኤቂዲ፣ «ጳውሎሳ፣ ኔኒ ታው ዩሩሳላሜን ማርካቲዳይሳዳ ሮሜንካ ማርካታናው ቤሴስ፤ ሚና፤ ኣይኮይ ባዋ» ያጊስ።

ጳውሎሳ ዎዳናው ማቂቲደሶና

12 ዎንቴሳ ጋላስ ኣይሁዳቲ፣ «ጳውሎሳ ዎዶና ዳዒሾ ሞኮ ኡዮኮ» ጊዲ ጫቂደሶና። 13 ጳውሎሳ ቦላ ሄሳ ማቂቲዳ ኣሳቲ ኦይታማፔ ዳርሶና። 14 ኤንቲ ካሂኔ ሃላቃታኮኔ ዳሪያ ጨማታኮ ቢዲ፣ «ኦኒ ጳውሎሳ ዎዶና ዳዒሾ ካላ ጊያባ ሞኮ ጊዲ ጫቂዳ። 15 ሂዛ፣ ሂንቴኔ ቫንጎይ ኢያባ ጌሺዲ ፐልጊያባይ ዳዒያ ዳኒሲዲ፣ ጳውሎሳ ሂንቴኮ ኤሃና ማላ ቫላቃ ኦይቲቴ። ኦኒ ኢ ሃ ሸቁዎ ጋካናፔ ሲንሐ ኢያ ዎዳናው ጊጊዲ ኡቲዳ» ያጊደሶና።

16 ሺን ጳውሎሳ ሚቹ ናዓይ ሄ ማቁዎ ሲዒዳ ዎዴ ቢዲ ዎታዳሬቲ ዳዒያሱዎ ጌሊዲ፣ ጳውሎሳስ ኦዲስ። 17 ጳውሎስ ማቶ ሃላቃታፔ ኢሱዎ ጃጊዲ፣ «ሃ ናዓይ ቫላቃስ ኦዲያባይ ዳዒያ ጊሾ ኢያ ቫላቃኮ ኤፋ» ያጊስ።

18 ማቶ ሃላቃይ ናዓ ቫላቃኮ ኤፊዲ፣ «ቃሾ ከፋን ዳዒያ ጳውሎስ ታና ባኮ ጃጊዲ፣ ሃ ናዓይ ኔው ኦዲያባይ ዳዒያ ጊሾ ኢያ ኔኮ ኤሃና ማላ ታና ዎሲስ» ያጊስ።

19 ቫላቃይ ናዓ ኩሺያ ኦይኪዲ፣ ደማ ካሬ ከሲዲ፣ «ኔኒ ታው ኦዳናባይ ኣይቤ?» ያጊዲ ኦይቲስ።

20 ናዓይ ቫላቃኮ፣ «ኣይሁዳቲ ጳውሎሳባ ካሴፔ ሚንሐ ፐልጋናው ኮዩዳባ ዳኒሲዲ ኔኒ ዎንቶ ኢያ ሸቁዎ ኤሃና ማላ

23:6 ሃ.ኦ 26:5፤ ፊል 3:5 23:8 ማቶ 22:23፤ ማር 12:18፤ ሉቃ 20:27

ኔና ዋሳናው ዘሬታ ቃቺደሶና። 21 ሺን ኔኒ ኤንቲ ጊያባ ሲያገ። አይስ ገኮ፣ ኦይታማፕ ዳሪያ አሳቲ ጳውሎሳ ዋቋና ዳዒሼ ላላ ሞኮ፣ ሃሌ ኡዮኮ፣ ጊዲ ጫቁዲ፣ ቆሴቲዲ ኢያ ናጎሶና። ሃዒ ኔ ጊያባ ፃላላ ሲዓናው ናጎሶና» ያገሰ።

22 ሻላቃይ ዛሪዲ፣ «ሃ ኦዲ ኔ ታው ኦዲዳይሳ ሃራ ኦዴሰካ ኦደገ» ያገዲ ናባ ጉዬ ዬዲሰ።

ጳውሎሲ ዳሪያ አይሲያ ፊልኪሳ ሲንጤ ሸቁስ

23 ሻላቃይ ማቶ ሃላቃታፕ ናምዓታ ግጊዲ፣ «ቃማሬ ሄዡ ሳቲን ቁሳሪያ ባናው፣ ናምዑ ጭቱ ዋታዳሬታ፣ ላፕን ታሙ ፓራ አሳታኔ ናምዑ ጭቱ ቶራንቸታ ገገሲቱ። 24 ዳሪያ አይሲያ ፊልኪሳኮ ጳውሎሳ ሳር ጋላናው ቶጋ ሜሄ ገገሲቱ» ያገዲ ኤንታ ከቲስ። 25 ሻላቃይ ፊልኪሳስ ሃይሳዳ ጊያ ዳብዳቤ ፃፊስ።

26 «ቃላዉዲዮሳ ሉሲዮሳፕ ዳሪያ አይሲያ ቦንቸ ፊልኪሳስ፣ ሳርይ ኔው ገደ። 27 አይሁዴቲ ሃ ኡራ ኦይኪዲ ዋቋና ሃኒሸን፣ ኢ ሮሜ ቢታ አሲ ገደይሳ ኤራዳ ዋታዳሬታራ ጋካዳ ኢያ አሻስ። 28 ኤንቲ ኢያ አይስ ሞቲያኮ ኤራናው ኮያዳ ኤንታ ሸቁዋን ኢያ ሸሻስ። 29 ኤንቲ ባንታ ሂጊያስ ኢያ ሞቲዳይሳፊ አቲን ኢያ ዋቋሲያባ ዋይኮ ቃሺሲያባ ገደናይሳ ታ ዳማስ። 30 ኤንቲ ሃ ኡራ ቦላ ማቄቲዳ ዘገርሳይ ታና ጋኪን፣ ታኒ ኤሌሳዳ ኢያ ኔኮ ዬዳስ። ኢያ ሞቲይሳቲ ኔ ሲንጻን ቢዲ ሞታና ሜላ ከታስ» ያገሰ።

31 ሄሳ ገሾ፣ ዋታዳሬቲ ከቲቲዳይሳዳ ጳውሎሳ ኤኪዲ፣ ቃማ አንቲጳጂሪሳ ጋሊደሶና። 32 ዋንቴላ ጋላስ ፓራ አሳቲ ኢያራ ባና ሜላ ኦሊዲ ቶሆ አሳቲ ጉዬ ሲሚደሶና። 33 ቶጋይ ቁሳሪያ ጋኪዲ ዳብዳቤያ ዳሪያ አይሴይሳስ አሚዲ፣ ጳውሎሳ ኢያ ሲንጤ አሊደሶና። 34 ዳሪያ አይሴይሲ ዳብዳቤያ ናባቢዳፕ ጉዬ «ጳውሎሳ፣ ኔ አው አውራጃ አሴ?» ገዲ ኢያ ኦይቸስ። ኢ ከልቁያ አሲ ገደይሳ ኤራዳ ዋቋ 35 «ታኒ ኔባ ኔና ሞቲይሳቲ ያ ዋቋ ሲዓና» ያገሰ። ዋታዳሬቲ ጳውሎሳ ሄሮዲሳ ኬላን ናጋና ሜላ ከቲስ።

24

ጳውሎሳ አይሁዴቲ ሞቲደሶና

1 ኢቻሹ ጋላሳፕ ጉዬ ካሄኔ ሃላቃይ፣ ሃናኔይ፣ ጨማታራኔ ጌርጌሉሳ ጊያ ኢሲ ፃባቃራ ቁሳሪያ ቢስ። ኤንቲ ዳሪያ አይሴይሳ

ቦላ ጳውሎስ ሞተደሶና። 2 ጳውሎሲ ጫቴዲ ጌሊዳ ዋዴ ጭጭሉሲ ኢያ ሃይሳዳ ያጊዲ ሞተሰ።

«ቦንቾ ፊልኪሳ፣ ኮኒ ኔ ባጋራ ዳሮ ሳርቴላ ዴሚዳ፣ ኔ ሎዎ አይሱዋን ኮ ቢታይ ዳሮ ላሜቲሰ። 3 ቦንቾ ፊልኪሳ፣ ኮኒ ኣወንካ ኣወዴ ጊዲን ዳሮ ጋላታን ሃሳ ኤኮሰ። 4 ታኒ ኔና ጋሞዲሶናሺን ኔኒ ኔ ኬሃቴላን ኮባ ቃንላን ሲዓና ማላ ኔና ዋሳይሰ። 5 ሃ ኡራይ ጭቤ ጊዲዲ ቢታ ኡባን ዴዲያ አይሁዴታ ጊዲን ቡቁላ ማጲዲና ደራቁታ ባጋ ኣሳ ካሌጭይሳ ጊዲይሳ ኤሪዳ። 6 ሃሪ ኣቶሺን፣ ያሳ ኬላ ቱኒሳና ሃኒሺን ኮኒ ኢያ ኮይኪዳ፤ ኮ ሃጊያዳ ኢያ ቦላ ፐርዳናው ቆፒዳ። 7 ሺን ሻላቃ ሉሲዮሲ ዩዲ፣ ዋልቃን ኮ ኩሼፔ ኢያ ዋላ ኤኪሰ። 8 ኢያ ሞቴይሳቲካ ኔኮ ያና ማላ ከቲሰ። ኔኒ ኔ ሁዔን ሃ ኡራ ፕልጋዳ ኮኒ ኢያ ሞቴያ ሞቴዋ ኡባ ኤራናው ዳንዳዓሳ» ያጊሰ።

9 አይሁዴቲካ፣ «ሃ ኦዲይ ቱማ» ጊዲ ኢያ ቆፋ ማዒደሶና።

ጳውሎሲ ሞቱዋስ ዛሮ አሚሰ

10 ዴሪያ አይሴይሲ ጳውሎስ ኦዲ ጊዲ ማሊሰ። ጳውሎሲ ሃይሳዳ ጊዲ ዛሪሰ። «ኔኒ ዳሮ ዋዴፔ ደማዳ፣ ሃ ኣሳሰ ፐርዳሼ ዴዴይሳ ኤራዳ ታ ኦዲሰ ኡፋይሳን ዛሮ አሚይሰ። 11 ታኒ ጎይናናው ዩሩሳላሜ ኬዩን ታማኔ ናሞ፡ ጋላሳፔ ኣጵናይሳ ኔኒ ኔ ሁዔን ኤራናው ዳንዳዓሳ። 12 አይሁዴቲ ታና ያሳ ኬላን ጊዲን አይሁዴ ዋሳ ኬላን ጊዲን ካታማን ጊዲን ኦዴራካ ፓላሚሺን ዋይኮ ኣሴ ሺሻዳ ማቂሺን ኢሲ ኣሲካ ዴሚቤና። 13 ሃዒካ ኤንቲ ታና ሞቴያባሰ ማርካ ዴማናው ዳንዳዮኮና።

14 «ሺን ታኒ ኢሲባ አማናይሰ፤ ታኒ ሂፔን ዴዲያባኔ ናቤቲ ዓፊዳ ኡባባ አማናዳ፣ ኮ አዋታ ያሳ፣ ኤንቲ ዋርዶ ጊያ ኦጊያን ጎይናይሰ።

15 ኤንቲ ባንታ ሁዔን አማኔይሳ ማላ ጂሎቴኔ ናጋራንቾቲ ሃይቆፔ ዴንዳናይሳ ታካ አማናይሰ። 16 ሃሳ ጊሾ፣ ታኒ ያሳ ሲንላኒኔ ኣሳ ሲንላን ኡባ ዋዴ ሎዎ ካሂ ታው ዳና ማላ ሚናይሰ።

17 «ታኒ ዩሩሳላሜፔ ኬዮሳፔ ዳሮ ላይላፌ ጉዬ ታ ቢታ ማንቆታሰ ማዴ አማናዉኔ ያርሾ ያርሻናው ዩሩሳላሜ ባሰ። 18 ታኒ ያሳ ኬላን ሃሳ ኦላዳ ጌሻ ዋጋ ፖላ ሲሚን ታና ዴሚደሶና። ሄ ዋዴ ታራ ኣሲ ባዋ፣ ኦሺካ ኬዩቤና። 19 ሺን ኢሲያፔ ዩዳ ኢሲ ኢሲ አይሁዴቲ ያን ዴዮሶና፤ ኤንቲ ታ ቦላ ኦዳ ኮይኮ ዩዲ ታና ኔ ቦላ ሞታናው ዳንዳዮሶና። 20 ዋይኮ ታኒ ሻንጉዋ ሲንጭ ሸቂዳ ዋዴ ኦላዳ ባሊ ዴዲኮ ሃይሳቲ ኔ ሲንላን ዴዴይሳቲ ኦደና።

21 ታኒ ኤንታ ጊደን ኤቃዳ፣ «ሃይቂዳይሳቲ ዴንዳና ጋዳ ዋሳዳ ኦዲዳ ጊሾ ሃቺ ሂንቲ ሲንፋን ታ ቦላ ፒርዶሶና» ጋሰ፤ ሄሳፌ ሃራባ ኦላቢኬ» ያገሰ።

22 ሺን ፊልኪሲ ያሳ ኦጊያባ ጌሺ ኤሪዳ ጊሾ «ታኒ ሂንቲ ኦዳ ሻላቃ ሉሲዮሲ ያ ዎዴ ፒርዳና» ያገዲ ሞይዚሰ። 23 ፊልኪሲ ቃሲ ጳውሎሳ ቃቸና ናጋና ሜላኔ ኢያ ዳቦታፔ ኦኒካ ኢያ ኦይቻናው ዩሺን ዲጎና ሜላ ማቶ ሃላቃሰ ኦዲሰ።

ጳውሎሲ ፊልኪሳ ሲንጩኔ ዲሩሲላ ሲንጩ ሸቂሰ

24 ጉላ ጋላሳፔ ጉዬ፣ ፊልኪሲ ኣይሁዳ ባጋ ጊዲዳ ባ ማቸ ዲሩሲላራ ዩዲ ጳውሎሳ ከቲ ኤሂሲዲ ዩሱሰ ኪሪሰቶሳን ኣማኖባ ኢያፔ ስዒሰ። 25 ጳውሎሲ ጂሎቴላባ፣ ባ ሁዒ ሃርባኔ ያናው ዴዒያ ፒርዳባ ኦዲሺን፣ ፊልኪሲ ያዩዲ፣ «ኔኒ ሃዒሰ ባ፤ ታው ኢንጃቲዳ ዎዴ ኔና ጂጊሳና» ያገሰ። 26 ሄ ዎዴ ጳውሎሳፔ ጉቦ ኤካናው ቆፒዲ ኢያ ዛሪ ዛሪ ጂጊሲዲ ኢያራ ኦዴቲሰ።

27 ናዎው ላይሳፌ ጉዬ፣ ፊልኪሳ ቤሳ ጳርቂዮስ ፊሰዎሲ ኤኪሰ። ፊልኪሲ ኣይሁዳታ ኡፋይሳናው ኮዩዲ ጳውሎሳ ቢሎና ኣጋገሰ።

25

ጳውሎሲ ሮሜ ካወዋሰ ኣቤት ገሰ

1 ፊሰዎሲ ካዎቲዳ ሂቹ ጋላሳፔ ጉዬ ቂሳሪያፔ ዩሩሳላሚ ቢሰ። 2 ያን ካሂኔ ሃላቃቲኔ ኣይሁዳታ ካሌጩይሳቲ ጳውሎሳ ሞቲዶሶና። 3 ጳውሎሳ ዩሩሳላሚ ኤሂሺን ኦጊን ቆሴቲዲ ኢያ ዎቆናው ኤንታው ኢንጃታና ሜላ ባንታና ማዶ ጊዲ ፊሰዎሳ ዎሲዶሶና። 4 ፊሰዎሲ ኤንታኮ፣ «ጳውሎሲ፣ ቂሳሪያን ቃሾ ከፋን ዴዒሰ፤ ታኒ ታ ሁዒንካ ኤሌሳዳ ጉዬ ሲማና ሃናይሰ። 5 ኢ ባሊዳባይ ዴኒኮ ሂንቲ ጊደን ኣዎቲይሳቲ ታራ ቂሳሪያ ቢዲ ኢያ ሞቶና» ያገዲ ዛሪሰ።

6 ፊሰዎሲ ኤንታ ማታን ሆሰፑን ዎይኮ ታው ጋላሳ ሜላ ጋዎዲዳፔ ጉዬ ቂሳሪያ ቢሰ። ዎንቴላ ጋላሰ ፒርዳ ኦይዲያን ኡቲዲ ጳውሎሳ ኤሃና ሜላ ከቲሰ። 7 ኢ ዩን ዩሩሳላሚፔ ዩዳ ኣይሁዳቲ ኢያ ዩሹዋን ኤቂዲ ኤንቲ ላሳናው ዳንዳያና ዳር ዴዎ ሞቶ ኢያ ቦላ ሺሺዶሶና። 8 ጳውሎሲ ዛሪዲ፣ «ታኒ ኣይሁዳ ሂጊያ ጊዲን ያሳ ከፋ ዎይኮ ሮሜ ካወዋ ቂሳሬ ናቃቢኬ» ያገሰ።

9 ሺን ፊስጾሲ አይሁዳታ ኡፋይሳናው ኮዪዲ ጳውሎሳኮ፡ «ዩሩሳሌም ባዳ ሃ ሞቱዋባ ያን ታ ሲንላን ፐርዳታናው ኮያይ?» ያጊዲ ኦይቹስ።

10 ሺን ጳውሎሲ፡ «ታኒ ፐርዳታናው ቤሲያ ቁሳሬ ፐርዳ ኬላን ኤቃ ኪቻስ። ኔኒ ሎይላ ኤሬይሳዳ ታኒ አይሁዳታ አይቢንካ ናቃቢኬ። 11 ሂዛ፡ ታኒ ናቁዳባይ ዋይኮ ሃይቆስ ጋሊያባ ኦሊዳባ ጊዲኮ ሃይቆፔ ታና አሻ ጊኬ። ሺን ኤንቲ ታና ሞቲያ ሞቶይ ጮ ጊዳፔ ጉዬ ኦኒካ ታና ኤንታው አሊ ኢማናው ዳንዳዔና። ቁሳሬይ ታባ ፐርዳ ጋዳ ኦይቻይስ» ያጊሰ።

12 ሄ ዋዴ ፊስጾሲ ባ ዘራንቸታራ ዘሬቲዲ፡ «ኔኒ ቁሳሬይ ታባ ፐርዳ ጋዳ ኦይቻዳሳ፤ ቁሳሬኮ ባሳ» ያጊዲ ዛሪስ።

ጳውሎሲ አገርጳ ሲንሌኔ ባርኒቄ ሲንሌ ሺቂስ

13 ጉላ ጋላሳፔ ጉዬ ካዋይ አገርጺኔ ባርኒቄይ ፊስጾሳ ሳርላናው ቁሳሬያ ቢደሶና። 14 ያን ኤንቲ ዳር ጋላስ ጋምዒን፡ ፊስጾሲ ካወዋስ ጳውሎሳባ ሃይሳዳ ያጊዲ ኦዲስ፤ «ፊልስቲ ቢሎና ኦጊዲ ቢዳ ኢሲ አዳይ ሃይሳን ዴዔስ። 15 ታኒ ዩሩሳሌም ቢዳ ዋዴ ካሂኔ ሃላቃቲኔ አይሁዳ ጨማቲ ኢያ ቦላ ፐርዳና ማላ ታና ዋሲዲ ኢያባ ታው ኦዲደሶና። 16 ታኒ፡ «ሞቲቲዳ ኡሪይ ባና ሞቲይሳታ ሲንላን ኤቁዲ ባ ሞቲዳባስ ዛር ኢሞናሺን፡ ኦና ጊዲኮካ አጲዲ ኢማቴይሲ ሮማ ሂጌ ጊዴና» ያጋዳ ኤንታው ዛሪስ።

17 «ሂሳ ጊሾ፡ ኤንቲ ሃይሳን ሺቂዳ ዋዴ ታኒ ጋምዎና ዋንቲላ ጋላስ ፐርዳ ኬላ ጌላዳ ጳውሎሳ ኤሃና ማላ ኪታስ። 18 ኢያ ሞቲይሳቲ ኢያ ማታን ኤቁዲ፡ ኢታባን ኢያ ሞቶና አሳኮና ጋዳ ታኒ ቆፐዳይሳ ማላ ኢያ ሞቲቦኮና። 19 ሺን ኤንቲ ባንታ አማኖባኔ ጳውሎሲ፡ «ፓፃ ዴዔስ» ጊያ ኢሲ ሃይቁዳ ዩሱሳ ጌቲቲያ አዲያባ ኢያራ ፓላሞሶና። 20 ሃ ኦዳይ ታና ሻካናው ማቲዳ ጊሾ ጳውሎሲ ዩሩሳሌም ቢዲ፡ ያን ፐርዳታናው ኮያኮ ጋዳ ኢያ ኦይቻስ። 21 ሺን ጳውሎሲ ባ ኦዳ ቁሳሬይ ቤዓና ጋካናው ቃሾ ኬላን ጋምዳናው ኦይቹስ። ታኒ ኢያ ቁሳሬኮ ዩዳና ጋካናው ኢ ቃሾታና ማላ ኪታስ» ያጊሰ።

22 ሂሳ ጊሾ፡ አገርጺ ፊስጾሳኮ፡ «ታኒ ታ ሁዔንካ ሄ ኡራይ ጊያባ ሲዓናው ኮያይስ» ያጊሰ።

ፊስጾሲ ኢያኮ፡ «ኔኒ ዋንቶ ኢ ጊያባ ሲዓና» ያጊሰ።

23 ዋንቲላ ጋላስ አገርጺኔ ባርኒቄይ ጌታ ቦንቸን ሻላቃታራኔ ካታማን ዴዒያ ጌታ አሳታራ ዪዲ ፐርዳ ኬሊ ጌሊደሶና። ፊስጾሲ

ጳውሎስ ግጊሲዲ ኤሃስ። 24 ፊስጾስ፡ «ካዋው ኣገርጳ፡ ሃይሳን ኑራ ዳዊያ ኣሳው፡ ኣይሁዳቲ ዩሩሳሌምንካ ሃይሳንካ ዋሲዲ፡ «ኢ ሂዛፔ ጉዬ ፓፃ ዳናው ቤሴና» ያገዲ፡ ታና ዋሲዲ ኡራ ሃይሳ ቤዔታ። 25 ሺን ኢያ ሃይቆስ ጋሊያባ ኣይቢባካ ታኒ ዳማቢኬ። ኢ ባ ሁዔን፡ «ቁሳሬይ ታባ ፒርዶ ያጋዳ ኣይቻይስ» ገዳ ገሾ ቁሳሬኮ ኢያ ዩዳናው ቆፋ ቃቻስ። 26 ታኒ ኢያባ ታ ጎዳ ቁሳሬስ ፃፋናው ገዲያ ጋሶይ ኣይቢካ ባዋ። ሄሳ ገሾ፡ ኢያባ ሂንቲ ቤዒኮ ታ ፃፊያባይ ቤንታኔኮ ጋዳ ሂንቲ ሲንጤ ኡባራካ ካዋው፡ ኣገርጳ፡ ኔ ሲንጤ ኢያ ኤሃስ። 27 ኣይስ ገኮ፡ ቃሼቲዳ ኣሲ ቦላ ዳይናስ ኣሊያ ዋዴ ኢ ኣይስ ሞቲቲዳኮ ቆንጨሶና ኣጌይሲ ታው ኤያቴሊ ዳኔስ» ያገሲ።

26

ጳውሎስ ኣገርጳ ሲንጻን ዛሪዳ ዛሩዋ

1 ኣገርጳ ጳውሎስ፡ «ኔኒ ኔባ ኣዳናው ዳንዳዓሳ» ያገሲ። ሄ ዋዴ ጳውሎስ ባ ኩሺያ ዳንጤዲ ሃይሳዳ ያገሲ።

2 «ካዋው፡ ኣገርጳ፡ ኣይሁዳቲ ታና ሞቲዳባስ ዛሮ ኢማናው ሃቺ ኔ ሲንጻን ኤቃሼ ታ ቃዳይ ሎፖ ጋዳ ቆፓይስ። 3 ኔኒ ኣይሁዳ ዋጋኔ ፓላማ ሎይጻዳ ኤሪያ ገሾ ታና ሳሌቶና ሲዓና ሚላ ዋሳይስ።

4 «ታኒ ናዓቴጻፊ ዶማዳ ታ ኣሳ ገደኒኔ ዩሩሳሌምን ዳዊዳ ታ ዴዑዋ ኣይሁዳ ኡባይ ኤሮሶና። 5 ታኒ ኮይሮፔ ዶማዳ፡ ኑ ኣማኖ ሂጊያ ሚንጤዲ ናጊያ ፋሪሳዌታ ያራፔ ገዴይሳ ኤንቲ ማርካታናው ኮይኮ ኤሮሶና። 6 ሃዒካ ታኒ ያሳይ ኑ ኣዋታስ ኣማና ገዳ ኡፋይሳ ናጊያ ገሾ ሞቲታዳ ሃይሳን ኤቃስ። 7 ቃሲ ታማኔ ናሞዑ ኑ ኣዋታ ሹሻይ ያሳ ቃማኔ ጋላስ ሚንጤዲ ጎይኒሹ ያሳይ ኣማና ገዳይሳ ኤካናው ኡፋይሳን ናጎሶና። ካዋው ኣገርጳ፡ ኣይሁዳቲ ታና ሞቲይ ታኒ ኡፋይሳን ሄሳ ናጊያ ገሾሳ። 8 ኣይሁዳቶ፡ ያሳይ ሃይቁዳይሳታ ዴንጤይሳ ኣይስ ኣማኔኬቲ?

9 «ካሴ ታኒ ታ ሁዔንካ ናዚሬቴ ዩሱሳ ሱንጻ ቴቃናው ዳንዳዔቲዳባ ኡባ ኣፋናው ቤሴስ ጋዳ ቆፓስ። 10 ታኒ ዩሩሳሌምን ኡሊዳይ ሃይሳ፡ ካሂኔ ሃላቃታፔ ማታ ኤካዳ ያሳ ኣሳታፔ ዳርታ ቃሺሳስ። ኤንታ ዋዲያ ዋዴካ ኤንታ ሃይቁዋ ደሳስ። 11 ዳር ዋዴ ኣይሁዳ ዋሳ ኬሳ ኡባን ኤንቲ ሴሬታና ሚላኔ ዩሱሳ

26:5 ሃ.ኦ 23:6፤ ፊል 3:5 26:9 ሃ.ኦ 8:3፤ 22:4-5

ጫዬዲ ካዳና ማላ ኡንዔላሰ። ታኒ ዋጊ ባይና ኡንታ ሃንቂታዳ ሃሪ ኣቶሺን፣ ሃሪ ቢታ ካታማታ ጋካናው ኡንታ ጎዳሰ።

12 «ታኒ ሃ ኦዳሰ ካሂኔ ሃላቃታፕ ማታኔ ኪታ ኤካዳ ዳማሰቆ ባይሰ። 13 ካዋው፣ ታኒ ሴታ ጋላሰ ኦጊያን ዳዒሺን ኣዋ ፖፖፕ ዳሮ ኣጁያ ፖፖይ ታ ዩሹዋኒኔ ታራ ቤይሳታ ዩሹዋን ሳሎፕ ፖዒሰ። 14 ኑኒ ኡባይካ ሳዓን ኩንዲዳ ዋዴ ኢብራይሰዔ ዶናን፣ ሳፖላ፣ ሳፖላ፣ ታና ኣይሰ ጎዳይ? ኑኒ ኔና ጫዲያ ፃምዓ ቃኪኮ ኔና ቆሃሳ) ያጊዲ ታው ኦዲሺን ሰዓሰ።

15 «ታኒ፣ ሳዳው፣ ኔኒ ኦኔ?» ያጋሰ።

«ሳዳይ፣ ሳታኒ፣ ኔኒ ጎዲያ ዩሱሳ፤ 16 ሺን ዴንዳ ኤቃ። ሃቺ ኔኒ ታና ቤዒዳይሳኒኔ ሲንፋፌ ታ ኔና ቤሳኛሳ ሃራታሰ ማርካታና ማላ ታ ኦሳንቸ ኦላዳ ኔና ሹማናው ኔው ቤንታሰ። 17 ኢሰራዔሌ ኣሳታፔኔ ታኒ ኔና ኡንታኮ ኪቲያ ኣይሁዴ ጊዶናይሳታፔ ኔና ኣሻና። 18 ኔኒ ኡንታ ኣይፊያ ዶያና፣ ጁማፕ ፖፖኮ፣ ፃላሂ ኩሹፕ ያሳኮ ኡንታ ዛራና። ኡንቲ ታናን ኣማኒዲ ናጋራ ኣቶቴላ ኤካና። ያሳይ ዶሪዳ ኣሳ ጊዶን ባንታ ላታ ዴማና) ያጊሰ።

19 «ካዋው ኣጊርጸ፣ ሃሳ ጊሾ፣ ታው ሳሎፕ ቤንቲዳ ቆንጩላሰ ኪቲታናይሳ ኢያቢኬ። 20 ሺን ታኒ ኮይርታዳ ዳማሰቆን ሃሳፌ ጉዬ ዩሩሳላማኒኔ ዩሁዳ ቢታ ኡባን ዳዔይሳቲኔ ኣይሁዴ ጊዶናይሳቲ ባንታ ናጋራፕ ያሳኮ ሲማና ማላኔ ናጋራፕ ሲሙዋ ቤሲያ ኦሶ ኦላና ማላ ቃላ ኦዳሰ። 21 ሃሳ ጊሾ፣ ኣይሁዴቲ ታና ያሳ ኬላን ኮይኪዲ ዋጃናው ኮዩዶሶና። 22 ሃቺ ጋካናው ያሳ ማዴይ ታፕ ሻኬቲቤና፤ ያኒያ ጊሾ፣ ጉላሲኔ ጊታሰ ማርካታሾ ሃይሳን ኤቃሰ። ናቤቲኔ ሙሴይ ሃናና ጊዲ ኦዲዳይሳፌ ሃራ ኢሲባካ ታኒ ኦዲዳይሳ ባዋ። 23 ሃሲካ፣ ስሪሰቶሲ ዋዬ ኤካናው ቤሴሰ፤ ቃሲ ሃይቆፕ ኮይር ዴንዲዲ ኣይሁዴታሲኔ ኣይሁዴ ጊዶናይሳታሰ ኣቶቴላ ፖፖ ኦዳናው ቤሴሰ) ጊዳይሳ» ያጊሰ።

24 ጳውሎሲ ሃሳ ያጊዲ ዛሪሺን፣ ፊሰፖሲ ባ ቃላ ቶቁ ኦሊዲ፣ «ጳውሎሳ፣ ኔ ጎያዳሳ፤ ኔ ዳሮ ቲሚርቲይ ኔና ጎሻሰ ጋሊሰ» ያጊሰ።

25 ሺን ጳውሎሲ፣ «ቦንቸ ፊሰፖሳ፣ ታኒ ቱማባኔ ቤሲያባ ኦዳይሲፕ ኣቲን ጎያቢኬ። 26 ታኒ ቆንጩን ኦዲያ ኦዳ ካዋይ ኤሬሰ። ሃ ኦዳይ ጎማን ኦሴቲቦና ጊሾ ኢሶይካ ኢያፕ ጌዋናይሳ ታኒ ጌሻዳ ኤራይሰ።

27 «ካዋው አገርጸ፥ ኔኒ ናቤታ ኣማናሳ ጊዲኪ? ኔኒ ኣማኔይሳ ታኒ ኤራይስ» ያገሰ።

28 ካዋይ ኣገርጸ፥ ጳውሎሳኮ፥ «ሃ ጉላ ሳቴን ታና ኣማንላናው ኮያይ?» ያገሰ።

29 ጳውሎስ፥ «ዳር ዋዴ ጊዲን ጉላ ዋዴ ኔ ፃላላ ጊደናሺን ሃቺ ታና ሰዒያ ኡባይ ሃ ቃሹዋፔ ኣቲን ታ ማላ ጊደና ማላ ያሳ ዋሳይስ» ያገሰ።

30 ሄሳፌ ጉዬ፥ ካዋይ ፊስታስ፥ ባርኒቄይኔ ኤንታራ ኡቲዳ ኡባይካ ዴንዲደሶና። 31 ያፔ ከዪዲ ቢሼ ኢሶይ ኢሱዋራ፥ «ሃ ኡራይ ሃይቆስ ዋይኮ ቃሹስ ጋሊያባ ኣይኮካ ኦሊቤና» ያገዲ ኦዴቲደሶና። 32 ኣገርጸ ፊስታሳኮ፥ «ሃ ኡራይ ቀሳሬይ ታባ ፒርዶ ጎናኮ ቢሌታናው ዳንዳዔስ፥ ሺን ኣቲስ» ያገሰ።

27

ጳውሎስ ሮሜ ቢስ

1 ኔኒ ማርካቤራ ፃሌ ባናው ቃቺዳ ዋዴ ኣወገሰያሳ ዋታዳሬታ ጌቲይሳታፔ ኢሲ ዩሊዮሳ ጊያ ማቶ ሃላቃስ ጳውሎሳኔ ሃራ ጉላ ቃሹ ኣሳታ ኢሚደሶና። 2 ኢሲያ ጋፃን ዴዒያ ቢታታ ቢያ ኣዲራሚዲኦኔ ማርካቤን ጌሊዲ ዴንዲዳ። ማቄዲያ ኣሲ ጊዲዳ ቴሴሎንቄ ኣርሰዲሮኮሲ ኑራ ዴዔስ።

3 ዋንቴላ ጋላስ ኔኒ ሲደና ጋኪሺን፥ ዩሊዮሲ ጳውሎሳስ ከሃዲ ባ ላጌታኮ ቢዲ ኮሺያባን ማዴታና ማላ ኤንታኮ ዩዲስ። 4 ያፔ ዴንዲዲ ሲንላራ ኑ ቦላ ጫርኪያ ጊሾ ሃላን ቴቄቲዳ ቢታ፥ ቆጶሮሳን ዘምፒዲ ኣጲዳ። 5 ኪልቄያኔ ጸንፊሊያ ማታን ዴዒያ ኣባ ፒኒዲ ሊቄያን ዴዒያ ሙራ ጋኪዳ። 6 ያን ማቶ ሃላቃይ ፃሌ ቢያ ኢስኪንዲሪያ ማርካቤ ዴሚዲ፥ ኢያን ኑና ጌልሲስ።

7 ኔኒ ዳሮ ጋላስ ሎዳራ ቢዲ፥ ዳሮ ሜቶን ቃንደሳ ካታማ ማታ ጋኪዳ። ያራ ባናው ኑና ጫርኮይ ዲጊን ሳልዋናራ ኣጲዲ ሃላን ቴቄቲዳ ቢታ፥ ቃርፃሳን ዘምፒዲ ኣጲዳ። 8 ዳሮ ሜቶን ጋፃ ጋፃ ኦይኪዲ ላሲያ ካታማ ማታን ዴዒያ ኣባ ደናን «ማርካቤይ ዋፑ ጊዲ ሸምፒያሶ» ጊያ ቤሳ ጋኪዳ።

9 ኔኒ ያን ዳሮ ዋዲያ ጋምዒዳፔ ጉዬ ያሚ ቢሌቲን፥ ማርካቤራ ቡሲ ሜቲያ ጊሾ ጳውሎስ ኤንታ ዘሪስ። 10 «ኣሳው፥ ኑ ቡሳን ጌታ ቦሺኔ ዳሮ ቆሆይ ዴዔይሲ ታው ቤንቴስ፤ ቆሆይ ጫና ቦላኔ ማርካቤያ ቦላ ፃላላ ጊደናሺን ኑ ዴዐዋ ቦላካ ጋካና» ያገሰ። 11 ሺን ማቶ ሃላቃይ ጳውሎስ ጊዳይሳፌ ኣሊዲ ማርካቤያ ላጌይሲኔ ማርካቤያ ጎዳይ ጌይሳ ኣማኒስ። 12 ሄ

አባ ደናን ደዒያ ካታማይ ባልጎ አገና አፋናው ኤንታው ኢንጃቶና ጊሾ ዳሪያ አሳቲ ባንታው ዳንዳዔቲኮ ፊንቄ ካታማ ጋኪዲ ባልጎ አገና ያን አፋናው ዘሬቲዶሶና። ፊንቄይ ፑዳሃ-ወሎሃፔኔ ዲጌሃ-ወሎሃፔ ጊዶን አባ ደናን ደዒያ ካታማ።

አባ ቦላ ጎቴይ ዳንዲስ

13 ካወሻ ዲጌሃ ጫርኮይ ሎዳራ ጫርኪዳ ዋዳ ባንታ ቆፐዳይሳዳ ሃኒዳባ ዳኒን ዳንዲዲ፣ ማርካቤይ ቃቃና ማላ ኦይኪያ ቢራታ ፑዳ ኤኪዲ ቃርጻሳ ማታራ አዲዶሶና። 14 ሺን ዳሮ ጋምዖና «አዉራቂስ» ጊያ ዋልቃማ ጎቴይ ሃላን ቴቂቲዳ ቢታፊ ዲጌ ኤንታ ቦላ ዳንዲስ። 15 ሄ ጎቴይ ማርካቤያ ሱጊዲ ኤፎና ዲጊዳ ጊሾ ጫርኮይ ማርካቤያ ባ ደሲዳ ሶ ኤፊስ።

16 ኦኒ ቄዳ ጊያ ሃላን ቴቂቲዳ ቢታ ዜምፒዲ ቢሽ ዳሮ ማቶቴቲዲ ማርካቤያ ዋጎሉዋ አሻናው ዳንዳዒዳ። 17 ኤንቲ ዋጎሉዋ ፑዳ ኬሲዳፔ ጉዬ ዋዶሩዋን ማርካቤያ ቦላ ፃፂዲ፣ ሚንሒ ቃቲዶሶና። ሱርቲሳ ጊያ ሻፊያን ባንታና ደምዔላና ጊዲ ሂርጊዲ፣ ማርካቤያ ሻራ ዋዲሲዲ ማርካቤያ ጮ ዬዲ አጊዶሶና።

18 ጎቴይ ዋልቃሚሽ ቢን ዋንቴላ ጋላስ ጫናፔ ባጋ አባን ሆሎ ኦይኪዶሶና። 19 ሄቫንሎ ጋላስ ማርካቤያ ሚሺያ ኤኪዲ ባንታ ኩሽን ሆሊዶሶና። 20 ኦኒ ዳሮ ጋላስ አዋ ኦይፊኔ ያሊንቶ ቤዖና ጊሾኔ ዋልቃማ ኡሾይ ኦ ቦላ ኡሺዳ ጊሾ ሲንላፊ ሽምፖራ አታና ጊዲ ቆፐሶኮ።

21 ሄ ዋዳ ኤንቲ ዳሮ ጋላስ ካሒ ዋና ጋምዒዳ ጊሾ ጳዉሎሲ ኤንታ ጊዶን ዳንዲ ኤቂዲ፣ «አሳው፣ ሂንቴ ታ ዘሪያ ኤኪዲ ቃርጻሳፔ ዳንዶና አጊዳኮ ሃ ማቶይኔ ቆሆይ ኦና ጋኬና። 22 ሺን ታኒ ሂንቴና ያዮፊቴ ጋዳ ዘራይስ፤ አይስ ጊኮ፣ ሃ ማርካቤይ ዳያናፔ አቲን ሂንቴፊ ኢሲ አሳ ሽምፖይካ ዳዩና። 23 ዚኔ ቃማ ታ ኢያባ ጊዲዳይሲኔ ታ ጎይኒያ ያሳይ ኪቲዳ ኪታንቸይ ታ ማታን ኤቂዲ፣ 24 ጳዉሎሳ፣ ያዮፋ፤ ኔኒ ሮሜ ካወዋ ቄሳሪ ሲንላን ኤቃናው ቤሴስ። ሄኮ ያሳይ ኔ ጊሾ ኔራ ቢያ አሳ ኡባ ሽምፑዋ አሽሲ) ያጊስ። 25 ሃሳ ጊሾ፣ አሳው፣ ያዮፊቴ፣ ሄ ኪታንቸይ ታው ኡዲዳይሲ ሃናናይሳ ታኒ አማናይስ። 26 ሺን ጫርኮይ ኦና ኤፊዲ ኢሲ ሃላን ቴቂቲዳ ቢታ ጋፃን ሆላና» ያጊስ።

27 ታማኔ ኦይዳንሎ ቃማን ሚዲቲራኔ አባን ኦና ጫርኮይ ጌዴኔ ሃ ሱጊሺን፣ ጊዲ ቢላሄ ጊዲያ ዋዳ ማርካቤያን ኦይዳሳታስ ቢታኮ ማቲዳባ ዳኒስ። 28 ኤንቲ ጨሞቴላ ኤራናው

ኮዩዲ ዋደሮ ያራን ዳዲያባ ቃቺዲ አባን ዩጊን፣ አባይ ሆሰፑን ታሙ ዋቆ ጊዲስ። ጉላ ጋምዒዲ፣ ዛሪ ዩጊን ኡሱፑን ታሙ ዋቆ ጊዲስ። 29 ኤንቲ አባ ጋፃን ዳዲያ ሹቻን ደምዔቶና ማላ ያዩዲ፣ ማርካቤይ ቦና ማላ ኦይኪያ ኦይዲ ቢራታታ ማርካቤያፕ ጉዬራ አባን ዩጊዲ፣ ሳዒይ ዋንታና ማላ ያሳ ዋሶሶና። 30 ማርካቤያን ኦሌይሳቲ ማርካቤያፕ ባቃታናው ኮዩዲ፣ ማርካቤይ ቦና ማላ ኦይኪያ ቢራታታ ማርካቤያፕ ሲንላ ባጋራ አባን ዩጊያ ዳኒን ዋሳሎዋ አባን ዩጊደሶና። 31 ጳውሎሲ ማቶ ሃላቃኮኔ ዋታዳሬታኮ፣ «ሃይሳቲ ማርካቤያን ሹምፒ ኡቶና ኢዲኮ ሂንቲ አታናው ዳንዳዔኬታ» ያጊስ። 32 ሄሳ ጊሹ፣ ዋታዳሬቲ ዋሳሎይ ቃሹቲዳ ዋደሩዋ ቃንዲዲ ዩዲ አጊደሶና።

33 ሳዒ ዋንታና ሃኒሺን ኡባይ ካሊ ማና ማላ ጳውሎሲ አሳኮ፣ «ሂንቲ ካሊ ሞና ናጊሹ ሃቺራ ታማኔ ኦይዲ ጋላስ ጋምዒዳታ። 34 ሄሳ ጊሹ፣ ጉላ ካሊ ሂንቲ ማና ማላ ታኒ ሂንቲና ዋሳይስ። ሂንቲ ጋሽታና ማላ ጉላ ካሊ ማናው ኮሹስ፤ ሃሪ አቶሺን ሂንቲ ሁዔ ቢናናፕ ኢሶይካ ቆዩና» ያጊስ። 35 ጳውሎሲ ሄሳ ጊዲ ኡይላ ኤኪዲ ኡባ ሲንላን ያሳ ጋላቲስ፤ ኡይላ ማንሊዲ ሙሱ ደሚስ። 36 ኡባይ ሚኔቲዲ ባንታው ካሊ ኤኪዲ ሚደሶና። 37 ኑኒ ማርካቤያን ዳዒይሳቲ ናምዑ ያታኔ ላፑን ታማኔ ኡሱፑና። 38 ኤንቲ ሚዲ ካሊዳ ዋደ ጫና ጊሰቲያ አባን ዩጊዲ ማርካቤያ ዳፀዋ ካወሺደሶና።

ማርካቤይ ሚዒስ

39 ሳዒ ዋንቲዳ ዋደ ማርካቤያ አሳንቸቲ አው ቢታ ጋኪዳኮ ኤሮናሺን፣ አባ ጋፃን ዳዲያ ሻፌኔ ሲለሞ ቤዒደሶና። ባንታው ደንዳዔቲኮ ማርካቤያ ሄ ሻፊያኮ ሺሻናው ቆፒደሶና። 40 ያቲዲ፣ ማርካቤይ ቦና ማላ ኦይኪያ ቢራታታ ቢርሺዲ አባን ዩጊደሶና። ሄ ዋደ ላጊያ ሚላ ቃቺያ ዋደሩዋ ቢርሺደሶና። ሄሳፌ ጉዬ፣ ጫርኮይ ማርካቤያ ሲንሌ ሱጋና ማላ ማርካቤያ ኤፊያ ሻራ ሲንላ ባጋራ ቶቁ አሊዲ ቡሱ ደሚደሶና። 41 ሺን ማርካቤይ ሻፌ ደሬን ደምዔቲዲ ሚቲቲስ። ማርካቤያስ ሲንላ ባጋይ ፀጉኒዲ ሻፊያ ጫዲ ኦይኪዲ ቃዶና ኢዲን፣ ጉዬ ባጋይ ዙሊያ ሱጌላን ማቆሬቲላ ኦይኪስ።

42 ዋታዳሬቲ ቃሾ አሳፕ ኢሶይካ ሃላ ዋቋዲ ኬሲ ኤኮና ማላ ኤንታ ዋቆናው ዘራቲደሶና። 43 ሺን ማቶ ሃላቃይ ጳውሎሳ አሻናው ኮዩዲ ዋታዳሬታ ዘራታ ኢዲስ። ሃሌ ዋቆ ኤሪያ ኡባይ ማርካቤያፕ ሃላን ጉፒ ጉፒ ዋቋዲ ካሰቲዲ ጋፃ ኬያና ማላ

ከተሰ። 44 አቲዳይሳቲ ሳንቃ ቦላኔ፣ ማርካቢያ ማዑዋ ቦላ ኬያና ማላ ከተሰ። ሄሳዳ ሃኒዲ ኡባይ ጋፃ ሳርራ ኬዪደሶና።

28

ጳውሎሲ ማልታ ጊያ ሃላን ቱቁቲዳ ቢታ ቢሰ

1 ኑኒ ጋፃ ሳር ኬዪዳ ዋዴ ጋኪዳ ሃላን ቱቁቲዳ ቢታይ ማልታ ጌቱቲይሳ ኤሪዳ። 2 ማልታ አሳይ ኑሰ ዳር ኬሃ ኬሂደሶና። ኢሪ ቡኪያ ጊሾኔ ማጊያ ጊሾ ታማ ኤሊዲ ኑና ኡባ ሞኪደሶና።

3 ጳውሎሲ ዳር አፊራ ሺሺዲ ታማን ዋሊሺን፣ ሾሺ ሴላ ጊሾ ኬዪዳ ኢያ ኩሺያ ቦላ ፃፃቲዳ ኢያ ዱኪሰ። 4 ማልታ አሳይ ሾሺ ጳውሎሳ ኩሺን ፃፃቲዳይሳ ቤዒዳ ዋዴ ኢሶይ ኢሱዋኮ፣ «ቱማ ሃ ኡራይ ሽምፖ ዋዲዳ አሲ፤ ሃሪ አቶሺን አባፌ ኢ አቲንካ ያሳ ፐርዳፌ * አቲዳ ፓፃ ዳናው ዳንዳዒቤና» ያጊደሶና።

5 ሺን ጳውሎሲ ባ ኩሺያፔ ሾሻ ወፃርኪዳ፣ ታማን ዩጊሰ፤ ኢያ አይኮካ ቆሂቤና። 6 ኤንቲ፣ «ኢያ አሳቲላይ ኪዳሰ፣ ዋይኮ አኬኮና ኩንዲዲ ሃይቁሰ» ጊዲ ናጎሶና። ሺን ዳር ዋዴ ናጊዲ ኢያ አሳቲላን አይቤካ ዲማቲዳባይ ቆዩን፣ «ሃይሲ ያሴ» ያጊዲ ባንታ ቆፋ ለሚደሶና። 7 ሄ ሄራን ሃላን ቱቁቲዳ ቢታ ሃላቃ፣ ፑፕሊዮሳ ጌይሳሰ ጋዴይ ዳዔሰ፤ ሄሹ ጋላሰ ጋካናው ኢ ኑና ሲቆን ሞኪሰ። 8 ፑፕሊዮሳ አዋይ ቆፆ፣ ሚሻኔ ኡሎ ኡቲሶን ሃርጌቲዲ ዚንዒዲ ዳዔሰ። ጳውሎሲ ኢያ ሶ ጌሊዲ ኢያው ያሳ ዋሲሰ፤ ባ ኩሺያ ኢያ ቦላ ዋሊዲ ፓሊሰ። 9 ሄሳፌ ጉዬ፣ ማልታን ዳዒያ ሃርጊያ ሃራ አሳቲካ ዩዲ ፓፃደሶና። 10 ኤንቲ ኑና ዳር ቦንቺደሶና፤ ኑኒ ማርካቤራ ባናው ዳንዲዳ ዋዴ ኦኔሰ ኩሺያባ ኑሰ ኢሚደሶና።

ጳውሎሲ ማልታፌ ሮሜ ቢሰ

11 ሄሹ አጌናፔ ጉዬ፣ ማልታን ባልጎ አሊዲ ኢሰኪንዲሪያ ማርካቤራ ባናው ዳንዲዳ። ሄ ማርካቢያ ቦላ ዲዮሰቆሮሳ ጊያ ማንቲ ኤቃታ ሚሲሌይ ዳዔሰ። 12 ሲራኩሴ ካታማ ጌሊዲ ያን ሄሹ ጋላሰ ኡቲዳ። 13 ያፔ ዳንዲዲ ሬጊዩሜ ካታማ ጋኪዳ። ኢሲ ጋላሳፔ ጉዬ፣ ዱጌሃ ባጋ ጫርኮይ ጫርኪን፣ ዋንቲላ ጋላሰ ፑቲዮሌ ካታማ ጋኪዳ። 14 ያን ኑኒ ኢሲ ኢሲ አማኒያ አሳታ

* 28:4 ያሳ ፐርዳፌ፡ ሄ ዋዴ ሄ ቢታን ደማ ደማ ማጫ ያሳቲ ዳዮሶና። ኤንታፌ ኢሲኒያ ኢታ አሊያ አሳ ፐርዲያር። ኢያ ፐርዳ ያሲ ጌቲታ ጌጌታሰ።

ዳሚን፣ ባንታራ ሳሚንታ ጋሞዓና ሜላ ኑና ዋሲዶሶና። ሄሳፌ ጉዬ፣ ሮሜ ቢዳ።

15 ሮሜን ዳዒያ አማኒያ አሳቲ ኑባ ሲዒዲ፣ አፊዮሳ ጊያን፣ ሄዥ አቋያሶ ጊያ ቤሳ ጋካናው ኑና ሞካናው ዪዶሶና። ጳውሎሲ ኤንታ ቤዒዳ ዋዴ ያሳ ጋላቲዲ ሚኔቲሰ።

ጳውሎሲ ሮሜን

16 ኑኒ ሮሜ ጌሊዳ ዋዴ ጳውሎሲ ባና ናጊያ ዋታዳሪያራ ባርካ ዴያ ጌቲቲሰ።

17 ሄዥ ጋላሳፔ ጉዬ፣ ጳውሎሲ አይሁዴታ ሃላቃታ ባኮ ጃጊሲሰ። ኤንቲ ሺቋዳ ዋዴ ኤንታኮ፣ «ታ ኢሻቶ፣ ታኒ ኑ አሳ ዋይኮ ኑ አዋታ ዋጋ ቦላ አይቤ ቆሆካ ኦላቢኬ፣ ሺን ታና ዩሩሳላሜን ቃቸዲ ሮሜ አሳሰ አሊዲ አሚዶሶና። 18 ኤንቲ ታ ሞቱዋ ቤዒዲ ሃይቆሰ ጋሊያባ ታ ቦላ አይቤባካ ዳሚቦና ጊሾ ታና ቢላናው ቆፒዶሶና። 19 ሺን አይሁዴቲ ሄሳ ኢዲዳ ዋዴ ሪባ ቁሳሬይ ፐርዶ» ያጋሲፔ አቲን ታኒ ታ ዳሪያ ሞቲያባይ ዳዒን ጊዳና። 20 ታኒ ሂንቴና ጃጊሲዳይ ሂንቴና ቤዓናዉኔ ሂንቴው ሃይሳ ኦዳናሳ። ታኒ ሃ ሳንላላታን ቃሼቲዳይ ኢሰራዔሌ አሳይ ናጊያ ኡፋይሳ ጊሾሳ» ያጊሰ።

21 አይሁዴ ሃላቃቲ ጳውሎሳኮ፣ «ኑስ ዪሁዳፔ ኔባ ፃፊቲዳ ዳብዳቤይ ጋኪቤና። ያፔ ዪዳ አሳታፔ ኢሶይካ ኔባ ኢታ ኦዲዳይ ባዋ። 22 ሺን ሃ ኔ ካሊያ አማኑዋ ዲማ ዲማ ቤሳን አሳይ ኢዲይሳ ኑኒ ኤሪያ ጊሾ ኔ ቆፋ ሲዓናው ኮዮሰ» ያጊዶሶና።

23 ኤንቲ ባንታ ያና ጋላሰ ጳውሎሳሰ ቃፃሪዲ፣ ሄ ጋላሰ ዳሪዲ ኢ ዳዒያሱዋ ዪዶሶና። ኢ ዋንታፌ አማርሲ ጋካናው ያሳ ካዋቲላባ ኤንታው ማርካቲሰ። ቃሲ ኤንቲ ዩሱሳባ አማናና ሜላ ሙሴ ሂጊያፌኔ ናቤታ ማፃፋፔ ቆንጨሲዲ ኤንታ ታማርሲሰ።

24 ኢሶቲ ኢሶቲ ጳውሎሲ ጊዳይሳ አማኒዶሶና፣ ሺን ሃራቲ አማኒቦኮና። 25 ኤንቲ ባንታ ጊዶን ኦዳ ማዖና ኢዲዳ ዋዴ ጳውሎሲ ኢሲባ ጊዳፔ ጉዬ ቢዶሶና። ኢ ሃይሳዳ ያጊሰ። «ጌሻ አያናይ ኑ አዋታሰ ናቢያ ኢሳያሳ ዶናን ኦዲዳይሲ ቱማ።

26 ህኒ ሄ አሳኮ ባዳ፣
ሂንቴ ሲሳ ሲዔታ፣ ሺን ሂንቴው ጌሌና፤
ሂንቴ ቤያ ቤዔታ፣ ሺን ዳሜኬታ።
27 ሃ አሳ ዋዛናይ ሙሚሰ፤
ኤንታ ሃይላይ ቱሊሰ፤

ኤንታ አይፊይካ ጎዜቲስ።

ሄሲ ባይኔኮ፥

ኤንቲ ባንታ አይፊያን ቤዒዲ፥ ባንታ ሃይፋን ሲዒዲ፥ ባንታ
ዋዛናን አኬኪዲ፥

ኤንቲ ታኮ ሲማና፤

ታካ ኤንታ ፓላናሺን» ያገገ» ያገሰ።

28 «ሂዛ፥ ሃይሲ ያሳ አቶቴላ ከታይ አይሁዴ ገደናይሳታስ
ገዴይሳ ኤሬታ። ኤንቲካ ሲዒና» ያገሰ።

29 ጳውሎስ ሄሳ ገዳፔ ጉዬ አይሁዴቲ ባንታ ገደን ዳር
ፓላሚሽ ኬዩዲ ቢዶሶና።

30 ጳውሎስ ኬራ ኬፋን ናምዑ ላይሳ ኩሜሳ ዴዒስ፤ ያን
ዴዒሽ ባኮ ያ ኡባ ሞኬስ። 31 ያሺ ባይናኔ ኦኒካ ዲጎናሺን
ያሳ ካዎቴላባ ሳባኪስ፤ ጎዳ ዬሱስ ኪሪስቶሳባ ቆንጨሲዲ
ታማርሴስ።

ኦራሳ ጩቂዋ ኅፋሶ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022

c35d6c73-3843-5482-b53e-7559d35deee5